

Di's wen chan' Jesucrist jwan' mke' Mateo

Re lo bin ten' nde Jesucrist

¹ Ye's nge le re xa' ten' mbro' bin Jesucrist, Jesucrist nde lo bin David nde David nde lo bin Abraham

² Abraham ngok xud Isaac, Isaac ngok xud Jakob nde Jakob ngok xud Judá kon re wes Judá.

³ Judá ngok xud Fares kon Zara, le' xna' rop xa' ngok Tamar. Fares ngok xud Esrom nde Esrom ngok xud Aram.

⁴ Aram ngok xud Aminadab, Aminadab ngok xud Naasón, nde Naasón ngok xud Salmón.

⁵ Salmón ngok xud Booz, le' xna' Booz ngok Rahab. Booz ngok xud Obed, le' xna' Obed ngok Rut, nde Obed ngok xud Isaí.

⁶ Isaí ngok xud rey David, nde rey David ngok xud Salomón, le' xna' Salomón ngok ngol ta ngok sal' Urías.

⁷ Salomón ngok xud Roboam, Roboam ngok xud Abías, nde Abías ngok xud Asa.

⁸ Asa ngok xud Josafat, Josafat ngok xud Joram, Joram ngok xud Uzías*.

⁹ Uzías ngok xud Jotam, Jotam ngok xud Acáz, Acáz ngok xud Ezequías.

¹⁰ Ezequías ngok xud Manasés, Manasés ngok xud Amón, nde Amón ngok xud Josías.

* **1:8 1:8** Uzías nde lo bin Joram, Uzías nak xin' xot nza Joram. 1ª Cro 3:11-12, 2ª Cro 22:1, 24:1 y 25:1

¹¹ Josías ngok xud Jeconías nde kon re wes Jeconías. Tyemp ya, re xa' Babilonia mblo'te xa' re xa' Judá nde mbe' xa' xa' las xa'.

¹² Xista mbe' xa' re men Judá a lad Babilonia, Jeconías ngok xud Salatiel, nde Salatiel ngok xud Zorobabel,

¹³ Zorobabel ngok xud Abiud, Abiud ngok xud Eliaquim, nde Eliaquim ngok xud Azor.

¹⁴ Azor ngok xud Sadoc, Sadoc ngok xud Aquim, nde Aquim ngok xud Eliud.

¹⁵ Eliud ngok xud Eleazar, Eleazar ngok xud Matán, Matán ngok xud Jakob.

¹⁶ Nde Jakob ngok xud Jose, sal' Mari. Nde Mari ngok xna' Jesús, Xa' mtel' Dios.

¹⁷ Tamod sa si'da ned xa' ngo xata Abraham axta David, xata David axta sen' mbe' xa' Babilonia xa' Judá, ngo ta si'da ned xa', nde xata sen' mbe' xa' Babilonia xa' Judá axta ngol Crist ngo ta si'da ned xa'.

Jesús ngol

¹⁸ Che' mod ngol Jesucrist: Mari xna' Jesús nakdi'sla selya'no xa' Jose, nde ben' tera tyobno xa' ta xa', Mari mkelo xin' na' por yalne chan' Mbi Nayon.

¹⁹ Mbay le' Jose sal' Mari nak ti xa' gal' nde mbli xa' xgab naga'sta la' xa' Mari sa na'ryo'yanthod Mari lo re xa' yez.

²⁰ Xgab ya nzo yek Jose, nde cho le' thi anj chan' Dios mni lo xa' len' xkal' xa' nde nchab anj lo xa':

—Jose, nde lo bin David, na'syepta la kaa Mari, tak yalne chan' Mbi Nayon mbli sa mkelo xin' xa'.

²¹ Nde ka xa' ti mbed bi' nde kolea mbed Jesús, tak le'r tola' re men yez or lo re xken men.

²² Reta jwan' re' ngote, sa ngok jwan' mni Dios lo profet lo nchab Dios:

²³ Bwi' go', ti mza' yen' tera gaxno mbi', kelo xin' na', nde tyan mza' thi mbed bi', mbed ya kole xa' Emanuel, Emanuel nak: Dios ndo xij na'.

²⁴ Sen' mbro' xkal' Jose, mbli xa' xata mnibe' anj chan' Dios lo xa', nde mka xa' Mari ngok sal' xa'.

²⁵ Per na'ngaxnod xa' Mari, axta kebe' ngol mbed xin' ner Mari nde mblole xa' mbed Jesús.

2

Xa' nte'd mbel lo be' nda tna Jesús

¹ Sen' lo ta ngola Jesús yez Belén, jwan' nzi lo xyon Judea, mzin pla xa' jwan' nted re mbel lo be'. Le' xa' ya mbro' lad ned nche'dke wiz, nde mzin xa' yez Jerusalén, len' lin' rey Herodes

² nde mnab di's xa':

—¿Ma rey lo re xa' judío jwan' ta ngola'? Tak ná' mbwi' mbel chan' xa' lo be' lad ned nche'dke wiz, nde ná' nde toxub lo xa'.

³ Sen' mbin rey Herodes jwan' na, mda' toza xgab yek xa', nde taga mxak re xa' yez Jerusalén.

⁴ Zyasa mtop rey Herodes re nglwey' jwan' nyebe', nde re maestr nchak ley sa mnab di's rey lo re xa' ya, ploga ndablo gal Xa' tel' Dios.

⁵ Re xa' ya nchab:

—Le' xa' gal yez Belén, lo xyon Judea, tak ta nchab lo ye's mke' profet:

⁶ Nde lu, yez Belén, nax lo xyon Judá,

nanaktala thi yez mas lud xij re yez ntak lo xyon
Judá,
tak xij la gal ti xa' kob ned lo yez na,
xa' ya kenap re men Israel, men yez na,* xaja xa'
nkenap mbaxil'.

⁷ Zyasa nagasta mbrez rey Herodes re xa' jwan'
nted re mbel lo be' ya, nde mnabdi's xa' nen' polpa
mbro'to mbel ya lo be'.

⁸ Sera' mtel' xa' xa' yez Belén nde nchab xa' lo
xa':

—Wa go' nde jwin kwan' go' mbed, nde sen' zyal
go' or ye'd tej go'y lon, sa non ya toxub lor.

⁹ Sen' ngolo mbin xa' reta jwan' nchab rey lo
xa', mxen xa' ned nda xa', nde le' mbel ta mbwi'
xa' lad ned nched ke wiza, nda sibloy lo xa' axta
kebe' mzina ten' nax mbed, tya ngotoba.

¹⁰ Nde sen' mbwi' xa' mbel nale toz tir ngo lazo'
xa'.

¹¹ Nde lo ngote xa' len' yo, mbwi' xa' mbed kon
Mari xna' mbed. Zyasa mdoxub xa' nde mbil' xa'
lo mbed nde mxal' xa' jwan' nzo re jwan' ndak
ndeno xa' nde mdala's xay lo mbed, mda' xa' oro,
xtarak nde du'r naxe' ndye[†].

¹² Xisa mni Dios len' xkal' xa', sa na'bered xa' lo
Herodes, tamod sa xa'ga ned mbere xa' las xa'.

Nxon'no xa' mbed Egipto

* **2:6 2:6** Miqueas 5:2 † **2:11 2:11** Mda' xa' oro, xtarak nde du'r
naxe' ndye'. Re jwan' re' nak jwan' nda'la's men lo re xa' ndak o
lo thi rey tiemp ya. le dieron oro para decir que es rey, le dieron
incienso para decir que es saserdote y le dieron mirra para decir
que se va morir.

¹³ Sen' ngola re xa' ta ndli be' mbel lo be' ya ned, zya ti anj chan' Dios mbro'to len' xkal' Jose nde nchab xa':

—Goche nde bxen mbed nde xna' mbed, nde bxon' wa Egipto, nde tya yan' la yoa axta kebe' na ni loa, tak Herodes kwan' mbed sa kuj xa' mbed.

¹⁴ Zyasa ngoche Jose nde mxen xa' mbed kon xna' mbed nde yal' mxon' xa' nda xa' Egipto.

¹⁵ Tya ngo xa' axta kebe' nguj Herodes. Tamod sa ngok xki's Dios, jwan' nchab Dios lo xa' mbrid xki's Dios pola:

—Egipto nzo xin' na sa mbrez na or.‡

Herodes mnibe' gaj re mbed

¹⁶ Lo sen' mne Herodes mkwin'no re xa' ta ndli be' mbel lo be' ya Herodes, mxi toz tir lazo' xa'. Tamod sa mnabe' xa' gaj reta mbed jwan' nzo chop lin' par la, re or jwan' nzo yez Belén nde re yez nzi dib tya, xata tyemp jwan' mdej re xa' ta ndli be' mbel lo be' ya lo xa'.

¹⁷ Tamod sa ngok di's jwan' nchab xa' mbrid xki's Dios pola, ndole Jeremías:

¹⁸ Mke bi len' yez Ramá,
nchon' xa' nde nabil toz mbez yaj xa',
Raquel nak xa' ta nchon'no re xin' na' ya,
nde na'teyalta xa' ko nale men lazo' xa', tak ngujla
reta xin' xa'.§

¹⁹ Sen' lo ngujla Herodes, ti anj chan' Dios, mbro'to len' xkal' Jose sen' nzo xa' Egipto, nde nchab anj lo Jose:

‡ 2:15 2:15 Oseas 11:1 § 2:18 2:18 Jer. 31:15

²⁰ —Bxen mbed kon xna' mbed nde bere lo xyon Israel, tak ya ngujla re xa' ta ndonke kuj mbeda.

²¹ Zyasa ngoche Jose mxen xa' mbed kon xna' mbed, nde mbere xa' lo xyon Israel.

²² Lo sen' mbin Jose, xa' ndole Arquelaos xin' Herodes nyebe' xyon Judea lugar chan' Herodes, mzyeb Jose ya Jose tya. Per Dios mdej lo Jose len' xkal' Jose tamod sa nda xa' lo xyon' Galilea.

²³ Sen' mzin xa' tya nda xa' ngo xa' yez ndole Nazaret. Tamod sa ngok jwan' mdej re xa' mbrid xki's Dios pola, nchab xa': le' Jesús ryo'le, Xa' Nazaret.

3

Juan ngole men, nda' xki's Dios

(Mr. 1:1-8; Lc. 3:1-9,15-17; Jn. 1:19-28)

¹ Lo ta ben' nzo Jesús tya, Juan ta ngole mena, ngwa ta' xki's Dios lad izyo nagan lo xyon Judea,

² nde nchab xa':

—Bla' go' re jwan' narax nak go' nde bere go' lo Dios, tak yalnyebe' lo be' nde sin gaxla.

³ Juan re' ta mdej xa' mbrid xki's Dios pola ndole Isaías sen' nchab xa':

Nchen mbez thi xa' lad izyo biz:

"Ptoxkwa' go' xned Xa' Nyebe'

nali bdix go' xned xa'."

⁴ Xab Juan naksa' yis lad kamey, nde len' Juan nachal sinch yid, nde jwan' ncha Juan nak mbesto nde mzin nzo wan ngu' Juan.

⁵ Zyasa xa' nzo yez Jerusalén, nde re xa' nzo temas yez nzi dib lo xyon Judea nde xa' nzo gax dib ro yo' Jordán nda wi' xa' lo Juan.

⁶ Nde sen' nxobdol xa' re xken xa', ngole Juan xa' len' yo' Jordán.

⁷ Lo mne Juan bro toz re xa' fariseo nde re xa' saduceo, nde xa' plo ngegole Juan re men, zyasa nchab Juan lo re xa' ya:

—¡Go' ba nya lo bin mzib ba nak go'! ¿Cho ne lo go' xyon' go' lo yalnayi' chan' Dios ta nde gaxa?

⁸ Blo' go' ke lipa mbla' go' re mod narax nak go'.

⁹ Nde nalid go' xgab len' lazo' go': "Ná' nde lo bin Abraham"; tak na ni lo go', axta re ke re' toyal liche Dios men nde lo bin Abraham.

¹⁰ Le' yibya ndabsa'la xis lox re ya, nde reta ya jwan' na'tada ngud wen, xcho'y nde yoy lo ki sa yola.

¹¹ Na, gal' di's ngolen men len' nit, sa lo' ke lipa mbla'la xa' mod narax nak xa'. Per Xa' jwan' ndenke xis na Xa' ya ngeno mas yalnyebe' ke na, nde nekla yalyid Xa' nanzal'ta na wen,* Xa' ya kole men kon Mbi Nayon nde kon bel.

¹² Nde nzola pal ya' Xa' sa to Xa' trig nde kosa' Xa'y ten' nchotsa' mbis, le' yix trig tol' Xa'y lo bel jwan' nanchu'tirta.

Jesús mdryo'le

(Mr. 1:9-11; Lc. 3:21-22)

¹³ Zyasa, Jesús mbro' Galilea nda Xa' yo' Jordán, plo ndo Juan sa kole Juan Xa'.

¹⁴ Per le' Juan nandeyalta, nde nchab Juan lo Jesús:

—Lu ndablo kolea na, ¿Kwan liy sa lu che' nde lon?

* **3:11 3:11** *kon di's re' Juan ngelo' plopa naro ndak Jesús lo Juan. Tiemp ya kote men yalyid xa' de we mena, sin' ya nka ti mos.*

¹⁵ Le' Jesús mkab:

—Ta' di's che' mod aka naya, tak nakin' lin' re jwan' nchola's Dios.

Zyara mxeyal Juan.

¹⁶ Nde sen' ngolo mbro'le Jesús, leja mbro'te Xa' len' nit, zyasa cho le' lo be' mxyal' nde mbwi' Jesús Xbin Dios ndala xaja paloma nde mblatoba yek Jesús.

¹⁷ Nde mbyen mni thi Xa' lo be' nchab:

—Xa' re' nak Xin' na jwan' nke' toz lazo'n, nde nale toz nzo nale lazo'n win' Xa'.

4

Maxu' nchola's tokil' Jesús

(Mr. 1:12-13; Lc. 4:1-13)

¹ Zyasa Mbi Nayon mbe' Jesús izyo nagan, sa tya tokil' Maxu' Jesús li Jesús jwan' nchola's Maxu'.

² Nde sen' ngolo mke Jesús yalse cho' wiz nde cho' yal', mzib mdyan' Xa'.

³ Zyasa ngwa Maxu' lo Jesús nde nchab Maxu':

—Tez nak la Xin' Dios, mnibe' sa yalal re ke re' pan.

⁴ Le' Jesús mkab lo Maxu':

—Lo xki's Dios nchab: "Nanakta ben'ta pan ban men, noga reta di's ndryo' ro Dios nda' yalnaban lo men".

⁵ Xisa mbe' Maxu' Jesús Jerusalén yez nayon, nde mbe' Maxu' Jesús ten' mas gap ndab yek yodo'

⁶ nde nchab Maxu' lo Jesús:

—Tez Xin' Dios nak la, gobi axta la ba, tak lo xki's Dios nchab:

"Dios nyebe' lo re anj chan' Dios sa kenap xa' la, lo ya' xa' tyenke' xa' lu,

sa na'chepta nia ke."

⁷ Zyasa Jesús mkab lo Maxu':

—Noga nchab lo xki's Dios: Na'tokil'ta la Xa' Nyebe' jwan' nak Dios la.

⁸ Nde tedib gob mbe' Maxu' Jesús ti yek yi' gap toz ndab, tya mblo' Maxu' reta yalnyebe' nzo lo izyo nde re yalxna chan' ne'y lo Jesús,

⁹ sa nchab Maxu':

—Reta jwan' re' tan loa, tez tyoxub la nde li naroa na.

¹⁰ Zyasa Jesús nchab lo Maxu':

—Baxa wa Maxu', tak lo xki's Dios nchab: "Lo Dios la Xa' Nyebe' loa tyoxub la, nde ben'ta lo Xa' lia sin'."

¹¹ Zyasa mbla' Maxu' Jesús, nde mbye'd pla anj mbla'sto Jesús.

Jesús ndobte rsin' Jesús

(Mr. 1:14-20; Lc. 4:14-15; 5:1-11; 6:17-19)

¹² Sen' mbin Jesús le' Juan nge lizyi'b, mbere Jesús lo xyon Galilea.

¹³ Per na'ngyan'ta Xa' Nazaret, le' Xa' nda ngo yez Capernaum, jwan' nax gax ro nitto', lo xyon Zabulón nde Neftalí.

¹⁴ Tamod sa ngok jwan' mke' xa' mbrid xki's Dios pola, ndole Isaías:

¹⁵ Izyon Zabulón nde izyon Neftalí,
ned nda thita ro nitto' tedib lad ro yo' Jordán,
xyon Galilea ten' nzo re xa' jwan' nanakta xa'
judío.

¹⁶ Re xa' ya nzi lo yal'kow nde mbwi' xa' ti xni toz,
nde re xa' jwan' nzola ro yalguj, ti xni toz mtoxni
lo xa'.

¹⁷ Xata zya ndobte Jesús, mda' Jesús xki's Dios lo men, nde nchab Xa':

—Bla' go' re jwan' narax nak go' nde bere go' lo Dios, tak yalnyebe' lo be' ndo gaxla.

¹⁸ Sen' nda Jesús tita ro nitto' Galilea, tya mbwi' Jesús chop xa' rop wes; tib xa' ndole Simón jwan' ndolega' Pedr, nde tedib xa' ndole Ndres. Nde nge gobi rop xa' yex lo nitto', tak xa' god mbel nak xa'.

¹⁹ Zyasa nchab Jesús lo xa':

—De' go' btonke go' xis na, sa lilal na go' men god, sa li go' gan men par Dios

²⁰ Nde rop xa' ya, zyaga mbla' xa' yex xa' nde mdonke xa' xis Jesús.

²¹ Zyasa Jesús mde ti tud, mbwi' Xa' ti chop xa' rop wes: Jakobo kon Juan xin' Zebedeo. Rop xa' ya kon xud xa' nzo lo bark nge ke'bde xa' yex xa'. Nde Jesús mbrez rop wes xa',

²² nde zyaga mbla' rop xa' bark nde mbla' xa' xud xa' nde mdonke xa' xis Jesús.

²³ Nde Jesús mkete dib Galilea, mkete lo' xa' xki's Dios lo men len' yo ten' ndyop xa' Israel. Mketete ta' Xa' re di's wen chan' yalnyebe' chan' Dios nde mtodan' Xa' men, lo re nak yis ndyak men nde reta nchow ndyak men.

²⁴ Tamod sa jwan' toz mxyob xki's Jesús dib xyon Siria, nde mbyedno xa' re men jwan' ndyak xa'xa' yis lo Jesús; re xa' ne ndyak lo re yis, re xa' ndob mbi, re xa' nzo mbi narax lazon', re xa' nke' mbiy yek na' nde re xa' nguj nin'. Nde Jesús mtodan' reta xa'.

²⁵ Zyasa bro toz xa' Galilea nde re si' yez nale Decápolis, xa' Jerusalen nde temas xa' nzo lo xyon

Judea nde re xa' nzo tedib lad ro yo' Jordán mdonke xis Jesús.

5

Jesús nda' xki's Dios yek yi'

(Lc. 6:20-23)

¹ Lo sen' mbwi' Jesús men toz tir mdyop, Jesús mdonke nda yek yi' nde mdob xa' tya. Zyasa re xin'te'd Jesús mbike gax lo Jesús,

² nde mdobte Jesús mblo' Xa' xki's Dios, nchab Xa':

³ —Nabe'z toz nda re men mne xa' nakin' xa' Dios, tak re xa' ya yote ten' nyebe' Dios.

⁴ Nabe'z toz nda re men jwan' nchon', tak re xa' ya ko nale Dios lazo' xa'.

⁵ Nabe'z toz nda re men nado' nak, tak re xa' ya kaya' izyo ak chan' xa'.

⁶ Nabe'z toz nda re men jwan' dib nzo lazon' nchalas wi' xa' jwan' gal' li Dios, tak re xa' ya nix yo lazon'.

⁷ Nabe'z toz nda re men jwan' nzo yalndlyat lazon', tak re xa' ya lyat lazo' Dios xa'.

⁸ Nabe'z toz nda re men ngenta jwan' narax lazon', tak re xa' ya twi'pa xa' Dios.

⁹ Nabe'z toz nda re men jwan' ndli sa nabe'z kwe re men, xa' ya kole Dios xin' Dios.

¹⁰ Nabe'z toz nda re men sen' ne ndyak xa', lo nchu'bla men xkap xa' kwent ndli xa' jwan' gal' lo Dios, xa' ya yote ten' nyebe' Dios.

¹¹ Nabe'z toz nda re go' sen', ni xin men xis go', nchu'bla men go' nde nke' xa' yalke yek go' re jwan' na'nakta go' kwent ndli lazo' go' na.

¹² Blyen go' nde nale blo lazo' go', tak naro toz jwan' li go' gan lo be'. Tak taga mchu'bla xa' re xa' mbrid xki's Dios pola.

Ted lo izyo

¹³ Go' nak xaja ted lo izyo. Per tez le' ted nanasigtay, ¿xamod ak nasiga tib gob sa li rsin men na? Ya na'litra' sin' na, koby xa'y nde tya tob ni men xis ney.

Xni lo izyo

¹⁴ 'Go' nak xaja xni lo izyo. Ti yez jwan' nzi yek yi' na'nyed kas loy.

¹⁵ Nek thib men nantobta xa' ti ki kandil nde tow xa' xibe' yek ney, che'la gap ntob xa'y sa toxniy lo re men nzo yo.

¹⁶ Taga' go', bli go' jwan' wen sa wi' re men jwan' ndli go', tamod ak go' xni lo xa', sa wen ni xa' xis Xud go' ndob lo be'.

Jesús ndlo' ley

¹⁷ 'Na'lid go' xgab ke le' na ndal sa kib na re ley mke' Moisés nde re jwan' mblo' re xa' mda' xki's Dios pola. Na'ndalta na sa kib nay, le'n ndal sa lin reta jwan' nchaba.

¹⁸ Nde gal' di's nin lo go', laja ben' nzi izyo nde be', nek tib punt nde nek thib letr lo ley na'rita axta kebe' ak reta jwan' ndablo ak.

¹⁹ Jwan' nasa xanya ti men na'xobyekta ti yal-nyebe' lud nge ni lo ley, nde taga' mod ndlo' xay lo xaga' men li mena, xa' ya lud tak lo yalnyebe' lo be'. Le' xa' jwan' nxobyeka nde taga ndlo' xa'y lo men, xa' ya ak xa' ndak toz ten' nyebe' Dios.

²⁰ Naya na ni lo go', tez nalid go' mas jwan' gal' ke lo re maestr nchak ley nde lo re xa' fariseo, na'lid go' gan yote go' lo yalnyebe' lo be'.

Jesús ndlo' jwan' nak yalnayi'
(Lc. 12:57-59)

²¹ 'Go' mne, Moisés nchab lo re xa' gox: "Naku-jta go' men, tez cho xa' kuj ta men xa', nchap xa' yalke, nde ya xa' liz yi'b."

²² Le' na ni lo go' tez cho xa' nayi' lo ta men xa', xa' ya nchap yalke nde ya xa' liz yi'b. Le' xa' jwan' nixin lo ta men xa', xa' ya yo xkena yolow. Nde xa' jwan' mbez lo ta men xa': ne yek la, xa' ya ya lo bel len' ye'r abil.

²³ Jwan' nasa tez ndenoa jwan' yon ta'a lo Dios, nde ten' nkaya' xa' yon tya nte'las la, nchap la yalke lo ta men la,

²⁴ bla' jwan' yon ta ndenoa ya lo ten' nkaya' xa' yon nde nerla wa tsal' di's lo ta men la, sera' yed la nde ta'a chan' la lo Dios.

²⁵ Tez le' xa' ndebeyonoa mbe' xa' la yolow, laja ndo rop go' ned pken ptoyal di's kon xa', sa na'ta'yad xa' la lo Juez. Nde tez na'tad lia, le' Juez ta'ya'a lo xa' nak sin' nde xa' nak sin' na' ke' xa' la lizyi'b.

²⁶ Nde nipa' na loa naryo'ted la tya axta kebe' kix la re nak jwan' ndab la.

Jesús ndlo' narax nak re xa' ngeteno xa' nakta sal' xa'

²⁷ 'Go' mne Moisés nchab lo re xa' gox: "Na'gaxnod go' xa' jwan' nanakta sal' go'."

28 Per na ni lo go' tez xanya ti xa' ngwi' lo ti ngol nanakta sal' xa' nde ndyabla's xa' gaxno xa' ngol, xa' ya ngoxnola xa' ngol len' lazo' xa'.

29 'Tez ngudlo ban la ndli nchab la lo jwan' narax, blotey nde blobiy, tak mas wen tya'b ti ngudloa ke dib la ya ye'r abil.

30 Nde tez ya' ban la ndli nchab la lo jwan' narax, bchoy nde blobiy, tak mas wen tya'b ti ya'a ke dib la ya ye'r abil.

Jesús ndlo' xa nak lo ndla' ta men

31 'Taga nchab Moisés pola:

"Tez cho xa' ndla' ngol' na', ndablo toxkwa' xa' ti yes jwan' ndej mbla' xa' ngol.

32 Per na ni lo go', xa' jwan' ndla' ngol na', tez nakte lo ngoxno ngol xaga mbi', che' ngechep xa' ngol li ngol yalke gaxno ngol xa'ga mbi'. Nde xa' jwan' nselya' kon ngol ta mbla' la mbi' ya, yalkega' naka lo xa'.

Narax nak tob ro men Dios lo ke'yek men ti jwan'

33 'Nde taga mne go' xa nchab Moisés lo re xa' gox pola: "Na'lat la lia re jwan' mke'yek la, che'la bli reta jwan' mke'yek la lo Dios."

34 Per na ni lo go', na'tobrod go' nek tib jwan' sen' nke'yek go' li go' ti jwan'. Na'tobrod go' be', tak tya ndob Dios.

35 Nek tobro go' izyo, tak tya ndob ni Dios, nek tobro go' Jerusalén, tak le'y nak yez chan' Rey ro.

³⁶ Neka yek la natobrot la, tak na'akta li nagat la o li nakis la nek tib yisyek la*.

³⁷ Sen' gab go' ti jwan', tez tli go'y, gab go' "liney" nde tez mne go' nalid go'y, gab go' "na'litney", tak tez tobro go' masra jwan', jwan' re' nde lo jwan' narax.

*Ke' lazo' men re xa' jwan' nakap nak lo men
(Lc. 6:27-36)*

³⁸ 'Go' mnela nchab Moisés pola: "Tez cho ti xa' ko' ngudlo ti men, noga xa' ya ryo' ti ngudlon', nde tez cho ti xa' gab ti kele men, noga xa' ya gab ti kelen'."

³⁹ Per na ni lo go': Na'aknayid go' lo xa' jwan' nayi' lo go', che'la tez cho ke'y kwat ban la, pta' tedib kwat la.

⁴⁰ Nde tez cho xa' nchallas yano xa' la yolow, sa kib xa' camis la, noga chamar la pta' lo xa'.

⁴¹ Tez cho xa' ndo nyebe' loa wea chan' xa' ti mil metr, be'y chop mil metr.

⁴² Nde cho xa' nyab jwan' loa, bta'y. Tez cho xa' nya'b prest loa, bkwan' na ka xa'.

⁴³ 'Taga mbin go' mbez men:

"Bke' lazo'a ta men la nde byi'no re xa' nayi' loa."

⁴⁴ Per na ni lo go': bke' lazo' go' re xa' jwan' nakap nak lo go', bliley' go' re xa' nixin xis go', naxut gok go' lo xa' nakap nak lo go' nde mna'b go' lo Dios por re xa' xkap ngetenke xis go'.

⁴⁵ Tamod sa ak go' xin' Xud go' ndob lo be', tak Xa' nda' xni lo men wen nde lo men xkap, nde ntel' Xa' yi lo men gal' ngete nde men narax ngete.

* **5:36 5:36** "tak na'akta li nagat la o li nakis la nek tib yisyek la." Di's re' toyala yen mena ti mod re: Nak na'akta li ye'n men lazo' men nde na'akta li gox men lazo' men.

⁴⁶ Per tez go' nke' lazo' go' ben'ta re xa' jwan' nke' lazon' go', ¿cho kwan li go' gan? Wi' go' nea, taga ndli re xa' jwan' nya'b tmi low.

⁴⁷ Nde tez ben'ta lo wes go' ni go' dyux lon', ngen kwan jwan' ro toz ngeli go', axta re xa' nanzolod Dios ndli jwan' na.

⁴⁸ Jwan' nasa gal' gok go', xa gal' nak Xud go' ndob lo be'.

6

Jesús ndlo' xamod ta' men gon

¹ Nda wi' go', sen' ndli go' jwan' wen, na'lid go'y sen' nzi wi' men, ben'ta sa wi' xa' jwan' ndli go'. Tak tez ta li go', Xud go' jwan' ndob lo be' na'tad Xa' lo go' jwan' mbli go' gan.

² Nde sen' nda' go' jwan' gon lo men prob, na'xopta go' di's lo re men jwan' mbli go', xa ndli re xa' bxa' nde xa' kwin' len' yo ten' ndyop xa' Israel nde re ten' ngete xa'. Tamod ndli xa' sa wen ni men xis xa', per na gal' di's nin, ngenoa xa' gan jwan' mbli xa' gan.

³ Le' lu sen' ta'a gon, nda wi'a sa na'nyed nek tib men jwan' ndlia.

⁴ Nagasta pta' jwan' gon, sa Xud la Dios ngwi' gon ta nagasta nda'a ya', sa nzi wi' re men ta Xa' jwan' mbli'a gan.

Jesús ndlo' xamod tadi'sno men Dios

(Lc. 11:2-4)

⁵ Nde sen' ndodi'snoa Dios, na'lid la xa ndli re xa' kwin' nde xa' bxa', tak xa' ya ndyen toz xa' tyoli xa' tadi'sno xa' Dios len' re yo ten' ndyop xa' Israel nde re ned ro ten' mas ndye men, sa wi'

men xa ndodi'sno xa' Dios. Na, gal' di's nin lo go', ya mblixa xa' gan jwan' nzal' xa'.

⁶ Per lu, sen' ndodi'snoa Dios, gote len' yo nde btow' ro yo nde nagasta ptodi'sno Xud la Dios, nde Xa' ngwi' lu ten' nagas ndoa, sa Xa' ta' jwan' mblyagan nzi wi' re men.

⁷ Nde sen' ndodi'snoa Dios na'nid la thipka di's lo Dios, xa ndli re xa' na'nzolod Dios, tak xa' ya ndli xgab lo ta disyatka ndo bez xa' lo Dios tonza Dios xki's xa'.

⁸ Nalid go' xa ndli re xa' ya, tak ben' tera nyab go' re jwan' nakin' go', Xud go' Dios mnela cho kwan nakin' go'.

⁹ Jwan' nasa che'mod todi'sno go' Dios:
Xud ná' Dios jwan' ndob lo be',
Nayon toz lea.

¹⁰ Ye'd yalnibe' chan' la.

Nde bli xa nchola's la, ta xa ndlia lo be' taga bli lo izyo re'.

¹¹ Jwan' nak la' ná' re wiz, bta'y na wiz.

¹² Nde pton' re xken ná', xa ntorid ná' yek ná' re jwan' narax ndli men lo ná'.

¹³ Na'tat la di's gab ná' lo re jwan' narax, che'la ptola' ná' lo re jwan' narax, tak chan' la nak yalnyebe', yalne nde yalnaro, dib adi'. Ta naka.

¹⁴ Tak tez torid go' yek go' re jwan' narax ndli men lo go', taga Xud go' ndob lo be' ton' Xa' re jwan' narax ndli go'.

¹⁵ Nde tez na'toridta go' yek go' re jwan' ndlino men go', taga Xud go' na'ton'ta Xa' xken go'.

Jesús ndlo' xamod li men yalse

¹⁶ Sen' ndli go' yalse, na'linabilta go' lo go' xa ndli re xa' kwin', tak re xa' ya tamod ndli xa' sa wi' re men nge xa' yalse. Gal' di's nin lo go', ya mbli la xa' gan jwan' nzal' xa'.

¹⁷ Nde lu, sen' ngea yalse, btach loa nde bku' yek la,

¹⁸ sa ngen cho men nye ngea yalse. Ben'ta Xud la jwan' ngwi' ta nagasta ngea yalse, sa Xa' ta' jwan' mblya gan nzi wi' re men.

Yalrik lo be'
(Lc. 12:32-34)

¹⁹ Nde na'thopta go' jwan' ntak toz lo izyo re', tak lo izyo re' ncha mbedxoy nde nchas yotoy, nde re xa' wan' li wan' na.

²⁰ Mas jwin' blotsa' go'y lo be', tya natatid mbedxoy nde neka gas yotoy nde tya nawewan'ta wan' na.

²¹ Tak plo ten' ngosa' go' jwan' ntak toz lo go', tya ndob lazo' go'.

Jwan' toxni lo men
(Lc. 12:32-34)

²² Ngud lo men nak xaja ti xni toxni lo men, nde tez wen ngudloa, nawe nani dib ben la,

²³ per tez ngudloa ngosa'y dib ben la nzo lo yalkow. Tez ndlyabe nakow nya na'nchonid ngudloa, jmarka yal'kow mas ana'yoni ngudloa!

Dios nde yalrik
(Lc. 16:13)

²⁴ Nek tib mos na'lid gan ke sin' lo chop xa' nak xwan' sin', tak wen nchan' mos lo tib xa' nde narax nchan' mos lo tedib xa', o ke' lazo' mos ti xa'

nde kotal mos tedib xa'. Na'lid go' gan li go' sin' lo Dios nde nyalo go' yalrik.

Na'lid go' xgab xa ban go'
(Lc. 12:22-31)

²⁵ Jwan' nasa nin lo go': Na'lid go' xgab xa ban go', nek kwan wa go' o neka kwan' gu go'. Nek lar gok go' lid go' xgab. Mas ntak yalnaban lo yalwa nde mas ntak dib ben go' lo lar.

²⁶ Wi' go' nea, re mbin ta ngete xobi ba, nangod ma' bin, neka nthop ma' kosech, nde nangosa'd ma' jwan' ncha ma', nde Xud go' jwan' ndob lo be' nda' jwan' ncha ma'. ¡Mbay na, go' mas ntak ke lo re mbin na!

²⁷ ¿Nde cho ti go' ba li gan xyen tud, lo ndli toz go' xgab?

²⁸ ¿Kwan liy sa ndli go' xgab lar gok go'? Wi' go' nea, re ye' nzo wan na, xa nxyen na, nde nankedey sin' ne'ka ndoxkwa'y xab ney.

²⁹ Per na ni lo go' nek rey Salomón na'mblid xa' gan ndokwa' xa' xaja ti ye' ba, tenye plopa re jwan' ntak mkeno xa'.

³⁰ Tez Dios ndli ta nawe toz nya re ye' nzo wan na, naya nawe nyay nde ye' yoy lo ki yola, ¡cho letla go' masra jwan' ta' Dios gok go', per go' na'ndlid lazo' go' Dios dib nzo lazo' go'!

³¹ Jwan' nasa nalid go' xgab nde na'gabta go': "¿Cho kwan wan'? o ¿Cho kwan gun'? o ¿Ma lar gok na'?"

³² Tak re xa' jwan' na'nzolod Dios ngetenke xa' xis re jwan' na, per Xud go' Dios ndob lo be' mnea Xa' ta nakin' go' reta jwan' na.

³³ Per nerla pkwan' go' yalnyebe' chan' Dios nde xamod gal' ak go' lo Dios, zyasa Dios ta' reta jwan' na lo go'.

³⁴ Jwan' nasa na'lid go' xgab jwan' nakin' go' ye', tak wiz ye' nzola re jwan' li men xgab. Reta wiz nzo toz jwan' li men xgab.

7

Na'koxyod go' men

(Lc. 6:37-38,41-42)

¹ Na'koxyod go' men, sa na'nyabta Dios kwent lo go'.

² Tak xa ngoxyo go' men, mod yaga nyab Dios kwent lo go', nde xa ndlino go' men, taga yate go'.

³ ¿Kwan liy sa ngwi'a yix lud nzo ngudlo ta men la, nde nangwi'd la ya ro nzo ngudloa?

⁴ ¿Nde xamod gab la lo ta men la: "Pta' di's go'ten yix lud ta nzo ngudloa ba", nde le' ngudloa nzo ti ya ro?

⁵ ¡Men kwin'! nerla blote ya ro nzo ngudloa, sa nawe wi'a, sera toyal ko'a yix nzo ngudlo ta men la.

⁶ Nata'd go' re jwan' nayon lo mbak, tak yoloba naxgo' mbak lad go', nekla re jwan' ntak toz,* na'kobid go'y lo nguch, tak tyob ni ma' xis ne'y.

Nyab men jwan' lo Dios

(Lc. 11:9-13; 6:31)

⁷ Mnab go'y nde Dios ta'y, pkwan' go'y nde tsal go'y, mni go' sa xal' xa' ro yo.

* **7:6 7:6** jwan' ndak toz dixtil "perla" nak tib ned ke ndak toz.

⁸ Tak reta men jwan' nyaba, nda' Xa'y, nde cho ndryal tsal la, xa' ni txal' ro yo lo xa'.

⁹ ¿Cho ti go' ba, tez nyab thi xin' go' thi pan lo go', cho ti ke ta' go' lo or?

¹⁰ ¿O tez nya'b or ti mbel lo xa', cho ti mbel' ta' xa' lo or?

¹¹ Te'nye men narax nak go', nchak nda' go' jwan' wen lo xin' go', ¡chole'ta Xud go' jwan' ndob lo be', Xa' ta' re jwan' wen, lo re go' jwan' nya'ba lo Xa'!

¹² Tamod sa, reta jwan' nchola's go' li men lo go', taga mod bli go'y lo re men, tak jwan' re' nchab lo ley Moisés nde lo yes mke' re xa' mbrid xki's Dios pola.

Yala naya
(Lc. 13:24)

¹³ Gote go' ten' ndo yala naya. Tak naxen yala nde naro ned nda ten' nzo yalguj, nde men toz nchote ned ya.

¹⁴ Per naya yala nde ne rid men ned jwan' nche' men lo yalnaban, nde lud men nchasala.

Ngud nke lo ya ndlibe' men cho yay
(Lc. 6:43-44)

¹⁵ Pkenap lazo' go' lo re xa' kwin', jwan' mbez nda' xki's Dios, nde sen' nde xa' lo go', nado' nya xa', xaja mbakxil' la, per len' lazo' xa' nak xa' xaja lob lusle ba.

¹⁶ Tak lo re jwan' ndli xa', yolo go' xa'. Wi' go' nea, nanthopta men uv lo re lus yist, neka nthop men hig lo ya yis.

¹⁷ Nde reta ya wen, ngud wen nda'y, per le' re ya jwan' nda' ngud mbye'd, ben'ta ngud mbye'd nda'y.

¹⁸ Re ya jwan' nda' ngud wen na'nda'de ngud mbye'd, neka re ya jwan' nda' ngud mbyed na'ndade ngud wen.

¹⁹ Le' reta ya jwan' nandad ngud wen, xchoy nde yoy lo ki.

²⁰ Jwan' nasa, bwi' go' re jwan' ndli xa', tamod sa nye go', cho men xa'.

Nek lud nanzolod na go'

(Lc. 13:25-27)

²¹ Nakta re men, jwan' mbez lon, Xa' Nyebe', yote ten' nyebe' Dios lo be', ben'ta re men jwan' ndli re jwan' ncholas Xud na ndob lo be', men ya yote tya.

²² Sen' sin wiz ya, bro toz men nye lon: Xa' Nyebe', Xa' Nyebe', kon lea mda' ná' xki's la, nde por lea mblote ná' re mbi narax, nde por lea mbli ná' bro toz re yalnaro.

²³ Zyasa gab na lo re xa' ya: "Nambyolotirta na go', baxa wa re go' ta ndli jwan' naraxa."

Chop ned yo

(Lc. 6:46-49)

²⁴ Tamod sa, tez cho xa' nchon re di's re' nde ndli xa'y, lilal na xa', xaja ti mbi' nzo xgab yek na', jwan' mta' liz na' xis ke.

²⁵ Tak sen' mbla yi toz, mxyen re yo', mxyob mbi toz nde mbrid reta jwan' na xis yo ya. Per na'ngyubtey tak xis ke nzo xan' ney.

²⁶ Mbay re men nchon xki's na, nde nandlid xa'y, xa' ya lilal na xaja ti mbi' ngenta xgab yek na', jwan' mta' liz na' lo yux.

²⁷ Tak sen' mbla yi toz, mxyen re yo', mxyob mbi toz nde mbrid reta jwan' na xis yo ya. jMbyuba, nde jwan' toz ngotey!

²⁸ Sen' ngolo mda' Jesús re di's ya, reta men nzoyen xa' re jwan' mblo' Jesús,

²⁹ tak ndlo' Xa'y xaja men ngeno yalnyebe', nandlo'd Xa'y xaja ndlo' re maestr nchak ley.

8

Jesus ntodan' ti xa' ndyak ye'sya's

(Mr. 1:40-45; Lc. 5:12-16)

¹ Sen' mbere Jesús lo ta ngwa Jesús yek yi' ya, men toz tir ndenke xis Xa'.

² Zyasa mbike thi mbi' ndyak ye'sya's, nde mdoxub xa' lo Jesús nchab xa:

—Xa' Nyebe', Nya'b na loa todan' na, lu toyal liy tez nchola's la li ley.

³ Jesús mtoga' yan' mbwal xa' men yisa, nde nchab Jesús lo xa':

—Ncholas na dyan' la. Gok nadan'.

Nde zyaga, mdyan' xa' lo yis ya.

⁴ Nde nchab Jesús lo xa':

—Wi' nea, ngen cho lo gab la jwan' re', ben'ta wa lo xa' nak nglwey' sa wi' xa' lu, nde wano gon jwan' mnibe' Moisés, sa nye re nglwey' mdyan' la lu lo yis ndyak la.

Jesús mtodan' ti mos xa' nyebe' lo sondad

(Lc. 7:1-10)

⁵ Sen' ngote Jesús len' yez Capernaum, mbike ti xa' nyebe' lo tib ayo' sondad Roman nde mna'b xa' lo Jesús,

⁶ nchab xa':

—Xa' nybe', ti mos na nax lo yis liz na, nguj ti ble xa' nde jwan' toz tir nchow xa'.

⁷ Nde Jesús mkab lo xa':

—Ndan liz la, sa todan' na xa'.

⁸ Le' xa' nyebe' lo sondad nchab lo Jesús:

—Señor, nansal'ta na yotea len' liz na, ben'ta mnibe' lo yis, sa dyan' mos na.

⁹ Tak noga na, nzo xa' nyebe' lon, nde ngenon re sondad jwan' nyebe'n lon'. Sen' gab na lo thi xa', wa, xa' ya nda; nde lo tib xa' gab na, de', xa' ya nde; nde lo mos na nyebe'n bli jwan' re', nde ndli xa'y.

¹⁰ Sen' mbin Jesús jwan' na, nzoyen toz Xa' nde nchab Xa' lo re men ta ndenke xis Xa':

—Lipa nin lo go', tera zyal na nek tib xa' Israel, ndli lazon' xaja ndli lazo' mbi' re'.

¹¹ Nde na ni lo go', men toz ryo' ned nche'dke wiz nde ned ncha'd wiz, yo xa' lo yalwa xij Abraham, xij Isaac nde xij Jakob lo yalnyebe' lo be'.

¹² Le' re xa' jwan' mkwe'z ta ndablo yote lo yalnyebe', re xa' ya kobi Xa' le lo yal'kow, nde tya gon xa' nde tyez le xa'.

¹³ Zyasa nchab Jesús lo xa' nyebe' lo sondad:

—Bya liz la, nde ak jwan' mna'b la xata mbli lazo'a.

Nde hor yaga mdyan' mos xa'.

*Jesús mtodan' xna'sap Pedr
(Mr. 1:29-34; Lc. 4:38-41)*

¹⁴ Sen' ngote Jesús liz Pedr, nde tya mbwi Jesús, le' xna'sap Pedr nax nzo xlye.

¹⁵ Zyasa mbwal Jesús ya' xa', nde mbro' xlye xa', ngoche' xa' nde mbli xa' sin' lo Jesús.

¹⁶ Lo sen' mbala yal', mbye'dno re men na'r toz re xa' nzo mbi narax; zyasa mnibe' Jesús lo reta mbi narax nde mbro'tey, taga mtodan' Jesús reta xa' nayiz.

¹⁷ Tamod sa ngok jwan' mke' xa' mbrid xki's Dios pola ndole Isaías: "Le' xa' mkib re nchow lad na' nde mbe' xa' reta yis ndyak na'."*

Re xa' jwan' nchola's tyonke xis Jesús

¹⁸ Lo sen' mne Jesús men toz mdyop ten' ndo Jesús, mnibe' Jesús lo re xin'te'd Xa', sa ya xa' tedib lad ro nitto'.

¹⁹ Zyasa mbyed thi maestr lo ley xki's Dios, nde nchab xa' lo Jesús:

—Maestr, ncholas na tyonke'n xis la one ploja ndaa.

²⁰ Nde Jesús mkab lo xa':

—Re mbe'd ngeno ye'r plo ncho ma', nde re mbin ngeno ma' lye'd ma', le' Xin' Mbi' nankenod Xa' lizpa Xa'.

²¹ Le' tedib xa', xa' jwan' nak xin'te'd Jesús nchab lo Jesús:

—Xa' Nyebe', ta' di's, nerla ka's na xud na.

²² Le' Jesús mkab lo xa':

* **8:17 8:17** Isaías 53:4

—Ptonke xis na, nde bla' re xa' nguja ka's xa' ta nguj xa'†.

Jesús mbli ngota'b thi yalnathoz

(Mr. 4:35-41; Lc. 8:22-25)

²³ Nde ngwap Jesús lo bark, nde reta xin'te'd Xa' mdonke xis Xa'.

²⁴ Zyasa mbro' thi mbi toz mxyob lo nitto', nde re bde lo nitto' mdoliy axta nko'ta dib bark, laja le' Jesús naxyat.

²⁵ Zyasa ngwa re xin'te'd Jesús ngolo' xkal' xa' Jesús nde nchab xa':

—¡Señor, tola' na'! ¡Tak le' na' lux!

²⁶ Le' Jesús mkab lo re xa':

—¿Cho kwan liy nzyeb go'? ¡Lud toz ndli lazo' go' Dios!

Ngolo nchab Xa' jwan' na, ngoche Xa' nde mnibe' Xa' lo mbi nde lo nitto' sa kwexey, nde xej mbrexe rey.

²⁷ Nde re mbi' ya nzoyen xa' nde nchab xa':

—¿Cho mbi' re', sa axta re mbi nde nitto' nxobyeka Xa'?

Chop xa' nzo mbi narax yez Gadara

(Mr. 5:1-20; Lc. 8:26-39)

²⁸ Sen' lo mzin Jesús tedib lad ro nitto', lo xyon xa' Gadara, tya xij re ba' mbro' chop mbi' nzo mbi narax, nde mbike xa' gax lo Jesús. Rop xa' ya nayi' toz xa', jwan nasa ngencho li gan ridndab ned ya.

²⁹ Nde tolo mbrezyaj xa' nchab xa':

† 8:22 8:22 xa' nguja ka's xa' ta nguj xa' Di's re nak: re xa' jwan' naban na per nandlid lazo' xa' Dios, xa' ya ka's men jwan' ta liga ngujpa ya. Nde nakte jwan' re' tyen men sa tiptane la' men ta men.

— ¿Cho kwan ndyak noa ná', Jesús Xin' Dios?
¿Cho se nde totia ná' nde tera gal be'y?

³⁰ Nde tij tya nzi bro toz nguch jwan' nzi kenap xa'.

³¹ Nde le' re mbi naraxa, mnaba lo Jesús, nchaba:

— Tez kotea ná', ta' di's lya ná' len' re nguch ta nzi ba.

³² Jesús mkab:

—Wa go'.

Le' re mbi narax mbro'te len' rop mbi' ya nde mblay len' re nguch, zyasa re nguch zyaga mbixndab re ma' yek ble, ngob ma' len' nitto' nde nguj re ma'.

³³ Le' re men ngenap nguch mxon' xa', ndya xa' yez, lo sen' mzin xa' yez mdej xa' reta jwan' ngote re nguch, nde re jwan' ngote rop mbi' ya.

³⁴ Zyasa reta men yez ya, ngwa xa' plo ndo Jesús, lo mbwi' xa' Jesús, mnab xa' lo Jesús, sa ryo'te Jesús lo xyon xa'.

9

Jesús ntodan' thi xa' bde

(Mr. 2:1-12; Lc. 5:17-26)

¹ Zyasa, Jesús ngwap lo bark nde mbere Xa' tedib lad ro nitto' ten' nzo Xa'.

² Tya ngwano men thi xa' nguj tible xa' lo Jesús nzo'b xa' thi lo lon'. Lo sen' mne Jesús plopa ndli lazo' re xa' ya Dios, Jesús nchab lo xa' bde ya:

—Blo ne lazo'a, xin' na, le' re xken la mdyon'la.

³ Zyasa pla maestr nchak ley mbli xa' xgab: “Nixin mbi' re' xis Dios”.

⁴ Le' Jesús mnela cho xgab mbli re maestr ya, nde nchab Jesús: ¿Kwan liy ndli go' xgab narax len' lazo' go'?

⁵ Btej go' lon: ¿kwan' mas nambi gab na lo xa'? ¿Le' re xken la mdyon' la o mas nambi gab men mdyan' la lu?

⁶ Naya, lo'n lo go', le' Xin' Mbi' nkeno yalnyebe' sa ton' Xa' re xken men lo izyo re', bwi' go' nea.

Zyasa nchab Jesús lo xa' bde ya:

—Goche, bxen lon' la, nde bya liz la.

⁷ Zyasa xa' bde ya mdoli xa' nde ndya xa' liz xa'.

⁸ Lo mbwi' re men jwan' na, jwan' toz nzoyen xa', nde mni xa' di's wen lo Dios, tak mda' Dios yalne ro lo ti mbi'.

Jesús mbrez Mateo

(Mr. 2:13-17; Lc. 5:27-32)

⁹ Tya mbro' Jesús, nde sen' ndo Xa' ned, mbwi' Xa' ndob thi mbi' ndole Mateo ten' nthop xa' tmi low. Mbi' ya nthop tmi low nchax lo Rom nde nchab Xa' lo mbi':

—Ptonke xis na.

Zyasa Mateo mdoli nde mdonke xa' xis Jesús.

¹⁰ Nde sen' ndobya Jesús kon re xin'te'd Xa' liz Mateo, tya mzin nar xa' nthop tmi low nchax lo Rom nde nar xa' nzo'b xken na', mdob ro mes kon Jesus.

¹¹ Nde lo mbwi' re xa' fariseo jwan' na, mnabdi's xa' lo re xin'te'd Jesús:

—¿Cho kwan liy nchano maestr go' re xa' nthop tmi nde re xa' nzo'b xken na'?

¹² Lo mbin Jesús jwan' na, nchab Jesús lo re xa' ya:

— Re xa' nadan' nanakin'ta xa' doktor, ben'ta re xa' nayiz nakin' doktor.

¹³ Bya go' nde byen go' cho kwan nak di's re': "Yalndlat lazo' ncholas na, nancholasta na kuj go' ma' ta' go' lon" Tak nandalta na sa bez na re xa' gal' ndo, le'n ndal sa bez na re xa' nzo'b xken na, sa la' xa' re jwan' narax.

Nyabdi's xa' lo Jesús xomod nak yalse

(Mr. 2:18-22; Lc. 5:33-39)

¹⁴ Zyasa re xin'te'd Juan mbike lo Jesús, nde mnabdi's xa':

—¿Cho kwan liy sa re xin'te'd la nandlid xa' yalse? nde re ná' nde re xa' fariseo jwan' toz ndli ná'y,

¹⁵ Jesús mkab lo xa':

—¿Cho toyal yo nabil lazo' re men jwan' nzi lo yalselya', laja mbyo ndoselya' ndo xij xa'? Per sin thi wiz we xa' mbyo ta mselya' ya, zyasa li re xa' yalse.

¹⁶ Ngen cho nkebde thi ble lar kub, lad thi lar gox, tak le' lar kub ndyopa nde ncheda lar gox, zyasa che' masra nched ten' mkebde lar kuba.

¹⁷ Neka ngo men bin kub len' yid gox, tak tez ko mena len' yid gox, ncheda yid nde nxyo bin kub, nde le' yid ndyro'tal. Jwan' nasa ndablo ko men bin kub len' yid kub tamod sa ropa bro xeka.

Xin' got Jairo kon ngol mbwal ro xab Jesús

(Mr. 5:21-43; Lc. 8:40-56)

¹⁸ Laja Jesús ndotej jwan' na lo re men, thi xa' nyebe' len' yo ten' ndyop men Judío, mzin xa' nde mdoxub xa' axta mdin' lo xa' izyo lo Jesús, nde nchab xa':

— Xin' got na ngolo nguj, per tez lu ye'd la nde xob la ya'a xis or, tro'xban or.

¹⁹ Le' Jesús mdoli nde ngwanke Jesús xis mbi' ya kon re xin'te'd Jesús.

²⁰ Zyasa thi ngol ndyak yis ndlyaj ren, ndatea tib sen lin' na'yatabta yis ren lo xa', mbike gax xa' xis Jesús nde mbwal xa' ro xab Jesús,

²¹ tak mbli ngol xgab: “Ben'ta gal na ro xab Xa', le' na dyan'.”

²² Nde Jesús mbyek, mbwi' Xa' lo ngol, nde nchab Xa':

—Blo ne lazo'a, xin' got na, kwent ndli lazo'a, jwan' na mdyan' la. Nde zyaga mdyan' ngol.

²³ Sen' mzin Jesús liz mbi' ya, nde mbwi' Jesús nzi re xa' nke' di yek men nguj*, nde re xa' jwan' nzi yon' yek or nguja,

²⁴ zyasa nchab Jesús lo re xa' ya:

—Bro'te go, tak nangujta mza', le' mza' naxyat. Zyasa mxino re men Jesús.

²⁵ Per sen' ngolo mbro'te re men ya, Jesús ngote len' yo, nde mxen Jesús ya' mza', nde ngoche mza'.

²⁶ Nde jwan' na mxyobdi's dib izyo ya.

Jesús ntodan' chop xa' nkow lon'

²⁷ Sen' lo mbro'te Jesús tya, chop xa' syeg mdonke xis Jesús, nde mbrez yaj xa' nchab xa':

—¡Blat lazo'a ná', Xa' nde lo bin David!

²⁸ Sen' ngote Jesús len' yo, rop xa' nkow lon' ya mbike gax lo Jesús, nde mnabdi's Jesús lo xa':

—¿Cho tlin gan lin jwan' re' ndyak go'?

Le' rop xa' ya mkab:

* **9:23 9:23** xa' nke' di yek re xa' nguj Xa' nke' flaut yek re men nguj.

—Tlia gan Señor.

²⁹ Zyasa Jesús mbwal ngudlo rop xa' nde nchab Jesús:

—Xa ndli lazo' go' ta ak jwan' mnab go'.

³⁰ Nde mxyal' ngudlo rop xa' ya. Zyasa Jesús mna'b toz lo rop xa' ya nchab Jesús:

—Nda wi' toz go' sa ngen cho nye jwan' re'.

³¹ Per ben'ta ngolo mbro' rop xa' tya, tolo mdej xa'y lo re men nzo dib izyo ya jwan' mbli Jesús.

Jesús ntodan' thi xa' ngup

³² Laja ndoyo rop xa' ta mxyal' lon' ya ned, mzin tib pla men ndeno thi xa' ngup nzo mbi narax lo Jesús.

³³ Nde sen' mblo'te Jesús mbi narax le'n lazo' xa' ngupa, le' xa' mdobte mdodi's. Nde re men nzoyen xa' nde nchab xa':

—Tera wi' tir men thi jwan' taba dib Israel.

³⁴ Mbay re xa' fariseo nchab:

—Mbi' re' ngote re mbi narax, tak xa' jwan' nyebe' lo re mbi narax, nda' yalne lo xa'.

Jesús ndlat lazon' re men

³⁵ Jesús mkete re yez ro nde re ranch. Mketelo' Xa' xki's Dios len' re yo ten' ndyop xa' Israel nde mda' Xa' di's wen chan' yalnyebe' chan' Dios lo re men. Nde mtodan' Xa' men lo re nak yis nde re nak yis nchow jwan' ndyak men.

³⁶ Lo sen' mbwi' Jesús men toz tira, mblat lazo' Jesús xa' tak nzi xa' xaja nzi mbakxil' ptyab nde nalat ndyak na'ngen cho ngenap.

³⁷ Zyasa nchab Jesús lo re xin'te'd Jesús:

—Gal' di's, bro toz kosech, per lud xa' jwan' nge sin' lo ne'y.

³⁸ Jwan' nasa mna'b go' lo Xa' nak xwan' kosech sa tel' Xa' men ke sin' lo kosech Xa'.

10

Jesús mblí tib sen Apost
(Mr. 3:13-19; Lc. 6:12-16)

¹ Zyasa mbrez Jesús re thib sen xin'te'd Xa', nde mda' Jesús yalnyebe' lo re xa', sa ko'te xa' re mbi narax nde todan' xa' re ned yis nde re ned nchow jwan' ndyak men.

² Nde chemod ndole re thib sen apost: nerla, Simón, jwan' ndolega Pedr, nde wes xa' ndole Ndres, nde Santyag kon Juan xin' Zebedeo,

³ Blib, Bartolomé, Max, Mateo xa' ndli kobral tmi low, Jakob xin' Alfeo, Lebeo ndolega Tadeo,

⁴ Simón xa' nzo xij partid kananist, nde kon Judas Iscariote, xa' ta mdaya' Jesús.

Jesús mtel' re thib sen xin'te'd Xa'
(Mr. 6:7-13; Lc. 9:1-6)

⁵ Re tib sen xa' re' mtel' Jesús nde mnibe' Jesús lo xa':

—Na'yad go' re ten' nzo re xa' nanakta xa' judio, nde na'yoted go' re yez xa' Samaria.

⁶ Che'la, nerla wa go' lo xa' Israel jwan' nak xaja re mbakxil' ngetetab,

⁷ wa go' nde pta' go' kwent, le' yalnyebe' lo be' ndo sin gaxla.

⁸ Ptodan' go' re xa' nayiz, ptoban go' re xa' nguj, ptodan' go' re xa' ndyak ye'sya's, blo'te go' re mbi

narax jwan' nzo lazo' men. Tata mkaya' go' jwan' re', nde tata abli go'y lo re men.

⁹ Na'wed go' tmi sen' nda go', nek tmi or, nek tmi plat, neka tmi cobr,

¹⁰ nde na'wed go' jwan' wa go' ned, na'wed go' chop ned lar, nek chop ned yalyid, neka yaga, tak xa' nge sin' nzal' xa' ta' men re jwan' nakin' xa'.

¹¹ Nde sen' sin go' thi yez o thi ranch, kwan' go' thib liz men nabe'z nak nde liz xa' ya yo go' dibta kwed go', axta kebe' yo go' ned.

¹² Lo sen' sin go' liz xa', mni go' dyux lo re xa' nzo yo.

¹³ Nde tez xa' nzo yo ya nzal' xa' yalnabe'z, yan' na lo xa' nde tez nanzal'ta xay, nayantey lo xa'.

¹⁴ Nde tez cho xa' na'tad yo kwed go' nde nagonta xa' xki's go', bro'te go' yez ya o yo ya, nde bzib go' yothi' ni go', sa lo' na'ngonta xa' xki's go'.

¹⁵ Nipa na lo go', sen' sin wiz nyab Dios kwent lo re men, ludxa pen ya re men yez Sodoma nde yez Gomorra, ke yez ta na'ngonta xki's go' ya.

Chu'bla men go'

¹⁶ Wi' go' nea, na tel' go', xaja mbakxil' xij re lob. Jwan' nasa, nalas pkete go' xaja mbel' la, nde nado' gok go' xaja palom ma.

¹⁷ Nda wi' toz go' tak re men taya' xa' go' lo re xa' nak sin', nde kin xa' go' len' re yo ten' ndyop xa' Israel.

¹⁸ Nde we xa' go' lo gobernador nde lo re xa' nak rey kwent chan' na, tamod sa tej go' xki's na lo re xa' ya nde lo re xa' jwan' nanakta xa' judio.

¹⁹ Per sen' taya' xa' go' lo re xa' nak sin', nalid go' xgab cho kwan gab go' nde xamod gab go'y,

tak sen' sin hor ya, Dios ta' re di's jwan' ndablo gab go'.

²⁰ Tak nanakta go' jwan' ni, Xbin Xud go' Dios ni, Xa' lirsin' ro go'.

²¹ Re men taya' xa' le'ga le' wes xa' lo yalguj, nde le'ga le' re xud re mdyen' taya' xa' mdyen', nde re mdyen' taya' mdyen' xud mdyen' nde xna' mdyen' sa kuj xa' xa'.

²² Nde re men gi'no xa' go' kwent chan' na, per xa' tibra ne ndo axta lulka, xa' ya lya'.

²³ Sen' chobla xa' go' yez re', bxon' go' wa go' tedib yez. Nipa na lo go' tera yolo ketexon' go' reta yez nzi Israel sen' ye'd Xin' Mbi'.

²⁴ Nek thib xin'te'd maestr mas ntak lo maestr, nde nek thib mos mas ntak lo xwan' mos.

²⁵ Xin' te'd maestr le'ja ak xa' xaja maestr, nde le' mos leja ak xa' xaja xwan' xa'. Tez xud mdyen' mblole xa', Beelzebú, ¿cho leta mdyen', plopa kole xa' re mdyen'?

*Cho ndablo seb lazo' men
(Lc. 12:2-9)*

²⁶ Jwan' nasa, nazyebta go' re xa' ya. Tak reta jwan' naga's nzo, le'y trotega lo xni, nde re jwan' nkas men ley troxobka.

²⁷ Jwan' nin lo go' ten' nakow, ptej goy lo xni, nde re jwan' naga'sta ngetej na lo go', wap go' re yek yo nde ne ptej go'y.

²⁸ Na'zyebta go' re xa' nguj men, tak ben'ta bel' nguj xa', na'akta lux xa' xbin men, mas bzeb lazo' go' Xa' jwan' tak lux bel' men nde xbin men len' ye'r abil.

29 ¿Plopa ndak chop mbyin bix? benta ti tmi lud ndak ma' Per nek thib mbyin bixa nachajta tez Xud go' Dios nata'd di's gaj ma'.

30 Taga axta re yis yek go' nagaba lad yek go'.

31 Jwan' nasa na'zyebta go', tak mas ndak go' ke tib byox mbin bixa.

32 Reta men jwan' gab, nzolo xa' na lo re men, noga na gab nzolon xa' lo Xud na ndob lo be'.

33 Per men jwan' gab na nanzolod xa' na lo re men, noga na gab nanzolod na xa' lo xud na ndob lo be'.

Ak rol re men kwent chan' Jesús

(Lc. 12:49-53; 14:26-27)

34 Nalid go' xgab ke le' na ndalno yalnabe'z lo izyo, nandalnot na yalnabe'z le'n ndal sa ak rol men.

35 Le' mbi' yo kon xud mbi', nde mdyen' got yo kon xna' mdyen', nde ngol yo kon xnayi' ngol,

36 Nde le'ga le' re xa' len' lis xa' ak xa' ke byo kon xa'.

37 Men jwan' mas nke' lazon' xud na' o xnan' ke na, nanzal'ta xa' ak xa' men na, nde men jwan' mas nke' lazon' xin' bi' na' o xin' got na' ke na, nanzal'ta xa' ak xa' men na.

38 Tez cho xa' ndyonke xis na, nde nancholasta xa' rid xa' yalti, nanzal'ta xa' ak xa' men na.

39 Xa' jwan' nanchola'sta gaj lo izyo re' xa' ya gaj, le' xa' jwan' nanzyebta gaj por kwent chan' na, xa' ya tibane ban.

Re jwan' li men gan

(Mr. 9:41)

⁴⁰ Xa' jwan' nda' liz na' kwed go', lon nda' xa' yo kwed na, nde xa' jwan' nda' liz na' mbed na, xa' ya nda' liz na' mbed Xa' jwan' mtel' na.

⁴¹ Xa' jwan' nda' yo mbed ti profet, kwent nak xa' profet, xapa jwan' ka profet ya, yapa jwan' kaya' xa' ya, nde xa' jwan' nda' yo kwed ti xa' gal' ndo, kwent gal' ndo xa', xapa jwan' ka xa' gal' ndo ya, yapa jwan' kaya' xa' ya.

⁴² Nde xa' nya ti men ta' ti bas nit nal gu xa' jwan' mas lud ntak, por lo nak xa' xin'te'd na, nipa na lo go' ya ngenoa xa' jwan' li xa' gan.

11

Re xa' mtel' Juan Ngole Men (Lc. 7:18-35)

¹ Sen' mne mdej Jesús lo re thib sen xin'te'd Jesús re jwan' ndablo xa' li xa', mbro' Xa' nda Xa' tedib lad, nda lo' Xa' nde nda tej Xa' xki's Dios lo re yez nzi dib tya.

² Nde sen' nge Juan ngole men na, liz yi'b, mbin Juan reta jwan' ndli Crist. Zyasa mtel' Juan chop xin'te'd Juan lo Jesús,

³ sa nyab di's xa':

—¿Cha lu nak' xa' jwan' ndablo yed o kwed ná' tedib xa'?

⁴ Le' Jesús mkab lo xa':

—Bya go' nde ptej go' lo Juan reta jwan' ndowi' go' nde reta jwan' ta ndoyon go'.

⁵ Re xa' nkow lon', re xa' ngob nin' gal' ndye xa', re xa' ndyak ye'sya's mdyan' xa', re xa' nkwe' mxyal' nza xa', re xa' nguj nryo'xban, nde re xa' prob nchaj xki's Dios lo xa'.

⁶ Nde nabe'z toz nda re xa' jwan' nandyola'sta nde nandlad xa' na.

⁷ Laja ngo re xa' ya ned, Jesús tolo mda' kwent chan' Juan lo re men nchab Jesús:

—Sen' ngwa go' izyo nagan ¿Cho kwan ngwa wi' go'? ¿Cho ben'ta thi yi jwan' lada lada ntek mbi?

⁸ ¿O cho ngwa wi' go'? ¿Cho thi xa' nok lar wena? Mne go' ke, re xa' nchok lar wen, nzo re lis re rey.

⁹ Per, ¿cho ngwa wi' go'? ¿Cho thi profet ngwa wi' go'? Lipa nin lo go', thi profet ngwa wi' go', nde xa' nak mas ke thi profet.

¹⁰ Tak Juan re' ngetej xki's Dios ta nchab:

"Na, tel' thi xa' ta' xki's na kwiblo loa, sa le' xa' toxkwa' xned la."

¹¹ Na ni lo go', xij reta mbi' ngol xis izyo re', tera' yo thi profet mas ntak lo Juan, per xa' jwan' mas lud ntak ten' nyebe' Dios, xa' ya mas ntak lo Juan.

¹² Xata wiz ngo Juan ngole men axta naya, men toz nchal yote lo yalnyebe' lo be' nde re xa' jwan' lipa nchala re xa ya li gan yotey.

¹³ Tak reta profet nde ley, benta mdeja axta sen' sin Juan.

¹⁴ Nde tez go' tli lazo' go'y, Juan nak profet Elías ta nak di's ye'da.

¹⁵ Tez cho nchol'as gon jwan' re' bin go'y.

¹⁶ Che'mod nak re men tyemp re'. Nak xa' xa nak re or bix ndyob lo xbi' ngij nde mbez or lo tar:

¹⁷ "Mtes ná' flaut nde na'nkanid go' mbil' ná' re di nabil ndye nde na'ngon'ta go'"

¹⁸ Tak mbyed Juan, xa' nanchad nde nachud xa' bin, nde mbez go' thi mbi narax ndono xa'.

¹⁹ Nde mbyed Xin' Mbi', Xa' ncha nde xa' nchu' xa', nde mbez go' nche' ndob thi xa' ncha ncho nde nchu' bin, nde nzal'ta xa' re xa' nthop tmi par Rom nde re xa' nzo'b xken na'. Per yalnchak chan' Dios ndlo' por re jwan' ndli men.

Nathos yate re men yez jwan' nandla'd re jwan narax nde numbered xa' lo Dios
(Lc. 10:13-16)

²⁰ Zyasa mdobte Jesús mbrez Xa' yek re men yez ten' mas bro yalnaro mbli Xa', tak nandlad re xa' ya re jwan' narax nak xa', nde numbered xa' lo Dios. Nde nchab Jesús:

²¹ —¡Nalat nya go', men yez Corazín! ¡Nalat nya go', men yez Betsaida! Tak tez yez Tiro nde yez Sidón ngak re yalnaro ta ngok yez go', ya ne' pola mse' xa' xgab xa', mbla' xa' re jwan' narax nak xa', ngok xa' lar naba'd nde mchub xa' diloki yek xa'.

²² Jwan' nasa nin lo go', wis taya' re men kwent lo Dios, mas nale' pen ya re xa' Tiro nde re xa' 'Sidón, ke pen ya go'.

²³ Nde lu, xa' yez Capernaum, ¿Ndyak go' axta lo be' sin go'? Na'sinta go' lo be' le' go' sin axta len' ye'r abil. Tak tez len' yez Sodoma ngak re yalnaro ta ngok len' yez go', tata nzi yez Sodoma axta naya.

²⁴ Jwan' nasa nin lo go' wis taya' re men kwent lo Dios, mas nale' pen rid re xa' yez Sodoma ke pen rid re go' men yez Capernaum.

De' go' lon sa ryo'xkwen go'
(Lc. 10:21-22)

²⁵ Tyemp ya Jesús nchab:

—Nin di's wen loa, Xud na, Xa' nyebe' lo be' nde lo izyo, tak mka's la re jwan' re' lo re xa' nchak nde lo re men nchen, nde mblo' ley lo re xa' nak xaja nak or bixa.

²⁶ Ta ngoka xud na, tak tamod mbro' lazo'a mbli.

²⁷ Xud na mdaya' reta jwan' lon. Nde ngen cho nzolopa na, ben'ta Xud na nzolo na, nde ngen cho nzolo Xud na, ben'ta na nzolo Xa', nde na lo' Xa' lo re men jwan' ncholas na lon' Xa'.

²⁸ De' go' lon, reta go' jwan' mzan lo re jwan' ndli go' nde re go' jwan' mzan ne' re xken na, na li ryoxkwen go'.

²⁹ Be' go' yug na nde pte'd go' lon, tak na nabe'z nak na nde nado' lazon', tamod sa ryoxkwen go'.

³⁰ Tak nale' rsin na nde naxax yo' jwan' tan we go'.

12

*Re xin'te'd Jesús mtop trig wiz ndryoxkwen men
(Mr. 2:23-28; Lc. 6:1-5)*

¹ Tyemp ya, Jesús ndarid ndab xij ten' nzobin trig, kon re xin'te'd Xa', len' wiz ndryoxkwen men. Zyasa re xin'te'd Jesús mzi'b ndlyan' xa' nde mdobte xa' mthop xa' trig mda xa'.

² Sen' lo mbwi' re xa' fariseo jwan' na, nchab xa' lo Jesús:

—Wi' nea, re xin'te'd la ngeli jwan' nandablod xa' li xa' wiz jwan' ndryoxkwen men.

³ Per Jesús mkab:

—¿Cho tera' lab go' jwan' mbli David, sen' lo ndyan' xa' kon re men nda no xa'?

⁴ Ngote xa' len' liz Dios nde mda xa' re pan nayon jwan' nandabloda wa xa', nek xa' nde nek re men jwan' ndano xa', ben'ta re xa' nak nglwey' ndablo way.

⁵ ¿O tera' lab go' ley chan' Moisés, ke re xa' nak nglwey' ndli xa' sin' lo yodo' wiz ndryoxkwen men nde nanakte yalke?

⁶ Nde naya nin lo go' nche'ya ndo thi Xa' mas ndak ke yodo'.

⁷ Nde tez ngaka yen go' kwan liy ta nchab xki's Dios: “Yalndlat lazo' ncholas na li go', nancholasta na kuj go' ma' ta' go' lon”, nde tez yen go'y pa ke' go' yalke xis men jwan' ngen cho yalke nchap.

⁸ Tak Xin' Mbi', nak xwan' wiz ta ndryoxkwen mena.

Thi mbi' mbis yan'

(Mr. 3:1-6; Lc. 6:6-11)

⁹ Zyasa mbro' Jesús nda Xa' nde ngote Xa' len' yo ten' ndyop xa' Israel.

¹⁰ Nde tya ndo thi mbi' mbis thi ya' xa', zyasa re xa' fariseo nkwan' xa' xa ke' xa' yalke yek Jesús, jwan' na mnab di's xa' lo Jesús, nchab xa':

—¿Cho tayal todan' men ti xa' yis len' wiz ta ndryoxkwen men?

¹¹ Le' Jesús mkab:

—Tez xanya thi go' ba, ngeno thi mbakxil' nde gab ma' len' thi ye'r len' wis jwan' ndryoxkwen men, ¿cho na'koted go' ma'?

¹² ¡Choleta ti men plopa mas ntak ti men lo thi mbakxil'! Jwan' nasa, toyal li men jwan' wen len' wis ndryoxkwen men.

¹³ Zyasa nchab Jesús lo mbi' ta mbis yan' ya:

—Ptaga' ya'a. Nde sen' mtaga' xa' ya' xa',
mdyan' ya' xa', mbyan'na xaja nak tadiba.

¹⁴ Nde sen' mbrote re xa' fariseo tya, mdobte xa'
mdodi's xa' xamod kuj xa' Jesús.

Jesús Xa' mtel' Dios

¹⁵ Sen' mne Jesús jwan' na, mxen Xa' ned nda
Xa' tedib lad, nde men toz mdonke xis Xa'. Nde
ntodan' Xa' reta men yis,

¹⁶ nde mnabe' Jesús lo re men sa na'tejta xa' cho
nak Jesús.

¹⁷ Tamod sa ngok jwan' mdej profet Isaías, sen'
nchab xa':

¹⁸ Wi' go' nea xa' re' mblín sa li xa' sin' lon,
xa' re' nke' toz lazon', nde xa' ngo nale lazo'n.
Nde tan Mbi Nayon chan' na tyono xa',
nde xa' tej yalnyebe' chan' na lo reta yez nzi xis
izyo.

¹⁹ Na'yod xa' men, nde na'kwesned Xa',
ne'ka kwes Xa' re ned.

²⁰ Na'nge kwan lino xa' re men jwan' nak xaja nak
yi jwan' mer gas,
nde taga nge kwan lino xa' men jwan' nak xaja
mech jwan' ben'ta sen ndob,
axta kebe' yan' jwan' gal' lo izyo.

²¹ Nde reta men xis izyo kembed men Xa'.

Nixin men xis Mbi Nayon

(Mr. 3:20-30; Lc. 11:14-23)

²² Zyasa ngwano xa' lo Jesús, thi xa' bi' nkow
lon' nde ngup, nzo mbi narax len' lazo'n. Nde
Jesús mtodan' mbi' ya, mbwi' mbi' nde mni mbi'.

²³ Zyasa reta men nzoyen toz xa', nde nchab xa':
—¿Cho Xa' re' nak Xa' nde lo bin David?

²⁴ Lo sen' re xa' fariseo sen' lo mbin xa' jwan' na nchab xa':

—Mbi' re' ngote mbi narax, tak Beelzebú xa' nyebe' lo reta mbi narax, mda' yalne lo xa'.

²⁵ Le' Jesús mnela cho xgab ndli re xa' ya, nchab Jesús lo xa':

—Reta xa' nyebe' jwan' ngeno byo ten' nyebe' xa', le'ga le' xa' nchak rol xa', nde ti yez o ti lis men jwan' le'ga le' xa' ngyo xa' nchak rol xa'.

²⁶ Nde tez Maxu' le'ga le' Maxu' ngote xa' xa', le' ngeli rol xa' yalnyebe' chan' xa', ¿Xomod kwebe yalnyebe' chan' xa' sa?

²⁷ Tez na ngoten re mbi narax kon yalne nda' Beelzebú, ¿Cho nda' yalnyebe' lo re men go' sa ngote xa' mbi narax? Jwan' nasa le'ga le' men go' lo' lo go' ke ngan go'.

²⁸ Per na kon Mbi Nayon chan' Dios ngoten re mbi narax, jwan' re' ndlo' liga le' yalnyebe' chan' Dios ndo la lo go'.

²⁹ Tak ¿Xamod li men gan yote men lis thi xa' mas ne nde we wan' men re chan' xa', tez ner na'tobod men xa'? Zyara teyal we men re chan' xa'.

³⁰ Xa' jwan' nandod kon na, xa' ya narax nye na, nde xa' jwan' na'nthopta jwan' kon na, xa' ya ncha's jwan'.

³¹ Jwan' nasa nin lo go', reta yalke nde reta yalnixin toyal dyon' na lo re mbi', per re xa' nixin xis Mbi Nayon na'dyon'ta xken xa'.

³² Nde choja men nixin xis Xin' Mbi', tayal ndyon' xken xa', per xa' jwan' nixin xis Mbi Nayon nadyon'ta xken xa' nek lo izyo re' nde neka lo izyo nara ye'd.

³³ Go' mne xa nak ti ya ba, ya wen nda'y ngud wen, nde ya bsin nandade ngud wen. Tak re ya ncholo mena por ngud nke lo ney.

³⁴ ¡Go' ba nya lo bin mzib ba nak go'! ¿Xamod ryo' di's wen ro go', tak men xkap go'? Tak re jwan' nzo len' lazo' men jwan' na ndryo' ro men.

³⁵ Xa' wen, di's wen ndodi's xa' tak jwan' na nzo lazo' xa', nde xa' xkap di's xkap ndodi's xa' tak jwan' na nzo lazo' xa'.

³⁶ Le' na nin lo go' reta di's jwan' andoja ndye ndryo' ro re men, reta di's ya nyab Dios kwen lo men sen' sin wiz jwan' taya' re men kwent lo Dios.

³⁷ Tak le'ga le' re di's mnia koxoba nen' cho nambi ndoa o nzo'b xken la.

*Re xa' xkap ncholas xa' wi' xa' thi yalnaro
(Lc. 11:29-32)*

³⁸ Zyasa nchab pla maestr nchak ley nde pla xa' fariseo lo Jesús, nchab xa':

—Maestr, ncholas ná' wi' ná' lia thi yalnaro.

³⁹ Le' Jesús mkab:

—Re go' men xkap nde men nkwin', nyab go' wi' go' thi yalnaro, per nalo'd nay lo go', ben'ta xa ngote profet Jonás wi go'.

⁴⁰ Tak xa ngo Jonás len' mbel ro son wiz nde son yal', taga yo Xin' Mbi' len' izyo son wiz nde son yal'.

⁴¹ Nde wiz sen' ko'xban Dios re men sa nya'b Dios kwent, wiz ya re men yez Nínive gab liga nchap re xa' nzi naya yalke, tak xa' Nínive mbli' xa' re jwan' narax mbli xa' lo sen' mni Jonás lo xa'. Nde naya nche' ndo thi Xa' mas ndak ke Jonás.

⁴² Nde noga ngol ta ngok rey lo yez Saba, ryo'to wiz sen' nyab Dios kwent lo re men, nde gab ngol nchap re xa' tyemp re' yalke, tak ngol ya mbro' axta plo mdib ro izyo, mbyed yon xa' yalnchak chan' Salomón, nde naya nche' ndo thi xa' mas ndak lo Salomón.

Mbi narax mbere
(Lc. 11:24-26)

⁴³ Sen' ndryote thi mbi narax len' lazo' thi men, nketey re izyo biz ngete kwan' na plo ryoxkwen na, per lo nazyaltay plo ryoxkwen na, zyasa ndliy xgab:

⁴⁴ “Beren ten' mbro'te'n.” Lo sen' mbere mbi narax ten' mbro'y nchosiba men ya, xaja thi yo mblyoba nde nzi re jwan' nawe nyay nde ngen cho nzoy.

⁴⁵ Zyasa mbi narax ya nda thop thi gas mbi narax mas nakap nak ke lo mbi narax ya, nde ndyenta reta mbi narax nde ndlyay len' lazo' men ya nde nchan'na nchoy tya, zyasa mas ndryo jwan' ndyak men ya ke lo jwan' mxak ner xa'. Taga yate re xa' xkap nzo nal tyemp re'.

Xna' Jesús nde kon re wes Xa'
(Mr. 3:31-35; Lc. 8:19-21)

⁴⁶ Laja ben' ndo ni Jesús lo re men, mzin xna' Jesús nde kon re wes Xa' nzi mbed re xa' le, tak ncholas xa' todi'sno xa' Jesús

⁴⁷ Nde ngwa thi xa' ngwayab lo Jesús:

—Le' xna'a nde kon re wes la nzi le ba, ncholas xa' todi'sno xa' lu.

⁴⁸ Per le' Jesús mkab lo xa' ta ngwayaba lo Jesús:

—¿Cho nak xna'n, nde cho nak re wes na?

⁴⁹ Zyasa mblo' ya' Jesús re xin'te'd xa' nde nchab xa':

—Re xa' re' nak xna'n, nak re wes na nde re btan na.

⁵⁰ Tak reta xa' ndli jwan' ncholas Xud na jwan' ndob lo be', xa' ya nak wes na, btan' na nde xna'n.

13

Di's nagan chan' xa' ngobin

(Mr. 4:1-9; Lc. 8:4-8)

¹ Wiz ya mbro' Jesús yo nde ngwa Xa' mdob Xa' gax ro nitto'.

² Nde men toz mdyop lo Jesús, nde Jesús ngwap lo bark, tya mdob Xa', laja re men nzi ro yux.

³ Zyasa mtote'd Jesús re men kon na'r toz re di's nagan yen men, nde nchab Xa':

—Ngo thi mbi' mbro' nda chas mbis trig.

⁴ Nde sen' nge cha's xa' trig, pla mbis ngob lo ned, nde mbyed mbyin nde mda ma' re mbis.

⁵ Pla mbis ngob xij re ke, plo nangenta bro yo, nde naye mblyen na tak lud yo nzoy.

⁶ Per sen' lo mbla be, mtol' bey, tak nangenta lox ney mbiza.

⁷ Nde thi play ngob xij yis, nde sen' mxyen yis mto'wa lo jwan' bin.

⁸ Per thi play ngob izyo wen, nde jwin ngoka, choy mda' thib ayo' mbis, choy mda' son gal mbis, nde choy mda' galpsi' mbis.

⁹ Tez cho go' ndob nzan', bin go' jwan' re'.

Cho sin' li re di's nagan

(Mr. 4:10-12; Lc. 8:9-10)

¹⁰ Zyasa re xin'te'd Jesús mbike gax xa' lo Jesús nde mna'd di's xa':

—¿Kwan liy sa di's nagan nia lo re men?

¹¹ Le' Jesús mkab:

—Lo re go' nda' Dios yen go' re jwan' nzonaga's, chan' yalnyebe' lo be', per lo re xa' ba namdad Dios sa.

¹² Tak xa' jwan' nchenla, masray yen xa', bro jwan' yen xa', per xa' jwan' lud nchen, xa' ya axta jwan' lud nchen xa' yi'b lo xa'.

¹³ Jwan' nasa kon di's nagan ndej na re jwan' lo re men, tak te'nye ngwi' xa' na nanchonid lo xa', nde te'nye ndo yon xa'y, nayenta xa'y.

¹⁴ Tamod lo re xa' re' ndoyak re jwan' mni profet Isaías sen' lo nchab xa':

Te'nye mas kenza go', per nayenta go', tenye mas ngwi' go', per nayoxnid lo go'y.

¹⁵ Tak ngok ne lazo' yez re',

nde nanchonta xa' di's,
nde mbyow' ngudlo xa',
sa nayonid lo xa',

nek gon xa' di's

nde ne'ka lazo' xa' na'yenta,

neka bere xa' lon sa todan' na xa'.

¹⁶ Per nabe'z toz nda re go' tak ndoyal ngwi' go' nde ndoyal nchon go' jwan' re'.

¹⁷ Lipa nin lo go' ke na'r toz re profet nde re xa' gal' ndo, mdabla's ngwi' jwan' ta ngwi' go' re', per na'ngwi'd xa'y, nchola's xa' ngon xa' reta jwan' nchon go' per na'ngonta xa'y.

*Jesús ngoxkan di's nagan chan' xa' ngo bin
(Mr. 4:13-20; Lc. 8:11-15)*

¹⁸ Naya na bin go', nyen', xomod nak di's nagan chan' xa' ngo bin.

¹⁹ Nde nzo xa' nchon xki's Dios nde na'yenta xa'y, zyasa nde Maxu' nde nkib Maxu' di's ta ngobin len' lazo' xa' ya. Xa' ya nak xa nak mbis ta ngob lo neda.

²⁰ Le' mbis ta ngob xij re ke ya, nak xa nak re xa' nchon xki's Dios nde nale ncho lazo xa', nchon xa'y

²¹ ta xa nak jwan' bin ngentosta lox ney nde naxektay, ta nak xa' sen' lo nde re yalti o nchobla men xa' tak ndli lazo' xa' xki's Dios, zyasa ndla' xa' xki's Dios.

²² Le' mbis ta ngob xij yis, nak xa nak re xa' nchon xki's Dios, per lo ndli xa' xgab re jwan' lo izyo re', nkwin'no lazo' xa' ndyabla's xa' keno xa' jwan' lo izyo re' nde ndla' xa' xki's Dios, na'tadey di's xyen xa' lo xki's Dios.

²³ Mbay le' mbis ta ngob izyo wen, nak xa nak re xa' nchon xki's Dios nde nchen xa'y, ndli xa' jwan' nchala's Dios xaja ti mbisa, nzoy mda' thib ayo'y, nzoy mda' son gala, nde nzoy mda' gal bsi' mbis.

Di's nagan chan' trig nde wan yis

²⁴ Jesús mdej tedib kwent nzo jwan' nagan yen men lo re xa' nchab:

—Le' yalnyebe' lo be' nak, xa nak thi mbi' mbli bin trig,

²⁵ per laja nziyat re xa', mbyed xa' ngi'no xa' ya, nde mbli bin xa' xij mbis trig tib ned mbis wan nde ndya xa'.

²⁶ Laja ndoxen trig nde sen' mbro' go'b lo ney, zyasa noga re wan yis nzo xija'.

²⁷ Zyasa re xa' nge sin' nchab xa' lo xa' nak chan' bin: Xa' nyebe', “¿Cho nanakta mbis wen mblo bin go' len' chan' go'? ¿Plo mbro' re wan na?”

²⁸ Le' xa' nak chan' jwan' bin nchab: “Thi xa' ngi'no na mbli jwan' re'.” Nde le' re xa' nge sin' nchab lo xa': “¿Cho ncholas la ya kib ná'y?”

²⁹ Le' xa' nak chan' bin mkab: “Bla' go' nakibta go'y tak ndaga no trig naxkib go'.

³⁰ Pta' go' di's sa tita xyen ropa axta kebe' ngok trig, zyasa gab na lo re xa' nge sin', sa nerla re wan yis thop xa', nde tobo xa'y por manoj sa yola, sera' thop xa' trig sa kotsa' xa'y ten' nchotsa' re mbis.

Di's nagan chan' mbis mostaz

(Mr. 4:30-32; Lc. 13:18-19)

³¹ Jesús mdej tedib di's nagan, nde nchab Xa': —Le' yalnyebe' lo be' nak xa' nak thi mbis mostaz, jwan' nxen' thi mbi' len' izyon xa',

³² le' mbis mostaz nak mbis mas mbis bix lo reta mbis, per sen' lo nxien na, le'y mas naro nxien lo re jwan' bin, nde axta re mbin nche'dtoxkwa' lye'd na' lo re xod ya.

Di's nagan chan' levadur

(Lc. 13:20-21)

³³ Nde noga mdej Jesús tedib di's nagan: —Le' yalnyebe' lo be' nak xaja nak levadur, jwan' mkos ti ngol tson medid arin nde te'nye luda mblas mbiy dib ko'b.

Jesús ndej cho sin' ndli re di's nagan

(Mr. 4:33-34)

³⁴ Reta jwan' mblo' Jesús, kon Di's nagan mblo' Jesusa lo reta men, nde nek tib jwan' namblo'd Xa' tez namblirxsint'a Xa' ti di's nagan.

³⁵ Tamod ngok jwan' mdej profet sen' lo nchab xa':

—Kon kwent nin re jwan' lo men,
lo sen' tej na reta jwan' nzo naga's, desde sen'
mdoxkwa' Dios izyo.

Jesús ngoxkan di's nagan chan' cizañ

³⁶ Sen', mne mdodi'sno Jesús re men, ngote Xa' len' yo, zyasa mbike re xin'te'd Xa' nde nchab xa' lo Jesús:

—Blo'xkan lo ná' xamod nak kwent chan' wan xkap kon trig.

³⁷ Zyasa Jesús nchab:

—Xa' ngobin mbis wen nak Xin' Mbi'.

³⁸ Le' ten' ncho bin nak dib izyo, nde mbis wen nak re xin' Dios, le' wan xkap nak re xin' Maxu'.

³⁹ Le' xa' nayi' mblo bin mbis xkapa nak Maxu'.
Lo dyop jwan' ngok nak lo sen' lux izyo; nde re xa' thop jwan' ngok nak re anj.

⁴⁰ Nde ta xa' nthop men re wan xkap, sa yol la, taxa mod aka lo sen' lux izyo.

⁴¹ Le' Xin' Mbi' tel' re anj chan' Xa', sa kote anj reta xa' jwan' ndli nchab men lo jwan' narax nde reta xa' jwan' ndli re jwan' xkap ten' nyebe' Dios.

⁴² Nde kobi anj xa' len' or ndob bel nde tya gon xa' nde te's kele xa'.

⁴³ Zyasa re xa' gal' ndo anta ndlya bel nya xa' tyob xni xa' xaja nya wisa ten' nyebe' Xud xa'. Tez cho go' ndob nzan bin go' jwan' re'.

Di's nagan chan' jwan' ndak toz nzo ka'slo

⁴⁴ Taga' yalnyebe' lo be' nak xa' nak thi jwan' ndak toz nzo naga's len' wan, nde ti mbi' ngosal la, nde bere mka's xa'y tya; nde nale toz nzo lazo'

xa' ta mzyal xa' jwan' na nde ngwa xa' mtho xa' reta jwan' ngeno xa', nde mxi' xa' wan ya.

Di's nagan chan' perla

⁴⁵ Noga yalnyebe' lo be' nak xa nak thi xa' ndli ni', kwan' xa' perla wen,

⁴⁶ nde sen' lo mzyal xa' thi perla jwan' ndak toz tir, ngwa xa' mtho xa' reta jwan' ngeno xa', nde mxi' xa' perla ya.

Di's nagan chan' ye'd

⁴⁷ Taga nak yalnyebe' lo be', xa nak thi ye'd ngobi xa' lo nitto', nde nchaga re ned mbel.

⁴⁸ Lo sen' mzey, ngote xa'y ro yux, nde tya ndyob xa' mbi xa' re ma' wen nde ngotsa' xa' ma' len' chokwid, nde re ma' xkap ngobi xa'.

⁴⁹ Taga ak lo sen' lux izyo, ye'd re anj nde koxa' xa' re xa' xkap xij re xa' gal' ndo,

⁵⁰ nde ko anj re xa' xkap len' or ndob bel, tya gon xa' nde tyes kele xa'.

Jwan' kub nde jwan' gox

⁵¹ Nde mna'b di's Jesus lo re xin'te'd xa' nchab xa':

—¿Cho nchen go' re jwan' re'?

Re xin'te'd Jesús mkab:

—Nchen na'y Señor.

⁵² Zyasa nchab Jesús lo xa':

—Reta maestr nchak xki's Dios, jwan' mte'd xamod nak yalnyebe' lo be', nak xaja' thi xud mdyen', nchak ngote xa' ten' nzo tza' re jwan' ntak toz ngeno xa', jwan' gox nde jwan' kub.

Jesús nda yez Nazaret

(Mr. 6:1-6; Lc. 4:16-30)

⁵³ Sen' lo mne mdej Jesús reta di's nagan re', mbro' Xa' nda Xa',

⁵⁴ nde sen' mzin Xa' yez Nazaret las Xa', mdobte Xa' mblo' Xa' xki's Dios lo re men, len' yo ten' ndyop xa' Israel, nde re men nzo yen xa' nchab xa':

—¿Plo ngwa te'd mbi' re' reta yalnchak re'? ¿Xomod nchak ndli Xa' re yalnaro re'?

⁵⁵ ¿Cho nanakta xud Xa' ba ndoxkwa' ya ya? ¿Cho na Marida nak xna' Xa' nde re wes Xa' nak Jakob, Jose, Simón nde Judas?

⁵⁶ ¿Cho naxijta na' re' nzo re btan' Xa'? ¿Ploga ngwa ted Xa' reta jwan' nchak Xa'?

⁵⁷ Nde narax mbli xa' xgab xis Jesús. Per Jesús nchab lo re men:

—Reta yez nxo'byek xa' thi profet, ben'ta re xa' yez Xa' nde xa' liz Xa' nanxobyekta men xa'.

⁵⁸ Nde na'ndlid Jesus na'r yalnaro tya tak nan-dlid lazo' xa' Jesús.

14

Nguj Juan ngole men

(Mr. 6:14-29; Lc. 9:7-9)

¹ Tiemp ya Herodes xa' nyebe' Galilea mbin xa', jwan' nketeli Jesús,

² nde nchab xa' lo re men nge sin' lo xa':

—Juan ngole men nak xa' ba, mbroxban xij re xa' nguj, jwan' nasa ngeno xa' yalne ta ndli xa' reta yalnaro ba.

³ Tak Herodes mnabe' mxen xa' Juan nde mtobo xa' Juan kon kaden nde mke' lizyi'b xa' Juan, xken Herodías ngol Blib wes Herodes.

⁴ Tak Juan nchab lo Herodes:

—Nandabloda tyobnoa ngol wes la

⁵ Zyasa Herodes ndonke kuj Juan, per nzyeb Herodes dib yez; tak dib yez nxo'byek xa' Juan xaja thi profet.

⁶ Per sen' lo ngoxo'b lin' Herodes, zyasa mza' xin' Herodías ngwa mkani lo reta xa' nzi tya, nde mbro' toz lazo' Herodes xamod mkani mza,

⁷ tamod mda' Herodes xki's Herodes lo mza', ta' Herodes one kwan nyab mza'.

⁸ Nde xna' mza' nchab lo mza' kwan nya'b mza', zyasa nchab mza' lo Herodes:

—Ncholas na ta'a ngudyek Juan ngole men len' thi yen lon.

⁹ Jwan' na mblo nabil lazo' rey Herodes, per lo mda'a xa' xki's xa' lo nzi wi' re men ta nzino xa', mnibe' xa' sa ta' xa' jwan' mnab mza',

¹⁰ nde mnabe' Herodes mcho' yek Juan ten' nge Juan lizyi'b.

¹¹ Nde ngwano xa' yek Juan lo thi len' yen nde mda xa'y lo mza' nde mza' mda'y lo xna' mza'.

¹² Zyasa mzin re xin'te'd Juan, nde mbe' xa' thabol nde mka's xa' nde ngwa tej xa'y lo Jesús.

*Jesús nda' jwan' mda gay' mil men
(Mr. 6:30-44; Lc. 9:10-17; Jn. 6:1-14)*

¹³ Sen' mbin Jesús jwan' na, ngwap xa' lo bark nda xa' lad izyo nagan sa yan' tib xa', nde sen' lo mne re mena, mde ni re men mbro' men re yez, nda xa' ten' sin Jesús.

¹⁴ Nde sen' mbla Jesús lo bark, mbwi' Xa' men toz tir nzi tya, nde mblat lazo' Jesús reta men, nde mtodan' Jesus re xa' nayiz.

¹⁵ Sen' ndosea izyo, mbike re xin' ted Jesús lo Xa', nde nchab xa':

—Mzye toz la izyo, nde nagan nche' ya. Gus lo re men sa ya re men re rach sa ya ti' xa' jwan' wa xa'.

¹⁶ Le' Jesús nchab:

—Nanakin'ta xa' ya xa', go' pta' jwan' wa xa'.

¹⁷ Re xin'te'd Jesús mkab:

—Ngen kwan nak, ben'ta gay' pan nde chop mbel ngeno ná'.

¹⁸ Nde Jesús nchab:

—De' no go'y nche'ya

¹⁹ Zyasa mnibe' Jesus lo re men tyob xa' lo wan bix. Nde Jesús mxen xa' re gay' pan kon rop mbel, nde mbwi' Xa' lo be', nde mda' Xa' dyux lo Dios nde mbli rol Xa' pan mda' Xa'y lo re xin'te'd Xa' nde re xin'te'd Xa' mdida lo re men.

²⁰ Reta men mda xa' axta kebe' mze len' xa', nde tata mthop re xin'te'd Jesús tib sen chokwid jwan' mbro'xob.

²¹ Lo reta xa' jwan' mda nak mer ti gay' mil xa' bi', nde namblabta xa' re ngol nde reta or bix.

Jesús ndye lo nitto'

(Mr. 6:45-52; Jn. 6:15-21)

²² Xisa Jesús mbli ngwap re xin' ted Jesús lo bark sa yate xa' tedib lad ro nitto', laja ngonned Jesús re men.

²³ Sen' mne ndodi'sno Jesús re men toza ngwa Jesús yek yi' sa tya todi'sno thib Xa' Dios, nde sen' mbli yal' thib Xa' ndo tya.

²⁴ Nde le' bark ndola rol nitto', nde re bde ngin na bark tak le' mbi che' nde ned nda bark.

²⁵ Nde nakalra' Jesús nda ni lo nitto' lad lo bark ten' nda re xin'te'd Xa'.

²⁶ Lo sen' mbwi' re xin' ted Jesús, le' Jesús ndyeni lo nitto', mzyeb toz xa' nde mbrezyaj xa':

— ¡Thi jwan' bet ndeba!

²⁷ Per Jesús mni lo xa' nde nchab Jesús:

— ¡Na'zyebta go', nay, blo ne lazo' go'!

²⁸ Zyasa mkab Pedr:

— Señor, tez luy, bli te'n lo nit sa sin na loa ba

²⁹ Le' Jesús nchab:

— De'.

Nde Pedr mbro' len' bark tolo mde lo nit nda lo Jesús.

³⁰ Per sen' mbwi' Pedr ne toz nde mbi mzyeb Pedr, nde tolo ndola Pedr len' nit, zyasa mbrezyaj Pedr:

— ¡Señor Btola'n!

³¹ Nde Jesús zyaga mxen ya' Pedr nde nchab:

— ¡Lud ndli lazo'a Dios! ¿Kwan liy ngok rop xgab la?

³² Nde sen' ngwap xa' lo bark, ngotab mbi.

³³ Zyasa re xa' nzo len' bark mdoxub xa' lo Jesús nde nchab xa':

— Li tirpa lu nak Xin' Dios.

*Jesús ntodan' re men nayiz len' yez Genesaret
(Mr. 6:53-56)*

³⁴ Sen' mne mbrid xa' lo nit, mzin xa' lo xyon xa' Genesaret.

³⁵ Nde sen' mbyolo re men izyo ya Jesús, mcha's xa' di's lo re men lo dib izyo ya nde re men ngwano xa' reta men nayiz lo Jesús.

³⁶ Nde mnab toz xa' lo Jesús ta' Jesús di's gal re xa' yisa masa ro xab Jesus, nde reta xa' jwan' mbwal ro xab Jesús mdyan' xa'.

15

Jwan' ndli nchak beow men

(Mr. 7:1-23)

¹ Zyasa mbike pla xa' fariseo nde kon pla maestr nchak ley mbro' Jerusalen nchab lo Jesús:

² —¿Kwan liy sa re xin'te'd la nanxobyekta xa' mod gox, jwan' ndli re xa' gox pola? Nanad xa' xa ndabloy, sen' ncha xa'.

³ Nde Jesús mkab lo re xa' ya:

—¿Mbay kwan ndli noga go' na'nxobyekta ley chan' Dios, lo ndli go' re mod gox jwan' ndono go'?

⁴ Tak Dios mnabe': "Bxobyek xud la nde xna'a, nde xanya men jwan' nixin' xis xud na' o xis xna'n, xa' ya gaj."

⁵ Per go' mbez, tez xanya men gab lo xud na' o lo xnan': "Nalid na gan laston la, tak reta jwan' ngenon mdayalanay lo Dios."

⁶ Nde xa' ta gaba, nandabloda la'sto xa' xud xa' o xna' xa'. Tamod ngotal go' yalnyebe' chan' Dios, sa li go' mod gox ta ndono go'.

⁷ ¡Go' ba sa li nak men bxa' nde men kwin'! Gal'ka mni profet Isaías lo mdej go', nchab xa':

⁸ Re yez re', ben'ta ro xa' mbez xa' nxobyek xa' na, per lazo' xa' tij ndoy lon.

⁹ Ngen cho sin' li di's wen ni go lon, tak re jwan' ndlo' xa',

ben'ta yalnyebe chan' mena.

¹⁰ Zyasa mbrez Jesús re men toz nde nchab Xa':

—Bin go' nde byen go' jwan' re':

¹¹ Nanakta re jwan' ncha men ndli nchak bew men, che'la re di's jwan' ndryo' ro men jwan' na ndli nchak bew men.

¹² Zyasa re xin'te'd Jesús mbike xa' lo Jesús nde nchab xa':

—¿Cho mnea ke re xa' fariseo ngwad xa' di's sen' mbin xa' jwan' mnia ya'?

¹³ Le' Jesús mkab nchab:

—Reta ya jwan' namblobinta Xud na ndob lo be', ndablo yi'b dib loxa.

¹⁴ Bla' go' xa', tak xaja xa' nkow lon' xa' nde ngo'b kow xa' ned lo tedib ned xa' nkow lon'. Nde tez ti nkow lon' ko'b xa' ned lo tedib xa' nkow lon', rop xa' gab len' ye'r.

¹⁵ Zyasa Pedr nchab lo Jesús:

—Mbloxkan di's nagan re' lo ná'.

¹⁶ Nde Jesús mkab:

—¿Cho noga go' na'yenta di's ya?

¹⁷ ¿Cho na'nchenta go', reta jwan' ncha men, nday len' men, nde tya nryo'tey lo nda men wan?

¹⁸ Per re jwan' ndryo' ro men, len' lazo' men ndryo'y nde jwan' na ndli sa nchalal men, men beow.

¹⁹ Tak len' lazo' men ndryo' re xgab narax, re yalguj men, re xa' jwan' ngetano xa' jwan' nanakta sal' xa', re xa' ndli re ned jwan' xkap sen' nchaxno xa' ta xa^{*}, re yalwan', re yalke'jwals nde re yalnixin.

* **15:19 15:19** re xa' ndobno tan nde rera ya xa' lo civil, o re xa' tib nchakno xaxa'la men. Re xa' ndli re ned jwan' xkap sen' ncaxnox men

²⁰ Reta jwan' re' nchak beow men, per ta nanad men xa ndabloy lo wa men nandlibeowte men.

Ti ngol yez Canaan liga ndli lazon' Jesús
(Mr. 7:24-30)

²¹ Nde tya mbro' Jesús nda Xa' lo xyon Tiro nde lo xyon Sidón.

²² Nde tya mbro' ti ngol jwan' nde lo xyon Canaan mbesyaj nde lo Jesús nchab:

—¡Señor, Xa' nde lo bin David, blat lazo'a na! Xin' got na jwan' toz nalat ndyak, tak jwan' toz ngetati ti mbi narax or.

²³ Per Jesús na'nkapta lo ngol. Zyasa re xin'te'd Jesús mbike gax nde mnab xa' lo Jesús nchab xa':

—Bloned xa' ya xa', taja mbesyaj xa' nde xa' xis na'.

²⁴ Zyasa mkab Jesús:

—Dios mtel' na benta lo re xa' Israel jwan' ngetetab xaja mbakxil'la.

²⁵ Per le' ngol mbike gax lo Jesús nde mdoxub ngol nchab ngol:

—¡Blaston Señor!

²⁶ Le' Jesús nchab:

Nawenta naka kib men jwan' ncha mdyen' nde ta' mena lo re mbak.

²⁷ Nde ngol nchab:

—Taga naka, Señor, per axta re mbak ncha re kos nchab ro mes xwan' ma'.

²⁸ Zyasa le' Jesús nchab lo ngol:

—¡Ngot, lu sa liga ndli toz lazo'a! Re jwan' nchola's la aka xa nchola's la.

Nde hor yaga mdyan' mza' xin' ngol.

Jesús ntodan' bro toz men yis

²⁹ Jesús mbro' tya nde nda Xa' nde mzi xa' ro nitto' Galilea, nde mdoke Xa' axta yek yi' nde mdob Xa' tya.

³⁰ Nde men toz tolo mzin lo Xa', nde ndeno men re xa' ngob nin[†], re xa' syeg, re xa' ngup, re xa' nayiz yan', nde re men jwan' xaxa' yis ndyak. Mblek xa' re xa' ya lo Jesús nde Jesús mtodan' re xa'.

³¹ Nde nzoyen re men, sen' mbwi' xa' re xa' ngup ndodi's, re xa' nayiz yan' mdyan', re xa' renk ndye, nde re xa' nglwe ngwi'. Zyasa ndobte xa' mbli naro xa' Dios chan' xa' Israel.

Jesús mda' jwan' mda thap mil mbi'

(Mr. 8:1-10)

³² Zyasa Jesús mbrez re xin'te'd na', nde nchab Jesús lo xa':

—Ndlat lazo'n re men, tak ndala son wiz ta nzi xa' lon re', nde nangenod xa' jwan' wa xa'. Nancholasta na gone'd na re xa' tata win xa', ndaga nax ke' mbiy yek xa' ned.

³³ Nde re xin'te'd Jesús nchab:

—Per ¿plo ya xi' ná' jwan' wa reta men toz re' nde nagan che'?

³⁴ Le' Jesús mnab di's:

—¿Pla pan ngeno go'?

Le' re xa' mkab:

—Gas pan nde chopson mbel bix.

³⁵ Zyasa Jesús mnibe' mdob reta men izyo,

³⁶ nde mxen Jesús re gas pan nde re mbel nde mda' Xa' dyux lo Dios. Xisa mblirol Xa' pan kon mbel nde mda' Xa'y lo re xin'te'd Xa', nde re xin'te'd Xa' mdi'da lo reta men.

[†] 15:30 15:30 bde xa' bi'x

³⁷ Nde mda re men axta kebe' mze len' xa'. Nde tata mthop xa' gas chokwid re jwan' mbro'xob.

³⁸ Lo reta xa' jwan' mda nak, thap mil xa' bi', nde namblabta xa' re ngol nde reta or bix.

³⁹ Ngolo mni Jesus lo re men, le' Jesús ndya, ngwap Jesús lo bark nda xa' lo xyon xa' Magdala.

16

Xa' fariseo nde xa' saduseo nyab ti yalnaro

(Mr. 8:11-13; Lc. 12:54-56)

¹ Re xa' fariseo nde re xa' saduceo ngwa lo Jesús, sa mnab xa' li Jesús ti yalnaro, nen' cho liga lo be' nde Jesús.

² Per Jesús mkab lo re xa' ya:

—Sen' ndala yal', mbez go': "Nabe'z ak wiz ye', tak nane nya lo be'".

³ Le' til' mbez go': "Narax ak wiz naya, tak nane nya be' nde nzo xkowa." ¡Makwin'! nchak takbe' go' lo be', per na'yenta go' re yalnaro jwan' ndoyak na tyemp re'.

⁴ Xa' xkap re go' nde ndli go' jwan' nchala's go' tyemp re', nyab go' yalnaro, per na'wi'd go' tedib yalnaro, ben'ta jwan' ngok lo profet Jonás wi' go'.

Nde mbla' Jesús re xa' ya nde nda Jesús.

Levadur chan' xa' fariseo

(Mr. 8:14-21)

⁵ Sen' mzin xin'te'd Jesús tedib lad ro nit, mbyaj yek xa' ngwe' xa' pan.

⁶ Zyasa nchab Jesus lo xa':

—Nda wi' toz go' kon levadur chan' re xa' fariseo nde xa' saduseo.

⁷ Zyasa re xin'te'd Jesús nchab xa' lo ta xa':

—Kwent nandenod na' pan jwan'na ta mbez Jesús.

⁸ Jesús mnela jwan' ndo di's xa' nde nchab Jesús lo xa':

—¿Kwan liy mbez go' nangenod go' pan? ¡Lud toz ndli lazo' go' Dios!

⁹ ¿Cho tata tera yen go', ne'ka nte'la's go' re gay' pan ta mblirol na mda re gay' mil men nde pla chokwid jwan' mbro'xob mtop go'?

¹⁰ ¿Nde cho na ntela'sta go' re gas pan ta mblirol na mda re thap mil men, nde pla chokwida mthop go'?

¹¹ ¿Kwan liy sa na'yenta go', le' na nandotejta pan, sen' nin lo go' ndawi' go' kon levadur chan' xa' fariseo nde xa' saduseo?

¹² Zyara sa mbyen xa', le' Jesús nandotejta levadur jwan' ncho pan, le' Xa' ndej re jwan' ndlo' re xa' fariseo nde re xa' saduseo.

Pedr nchab Jesús nak Crist

(Mr. 8:27-30; Lc. 9:18-21)

¹³ Sen' mzin Jesús lo xyon Cesarea Filipo, mnab di's Xa' lo re xin'te'd Xa':

—¿Cho mbez men nak Xin' Mbi' jwan' nak na re'?

¹⁴ Le' re xa' mkab:

—Cho xa' mbez na, Juan Ngole mena, cho xa' mbez Elias sa, nde pla xa' mbez Jeremias sa, o nzo cho ti profeta.

¹⁵ Nde Jesús nchab lo xa':

—Mbay go', ¿cho nak na ndyak go'?

¹⁶ Le' Simón Pedr mkab:

—Lu nak Crist, Xin' Dios naban.

¹⁷ Zyasa nchab Jesús:

—Nabe'z toz ndaa, Simón, xin' Jonás, tak nek tib men namblo'd jwan' re' loa, jwan' re' mblo' Xud na ndob lo be' loa.

¹⁸ Nde noga' na ni loa, lu nak Pedr, nde xis ke re' toxkwan yodo'n na, nde neka yalne chan' yalguj na'lid gan lo ney.

¹⁹ Nde loa tan re yab chan' yalnyebe' lo be'; reta jwan' toboa lo izyo re', tyobo'y lo be', nde reta jwan' koxak la lo izyo re', taga' yoxaka lo be'.

²⁰ Zyasa Jesús mnibe' lo re xin'te'd Xa' sa ngen cho lo tej xa' le' Jesús nak Crist.

Jesús ndej le' Xa' gaj

(Mr. 8:31—9:1; Lc. 9:22-27)

²¹ Xata zya ndobte Jesús ndej Xa' lo re xin'te'd Xa', ndablo ya Xa' Jerusalén nde re xa' gox jwan' nyebe' lo re xa' Israel, re nglwey' jwan' nyebe', nde maestr nchak ley, toti xa' Xa' nde kuj xa' Xa', nde yoxob byon wiz ryo'xban Xa'.

²² Zyasa xa'ta mbe' Pedr Xa' nde tolo mbrez Pedr lo Xa' nchab Pedr:

—¡Señor blat lazo'a la, nandabloda tyak la jwan' re'!

²³ Per Jesús mbyek nde nchab Jesús lo Pedr.

—¡Bike tib blad, Maxu'!, na'tow'ta la lon. Tak nantobta la xgab la lo chan' Dios, le'a ndob xgab la jwan' lo izyo re'.

²⁴ Zyasa nchab Jesús lo re xin'te'd Xa':

—Tez cho go', nchola's tyonke xis na, bkalo go' lo re jwan' ndyen go' li go', bta'ya' lazo' go' rid go' pen reta wiz xaja men ne' kruza nde ptonke go' xis na. *

* **16:24 16:24** nde ptonke go' xis na, tenye lo ya zyal go' yalguj.

²⁵ Tak men jwan' ncholas tola' yalnaban chan' na', xa' ya ta'b yalnaban chan' xa', per men jwan' gaj por kwent chan' na men ya li gan yalnaban adi'.

²⁶ Tak ¿cho sin' li lo men tez li men gan reta jwan' lo izyo re' nde ta'b men xbin[†] men? ¿O plopa kix men sa lya' xbin men?

²⁷ Tak le' Xin' Mbi' yed Xa' kon reta yalnaro chan' Xud Xa' nde kon re anj chan' Xa', zyasa kix Xa' lo kad tib men por jwan' mbli men.

²⁸ Lipa nin lo go', nzo pla go' jwan' nzi tre' naya, na'gajta go' axta kebe' wi' go' nde Xin' Mbi' ye'd nyebe' Xa'.

17

Msye' nya Jesús

(Mr. 9:2-13; Lc. 9:28-36)

¹ Mbrid xop wiz, xa'ta mbe' Jesús Pedr, Jakobo kon Juan wes Jakobo, nda xa' thi yek yi' ro;

² nde tya mzye' nya Jesús lo re xa'. Lo Jesús anta ndlyabel nya xaja wisa, xab Xa' ngok nakis anta ndlyabel nya.

³ Nde ta nzi wi' xa' xaj mbro'to Moisés kon Elías, ndotadi'sno xa' Jesús.

⁴ Zyasa Pedr nchab lo Jesús:

—Señor, ¡lejka nzi ná' nche' ya! Tez chola's la toxkwa' ná' son ramad: tiba kaa, tiba ka Moisés nde tediba ka Elías.

[†] **16:26 16:26** xbin o gan

⁵ Laja ben' ndotodi's Pedr, ti xkow anta ndlyabel nya* mkota re xa' nde xij xkowa mbyen ti bi nchab:

—Xa' re nak Xin' na jwan' nke' toz lazo'n, nde nale toz nzo lazo'n ngwi'n Xa'. Bin go' di's ro Xa'.

⁶ Lo mbin xin'te'd Jesús jwan' na, mdoxub xa' axta mdin' lo xa' izyo nde mzyeb toz xa'

⁷ Zyasa Jesús mbike lo xa' nde mbwal Jesús xa' nde nchab Jesús lo xa':

—Ptolí go', na'zyebta go'.

⁸ Nde sen' mblit xa' lo xa', ngen cho nak ben'ta tib Jesús ndo.

⁹ Lo sen' ndela re xa' mbro' xa' yi' ya, Jesús mnibe' lo re xa', nchab Jesús:

—Na'ngecho lo tej go' jwan' ta mbwi' go', axta kebe' ryoxban Xin' Mbi' xij re xa' nguj.

¹⁰ Zyasa re xin'te'd Jesús mnabdi's xa' lo Jesús:

—¿Kwan li sa, mbez re maestr nchak ley, ndablo Elías ner ye'd?

¹¹ Jesús mkab:

—Ligay, Elías ner ye'd, nde xa' naxut tan' re jwan'.

¹² Per na nin lo go', Elías ya mbyed la nde re xa' na'ndlid lazo' xa' Elías, che'la mblino xa' xa' xa' nchallas xa', nde taga' Xin' Mbi' ndoja li no Xa' xa'.

¹³ Zyara sa mbyen re xin'te'd Jesús, le' Xa' ndotej Juan Bautist.

*Jesús ntodan' ti mbyo ndyak yis mbi
(Mr. 9:14-29; Lc. 9:37-43)*

* **17:5 17:5** Ben' ndotodi's Pedr, ti xkow xni mtow' yek xa', nde xij xkowa mbyen ti bi jwan' nchab:

14 Sen' mzin xa' ten' nzi re men, mbike ti xa' bi' gax lo Jesús, nde mdoxub xa' nchab xa':

15 —Señor, blat lazo'a xin' na, tak le'r nke' mbiy chon', nde sen' nke' mbiy chor ne toz tir ndyak or, tak nar toz gob nchab or lo ki nde nar toz gob nchab or lo nit.

16 Mben or lo xin'te'd la per nandlid xa' gan ntodan' xa' or.

17 Jesús mkab:

—¡Men na'ndlid lazon' Dios nde men xkap! ¿Axta polpa tonora' na go'? ¿Axta polpa xek na go'? De'no go' or nche' ya.

18 Zyasa Jesús mbrezno xa' mbi' narax[†], sa mbrotey lazo' mbyo, nde hor yaga mdyan' mbyo.

19 Xisa re xin'te'd Jesús xa'ta ndodi'sno xa' Jesús nde mnabdi's xa':

—¿Kwan liy sa na'ndlit ná' gan ngote ná' mbi naraxa?

20 Le' Jesús nchab lo xa':

—Tak lud toz ndli lazo' go' Dios. Lipa nin lo go', tez liga ndli lazo' go' Dios masa lud xapa ti mbis mostaza, gab go' lo ti yi'ba bike gwa tiblاد, nde yi' ya bikey nday tiblاد. Nde nek tib jwan' nagan ngenta par go'.

21 Per par ryo'te mbi narax re', ndablo nya'b men na lo Dios nde li men yalse sa ryo' tey.

Jesús ndej tedib gob le' Xa' gaj

(Mr. 9:30-32; Lc. 9:43-45)

22 Laja naxte re xa' lo xyon xa' Galilea, Jesús nchab: Le' Xin' Mbi' taya' xa' lo ya' re men,

[†] 17:18 17:18 mxe'

²³ nde kuj men Xa', nde len' mbyon wiz ryoxban Xa'. Sen' lo mbin re xin'te'd Jesús jwan' na, nabil toz ngo lazo' re xa'.

Yax re tmi chan' yodo'

²⁴ Sen' mzin Jesús kon re xin'te'd Xa' yez Capernaum, zyasa ngwa xa' jwan' nya'b tmi chan' yodo' lo Pedr nde nchab xa':

—¿Cho nangixta Xa' nak maestr la tmi chan' yodo'?

²⁵ Le' Pedr mkab:

—Ngix Xa'y.

Nde sen' ngote Pedr len' yo, ner Jesús mni nchab:

—¿Xa ngwi'a Simón? ¿Cho lo nyab re xa' jwan' nak sin' lo izyo re tmi low, cho lo ta las xa'y o lo re xa' tiblada?

²⁶ Pedr mkab:

—Lo re xa' tiblada.

Jesús nchab:

—Nde re tablas xa' nanakin'ta kix xa'.

²⁷ Per sa nanid xa' xis na', wa god mbel ro nit, nde blobi yis bow lo nit nde mbel ner jwan' yoga, mxen ma' nde sen' xal' la ro ma' tya zyal ti tmi, mxen tmi ya kix la chan' na nde chan' la.

18

¿Cho mas ntak lo be'?

(Mr. 9:33-37; Lc. 9:46-48)

¹ Nde len' wiz ya, re xin'te'd Jesús mbike xa' lo Jesús nde mnabdi's xa':

—¿Cho mas ndak lo yalnyebe' lo be'?

² Zyasa mbrez Jesús ti or lud nde mto Xa' or xtow' re xa',

³ nde nchab Xa':

—Galpa di's nin lo go', tez go' na'zyed ak go' nde na'akta go' xaja ti or bix, na'yoted go' lo yalnyebe' lo be'.

⁴ Jwan' nasa, men nchak nado' xaja or lud re', xa' ya ak xa' mas ntak lo yalnyebe' lo be'.

⁵ Nde ti men nkaya' ti or lud xa or re' por len, xa' ya nka' ya' na.

Jwan' ndli nchab men lo yalke

(Mr. 9:42-48; Lc. 17:1-2)

⁶ Nde tez cho thi xa' li sa na'litra' lazo' ti or bix re' na, mas jwin nda xa', tobo men ti ke nto' jwan' yen xa' nde kobi men xa' rolja nitto'.

⁷ ¡Nakap toz nak par re men lo izyo re', nzo toz jwan' ndli sa na'litra' lazo' men Dios! Thitka yoy, per ¡nathoz toz yate re men jwan' ndli sa na'litra lazo' ta xa' Dios!

⁸ Jwan' nasa, tez ya'a o nia ndli nchab la lo jwan' narax, bchoy nde blobiy, tak mas jwin yotea lo yalnaban adi' lo ngenta ti nia o ti ya'a, ke ndob rob nia o rop yaa yobia lo bel adi'.

⁹ Nde tez ngudloa ndli nchab la lo jwan' narax, blotey nde blobiy, mas jwin yotea lo yalnaban adi' kon thipta ngudloa, ke kon rop ngudloa yaa lo ki yer abil.

Di's nagan chan' ti mbakxil' mdyab

(Lc. 15:3-7)

¹⁰ Nda wi go', nakotalta go' ti or bix. Tak na ni lo go', re anj or nzi lo be', tibra nzi anj lo Xud na ndob lo be'.

¹¹ Tak Xin' Mbi' nde tola' re men ngetetab lo re jwan' narax.

¹² ¿Xa ngwi' go'? Tez ti mbi' ngeno tibayo' mbakxil', nde mdyab ti ma', ¿cho nye nalad xa' re tapwal nzo sin'tap ma' nde nda xa' re wana nda kwan' xa' ma' ta mdyaba?

¹³ Nde tez zyal xa' ma', nipa na lo go' mas nale yo lazo' xa' por ma' ya ke re tapwal nzo sin' tap ma' ta na'ndabta.

¹⁴ Taga' nak Xud go' ndob lo be', na'ncholasta Xa' tya'b nek tib or bix re'.

*Xamod lino men ti men jwan' ndli yalke lo men
(Lc. 17:3)*

¹⁵ Tez cho thi ta men la, li thi yalke loa, le'ta go' btodi's nde gus lo xa' jwan' mblino xa' lu. Tez mbin xa' xki's la mbli'a gan xa' tedib gob.

¹⁶ Tez na'gonta xa' xki's la, be' tedib xa' o ti chop xa', sa ptodi'sno go' xa' ya, sa di's ro chop men o son men jwan' mbwi'y, aka jwan' li.

¹⁷ Tez na'gonta xa' di's ro re xa' ya, gusa lo re xa' yodo', nde tez nagonta xa' di's ro re xa'yodo', zyasa bwi' go' xa' xajka ti xa' nandlid lazon' Dios nde xaja thi xa' ndli kobral tmi par Rom.

¹⁸ Nipa' na lo go', reta jwan' tobo go' lo izyo re', tyobo'y lo be', nde reta jwan' koxak go' lo izyo re', taga' yoxaka lo be'.

¹⁹ Taga' nin lo go': Tez chop go' lo izyo re' thita ak di's go' sa nya'b go' one choja jwan' lo Xud na ndob lo be', Xa' tay.

²⁰ Tak plo ndyop chop men o tson men por len, tya ndon xij re xa' ya.

²¹ Zyasa mbike gax Pedr nde nabdi's Pedr lo Jesús:

—Señor, ¿Pla gob ndablo ridndab na yek na re jwan' ndlino wes na, na? ¿Cho gaz goba?

²² Le' Jesús mkab lo Pedr:

—Nanaktey ben'ta gaz gob. Na ni, dib tiemp ndablo li ley.

Chop xa' nda'b

²³ Jwan' nasa le' yalnyebe' lo be' nak, xa nak thi rey jwan' tolo tyopte nya'b kwent lo re xa' nge sin' lo xa'.

²⁴ Lo mdobte rey mblo' rey kwent, zyasa ngwano men tib xa' nda'b por millon tmi lo rey.

²⁵ Nde xa' ya na'ngenoda xa' jwan' kix xa' jwan' ndab xa', zyasa le' rey xwan' xa' ya' mnebe' sa dyo xa' kon ngol xa', kon re xin' xa' nde reta jwan' ngeno xa', sa yax reta jwan' nda'b xa'.

²⁶ Zyasa le' xa' ya mdoxub lo rey nde mnab toz xa' lo rey nchab xa': "Xwan' na kwed go' lud, le'n yixka re jwan' nda'b na lo go"

²⁷ Nde rey ya mblat lazo' xa' mos xa', nde mton' xa' reta jwan' nda'b mos lo xa' nde mbla' xa' mos.

²⁸ Be'nta ngolo mbro' mos tya, mzyal' xa' thi ta mos xa', jwan' ndab ti tmi lud lo xa'. Nde mxen xa' yen mos ya nde mde xa' yen mos, nde nchab xa': "¡Bdix jwan' ndab la lon!"

²⁹ Le' ta mos xa' ya, mdo xub lo xa' nde mnab toz xa' nchab xa': "kwed la lud, le'n yixka re jwan' nda'b na loa".

³⁰ Per xa' ya na'ndoyalta, che'la mke' lizyi'b xa' ta mos xa', axta kebe' kix xa' jwan' ndab xa'.

³¹ Lo sen' mbwi' tedib ned ta mos xa' jwan' na, jwan' toz ngo nabil lazo' xa', nde ngwa xa' nchab xa'y lo rey reta jwan' ngotey.

³² Zyasa xa' nak rey mbrez xa' mos ya nde nchab xa' lo mos: "¡Lu nak ti mos xkap! Na mton reta jwan' ndab la lon, tak nalat mbrez la mnab lay lon.

³³ Noga lu ndablo ndlat lazo'a ta mos la xa mblat lazo'n lu."

³⁴ Zyasa jwan' toz mxi lazo' rey nde mnebe' rey mtoti xa' mos axta kebe' yax reta jwan' ndab xa'.

³⁵ Ngolo nchab Jesús jwan' na, nchaba Jesús:
—Taga lino Xud na ndob lo be' re go', tez go' na'ton'ta go' xken ta men go' dib nzo lazo' go'.

19

*Jesús ndlo' xa naka sen' lo ndla' ta men
(Mr. 10:1-12; Lc. 16:18)*

¹ Lo sen' mne nchab Jesús re jwan' na, mbro' xa' xyon Galilea nda Xa' lo xyon Judea tedib lad ro yo' Jordán.

² Nde men toz tir mdonke xis Jesús nde tya mtodan' Jesus re xa' nayiz.

³ Zyasa mbike re xa' fariseo lo Jesus mnabdi's xa' lo Jesús, sa nen' cho kwan' kab Jesús:

—¿Cho toyal la' men ngol men por kwalker jwan'?

⁴ Le' Jesús mkab:

—¿Cho tera' lab go' ten' nchab, Dios mdoxkwa' men sen' mdobte nera “xa' bi' nde ngol mdoxkwa' Xa'”?

⁵ Nde nchab Dios: “Jwan' nasa la' mbi' xud mbi' nde xna' mbi' nde tyobno xa' sal' xa', nde thita ak rop xa'.”

⁶ Tamod sa nanaktra' chop xa', thita nak xa'. Jwan' nasa men jwan' mtenta Dios nandablod li men la'ta xa'.

⁷ Nde re xa' fariseo mnabdi's:

—¿Kwanka liy sa mnibe' Moisés toyal la' xa' bi' ngol xa', ben'ta thi ye's toxkwa' xa', sa la' xa' ngol?

⁸ Le' Jesús mkab:

—Kwent ne toz yek go', jwan' nasa mda' Moisés di's la' go' ngol go', per sen mdobte nera, natada naka.

⁹ Nde na ni lo go', tez cho xa' la' ngol xa' nde nakte lo ngoxno ngol xa'ga' mbi', nde ka' xa' tedib ngol', yalke ro nak jwan' na lo xa', nde xa' ta ka ngol ta mbla' xa' ya, yalke roga naka lo xa' ya.

¹⁰ Zyasa re xin'te'd Jesús nchab lo Jesús:

—Tez ta naka ta ka mbi' ngol, maska jwin nakad mbi' ngol.

¹¹ Le' Jesús nchab:

—Nared xa' tak yen jwan' re, ben'ta lo re xa' jwan' mda' Dios di's xa' ya yena.

¹² Nzo xa' bi' na'nkad xa' ngol tak ta ngól xa', nzo xa' bi' na'nkad ngol tak mblo' men ngudkwe xa', nde nzo xa' bi' nankad ngol tak sin' tamod mbli xa', sa ke xa' sin' lo Dios. Tez cho xa' tli gan li jwan' re' toyal li xa'y.

Jesús ndli ley' re or bix

(Mr. 10:13-16; Lc. 18:15-17)

¹³ Zyasa ngwano xa' pla or bix lo Jesús, sa xob Jesús ya' Jesús yek or nde nyab Jesus lo Dios por re or; nde le' re xin'te'd Jesús mbreno xa' re xa' ta ndano or bixa.

¹⁴ Zyasa nchab Jesús lo xin'te'd Xa':

—Bta' go' di's ye'd re or bix lon, nde nakad go' di's, tak lo yalnyebe' lo be' nak chan' re xa', nak xa nak re or bix re'.

¹⁵ Nde sen' ngolo mxo'b Jesús ya' Jesús yek re or bixa, ngo Xa' ned nda Xa'.

Thi mbyo rik mdodi'sno Jesús

(Mr. 10:17-31; Lc. 18:18-30)

¹⁶ Zyasa ngwa wi' thi xa' lo Jesús nde mnab di's xa':

—Maestr wen,* ¿Cho jwan' wen ndablo lin sa gal na yalnaban adi'?

¹⁷ Le' Jesús mkab:

—¿Cho kwan ndlii ngolea na Xa' wen? Ngenta cho nak men wen, ben'ta thita Xa' wen nzo, Xa' ya nak Dios. Per tez nchola's la kaya'a yalnaban adi', bli reta jwan' nak yalnyebe' chan' Dios

¹⁸ Le' mbyo nchab:

—¿Xa nyay?

Le' Jesús mkab:

—“Nakujta la men, nagaxnot la ngol jwan' nanakta ngol la, nalit la yalwan', na'ket la yalk-win' xis men,

¹⁹ bxob yek xud la nde xna'a, nde pke' lazo'a ta men la xajka nke lazo'a le'ga lu.”

²⁰ Le' mbyo mkab lo Jesús

—Xata lud na nxobyek na reta jwan' re', ¿Cho kwanra' nchak jwad lin?

²¹ Jesús mkab:

—Tez nchola's la gal'pa ak la, wa nde pto reta jwan' ngenoa nde pta'y lo reta xa' prob, sa kenoa

* **19:16 19:16** hay tres interlineal no aparece la palabra bueno excepto uno

brotos jwan' ntak lo be', sera' de' nde ptonke xis na.

²² Lo sen' mbin mbyo jwan' na, nabil toz ngo lazo' mbyo ndya mbyo tak bro toz jwan' ngeno mbyo.

²³ Zyasa Jesús nchab lo re xin'te'd Xa':

—Nipa na lo go', ne toz yote thi xa' rik, lo yalnyebe' lo be'.

²⁴ Bere nin lo go', mas nale'tra' ridnda'b thi kamey ye'r xan' yagux, ke yote thi xa' rik lo yalnyebe' chan' Dios.

²⁵ Sen' mbin re xin'te'd Jesús jwan' na, nzoyen xa' nde nchab xa' lo ta xa':

—¿Cho li gan tola' lazo'n sa?

²⁶ Le' Jesús mbwi' lo xin'te'd Xa' nde nchab Xa':

—Par lo re men na'akta ak jwan' re', per par lo Dios reta jwan' teyal ak.

²⁷ Zyasa nchab Pedr lo Jesús:

—Ná' mbla' reta jwan' ngeno ná' nde mdonke ná' xis la, ¿Cho kwan gal ná'?

²⁸ Le' Jesús mkab:

—Nipana lo go', lo sen' sin wiz sen' ak nakub reta jwan' nde tyobsa' Xin' Mbi' plo nyebe' Xa', zyasa re go' ta ndenke xis na, re tib sen go' tyobsa', tiba go' lo thi yasil sa nyab go' kwent lo re tib sen bin xa' Israel.

²⁹ Nde reta xa' jwan' mbla' liz na', o wes na', o ptan' na', o xud na', o xnan' na', o xin' na' o xyon na', por kwent chan' na, xa' ya kaya' tib ayo' gob masra re jwan' mbla' xa', nde no kaya' xa' yalnaban adi'.

³⁰ Nde nar toz re xa' ndo ner, xa' ya yan' axta xis, nde nar toz re xa' ndo xis, xa' ya tyo ner.

20

Re mos nge sin' lo ub

¹ Nde noga' nchab Jesús:

—Le' yalnyebe' lo be' lal naka xaja nak xwan' lus ub, mbro' xa' til' nda kwan' xa' mos ke sin' lo ub xa'.

² Nde ngolo mbyan' di's xa' kix xa' ka mos xapka nka re mos, thi sin' wiza, zyasa mtel' xa' re mos lo rsin' xa'.

³ Nde mer hor ye' til' bere mbro' xa' tedib gob, nde mbwi' xa' ti pla xa' nalaj nzi lo xbi'.

⁴ Nde nchab xa' lo re xa' ya:

—“Wa go' sin' lo ub na sa kix na ka go' jwan' ndablo li go' gan”. Nde nda re xa' ya lo sin'.

⁵ Nde xa' nak xwan' ub mbro' tedib gob a wizta ba, nde bere mbro' xa' tedib gob rolja bzye, nde taga' nchab xa' lo re men nalaj nzi tya.

⁶ Nde bzye mer debixka' wiz bere mbro' xa' tedib gob ngwa xa' lo xbi', nde mbwi' xa' nzi ta pla xa' nalaj tya, nde mnab di's xa' lo re xa' ya: “¿Kwan liy sa xe nzi go' dib wiz nanked go' sin'?”

⁷ Le' re xa' ya mkab: “Tak ngen cho tera ta' sin' ke ná'.” Zyasa nchab xa' nak xwan' ub: Wa go' sin' lo ub na, sa kix na ka go' jwan' ndab lo li go' gan”.

⁸ Lo sen' mbla yal', le' xa' nak xwan' ub nchab lo xa' nyebe' lo re mos xa': “Brez re mos nde bdix ka xa', btopte bdix ka re xa' mzin xiska zyara kix la ka re xa' mzin ner”

⁹ Lo ngwa re xa' ta mbla lo sin' debixka' wiz sa, nde mdix xa' dib wiz lo kad tib xa'.

¹⁰ Xisa mbri'd re xa' jwan' mbla ner lo sin', nde mbli xa' xgab broxa yax ka xa', per taga jwan' ntak ti wiz, mkaya' xa'.

¹¹ Sen' ndoyax nka re xa' ya, tolo mbrez xa' lo xa' nak xwan' sin'.

¹² Na nchab xa: “Reta xa' ta mzin nda wiz ben'ta thib hor mke xa' sin', nde lal mdix la mka xa' xapa mdix la lo ná', nde ná' mxek mke sin' lo be dib wiz.”

¹³ Le' xa' nak xwan' lus ub mkab lo thi xa' ya nchab: “Mbi', nangetotid na lu. ¿Cho nambyandi'sta na' jwan ntak ti sin' wiz kix na kaa?”

¹⁴ Bxen tmin la nde bya. Na ncholas kix ka re xa' ta mzin nda wiza xapa mdix na mkaa ba.

¹⁵ ¿Cho na'nyed linon tmin na jwan' nda lazo'n? ¿O ta nxi lazo'a tak nabe'z nak na?

¹⁶ Jwan' nasa, re xa' ndo xiska, xa' ya tyo ner, nde re xa' ndo nerka xa' ya tyo xiska. Tak xa' toz kwe's nde lud xa' li gan yote.

Jesús bere ndej gaj Jesús

(Mr. 10:32-34; Lc. 18:31-34)

¹⁷ Sen' ndo Jesús ned nda Xa' yez Jerusalén, xa'ta mbrez Xa' re tib sen xin'te'd Xa' nde nchab Xa':

¹⁸ —Naya ndan' Jerusalén, nde le' Xin' Mbi' taya' xa' lo ya' re nglwey' jwan' nyebe' nde lo re maestr nchak ley, nde re xa' ya nyebe' sa gaj Xa'.

¹⁹ Nde taya' xa' Xin' Mbi' lo ya' re men nanakta men Israel, sa xino men Xa', kin men Xa' nde ke' men xa' lo kruz; per yoxob byon wiz ryo'xban Xa'.

Jwan' mna'b xna' Santiag nde Juan lo Jesús

(Mr. 10:35-45)

²⁰ Zyasa mbike xa' got Zebedeo kon rop or xin' xa' lo Jesús, nde mdoxub xa' sa nya'b xa' jwan' nchala's xa' lo Jesús:

²¹ Nde Jesús mnab di's lo ngol:

—¿Cho kwan nchola's la?

Le' ngol mkab:

—Chola's na sen' tyob la nyebe'a, ta'a di's sa rop xin' na re' tyob choa, tib or tyob lad ban la nde tedib or tyo lad beg la.

²² Le' Jesús mkab lo re yon xa':

—¡Na'nyed go' cho kwan ta nyab go'! ¿Cho tli go' gan rid ndab go' reta yalti rid na?

Nde xa' nchab:

—Tli ná' gan.

²³ Jesús nchab:

—Liga trid go' re yalti rid na, per ta tyob go' lad ban na nde lad beg na, nanada ndablo tay, tak Xud na Dios mbli'a cho lo ta' xa'y.

²⁴ Lo sen' mbin ti tsi' xin'te'd Jesús jwan' na, mbi'no xa' rop wes xa' ya.

²⁵ Per Jesús mbrez re xin'te'd Xa' nde nchab Jesús lo re xa':

—Mne go', reta xa' jwan' nyebe' xis izyo re', nyebe' xa' xa' nda lazo' nde re xa' nchap sin' ro, ndli xa' jwan' nda lazo' xa' kon yalnyebe jwan' ngeno xa'.

²⁶ Nde xij re go' natada ndablo aka. Tez cho nchola's ak xa' mas ntak xij go', xa' ya ndablo li sin' lo re go',

²⁷ nde tez cho nchola's tyo ner lo re go', xa' ya ndablo li sin' lo re go'.

²⁸ Ta xa Xin' Mbi' nambyeta Xa' sa li men sin' lo Xa', le' Xa' mbyed sa li Xa' sin' lo re men, nde ta' Xa' yalnaban chan' Xa' sa yax lya' bro toz men.

*Jesús ntodan' chop xa' nkow lon'
(Mr. 10:46-52; Lc. 18:35-43)*

²⁹ Sen' ndaro' Jesús kon re xin'te'd Xa' yez Jericó, men toz tir mdonke xis Jesús.

³⁰ Zyasa chop mbi' nkow lon' ndob ro ned nde sen' mbin xa', le' Jesús ndarid tya mbrez yaj rop xa' nchab xa':

—¡Señor, Xa' nde lo bin David, blat lazo'a ná'!

³¹ Nde re men ngok nayi' lo rop xa' ya sa na'kwesta xa', nde rop xa' che'la masra' ne mbrez:

—¡Señor, Xa' nde lo bin David, blat lazo'a ná'!

³² Zyasa ngoto Jesús, nde mbrez Jesús rop xa' ya nde mnabdi's Jesús lo xa':

—¿Cho kwan nchola's go' lin lo go'?

³³ Le' rop xa' ya nchab:

—Señor, ná' chola's wi'.

³⁴ Nde Jesús mblat lazo'n rop xa' ya, mbwal Jesús ngudlo rop xa', nde zyaga ngoni ngudlo xa' mbwi' xa' nde mdonke rop xa' xis Jesús.

21

Jesús ngote len' yez Jerusalén

(Mr. 11:1-11; Lc. 19:28-40; Jn. 12:12-19)

¹ Sen' ndasin re xa' gax yez Jerusalén, mzin xa' yez Betfagé, xan' yi' Olib, tya Jesús mbloned chop xin'te'd Xa',

² nde nchab Jesús lo rop xa':

—Wa go' yez lud ta nax lad tso ba. Tya zyal go' thi bur gol ngedo' kon bur lud xin' ma', xak go' rop ma' nde yedno go' ma'.

³ Tez cho xa' kwan nye lo go', gab go' lo xa', Señor nakin' ma', nde mas naba se're Xa' ma'.

⁴ Jwan' re' ngote sa ngok jwan' mni profet, sen' nchab xa':

⁵ Gus go' lo re xa' yez Sion:

“Bwi', le' Rey la nde loa,
nado' Xa', ndob Xa' xis bur,
ti xis bur yen', xin' ma' nche' yo”

⁶ Nde xin'te'd Jesús ngwa nde mbli xa' xata
mnabe' Jesús lo xa'.

⁷ Nde mbe' xa' bur gol kon xin' ma' nde mxob
xa' xab xa' xis ma', nde mdob Jesús xis ma'.

⁸ Nde re men toz tira, rol xa' mtoga' xa' lar nzo'b
xis xa' lo ned, nde rol xa' mcho' xod ya nde mdi'x
xa' lo ned ten' ndorid Jesús.

⁹ Nde reta men ndasiblo nde reta men ndenke
xis, tolo ne mbrez xa' nchab xa:

—¡Naro nak Xa' nde lo bin rey David! ¡Nabe'z
nda Xa' jwan' nde kon le Dios! ¡Naro toz nak Dios
ndob lo be'!

¹⁰ Lo sen' ngote Jesús len' yez Jerusalén, reta
men yez ya nche'pa nchak xa' nyab di's xa' lo ta
xa':

—¿Cho xa' ba?

¹¹ Re men mkab:

—Xa' re' nak profet ndole Jesús, xa' yez Nazaret
xyon Galilea.

Jesús ntombi yodo'

(Mr. 1:15-19; Lc. 19:45-48; Jn. 2:13-22)

¹² Xisa Jesús ngote ten' ndob yodo' chan' Dios,
nde mblo'te Jesús reta xa' nzi tho nde reta xa' nzi
ti' tya. Mchixkwe Jesús re mes xa' nsil' tmin re
men, nde re yasil chan' re xa' ntho palom;

¹³ nde nchab Jesús lo xa':

—Lo xki's Dios nchab: “Le' liz na ryole, yo
todi'sno men Dios*”, per liz xa' wan' mblilal go'y.

* **21:13 21:13** *Yo ndodi'sno men Dios*

14 Tya len' yodo' mbike gax pla xa' nkow lon' nde pla xa' ngo'b nin' lo Jesús, nde Jesús mtodan' re xa'.

15 Lo sen' mbwi' re nglwey' jwan' nyebe' lo re nglwey' nde re maestr nchak ley, reta yalnaro jwan' ndli Jesús, nde mbin xa' xa mbez ne re or yen' len' yodo': "Naro nak Xa' nde lo bin David", ngo naxi lazo' re xa' ya

16 nde nchab xa' lo Jesús:

—¿Cho nchon la re jwan' mbez re or ba?

Le' Jesús mkab:

—Aa' nchon nay. ¿Cho tera' lab go' ten' nchab:

"Lu mbli sa ro re or bix nde ro re mbed nchu' nis gol or re di li naro or lea?"

17 Nde mbli' Jesús re xa' ya, mbrote Jesús nda Xa' yez Betania, tya mbled Xa' yal' ya.

Jesús mkede ya hig

(Mr. 11:12-14,20-26)

18 Nde til', lo mbere Jesús nda xa' yez Jerusalén, mzib ndyan' Xa'.

19 Nde mbwi' Jesús thi ya hig ndob gax ro ned, nde ngwa twi' Xa' lo ya nde na'ngenta ngud lone'y, ben'ta la ndoy. Zyasa nchab Xa' lo ya:

—¡Nekthib ngud naketra loa! Nde zyaga mbis ya hig.

20 Lo sen' mbwi' re xin'te'd Jesús jwan' ta ngoka, nzoyen re xa' nde mnabdi's xa' lo Jesús:

—¿Xamod sa atil tir mbis ya hig re'?

21 Le' Jesús mkab:

—Nipana lo go', tez ndlipa lazo' go' nde nan-chakropta xgab go', nanakta ben'ta jwan' ta mbli-non ya hig toyal li go', che'la toyal gab go' lo yi' re': "Bike nde gobi len' nitto", nde taka.

²² Nde reta jwan' nyab go' lo Dios sen' ndodi'sno go' Dios, tez ndlipa lazo' go'y, Xa' ta'y lo go'.

Yalne chan' Jesús

(Mr. 11:27-33; Lc. 20:1-8)

²³ Sen' lo ngote Jesús len' yodo', laja nge lo' Jesús xki's Dios lo men, zyasa mbike re nglwey' jwan' nyebe' nde re xa' gox jwan' nyebe', mnabdi's xa' lo Jesús:

—¿Cho mda' yalne loa ta ndlia re jwan' re'?
¿Cho mda'y loa?

²⁴ Nde Jesús mkab:

—Noga na nyabdi's ti jwan' lo go', tez tkab go'y, sera' sa non tej lo go' cho mda' yalne ndlin reta jwan' re'.

²⁵ ¿Cho mtel' Juan sa mblo'le Juan men? ¿Cho Dios mtel' xa' o men na?

Zyasa re xa' ya mdodi's xa' nen' xomod kab xa' nde nchab xa' lo ta xa':

—Tez gab na' Dios mtel' Juan, zyasa nye xa' lon', ¿Kwanka liy sa na'ndlid lazo' go' Juan?

²⁶ Nde tez gab na' na mena, nzyeb na' men yez, tak reta xa' ndli lazon' Juan ngok tib profet.

²⁷ Zyasa mkab re xa' lo Jesús:

—Na'nyed ná'y.

Nde Jesús nchab lo xa':

—Noga na na'tejta na lo go' kon cho yalne ndlin re jwan' re'.

Di's nagan chan' chop mdyen'

²⁸ Jesús nchab lo xa'

—¿Xa ngwi' go' jwan' re'? Thi mbi' ngeno chop xin' na' or bi', nde nchab xa' lo or ner: “xin' na, wa sin' lo ub na wiz re”

²⁹ Le' xin' xa' mkab: “¡Na'yatna!” Per xiska mzye' xgab or ngwar sin'.

³⁰ Xisa taga' nchab xa' lo tedib or nde or ya mkab: “Mbay, xud na, nasa ndan”. Nde na'ngad or.

³¹ Lo rop or ¿xa nyar mbli jwan' mnabe' xud or?

Le' re xa' mkab:

—Or nera mbliy.

Zyasa nchab Jesús lo re xa':

—Nipa na lo go', re xa' nthop tmi par Rom nde re ngol ntho lad na' ner re xa' ya yote ten' nyebe' Dios ke go'.

³² Tak mbyed Juan, mbye'd lo' mod gal' jwan' ban go', nde na'ndlid lazo' go' xa'; nde re xa' nthop tmi par yez Rom nde re ngol ntho lad na' mbli lazo' xa' Juan. Nde le' re go' te'nye mbwi' go' re jwan' mbli Juan, na'ndlad go' re jwan' narax nak go', sa ndli lazo' go' xa'.

Re mos narax nak

(Mr. 12:1-12; Lc. 20:9-19)

³³ Bin go' tedib kwent: Ngo ti mbi' ngeno izyo, nde mblobin xa' lus ub lo ney, nde mtow' xa' diba, mden' xa' len' ney ten' mdoxkwa' xa' ti' xa' ub, nde mta' xa' thi yo gap ndab li sin' kenap xa' diba. Nde mda' xa'y kwent rol lo pla xa' nchak ndli sin' lo ub, nde ngo xa' ned nda xa' tij.

³⁴ Nde sen' mzin be' dyop ub, mtel' xwan' lus ub', pla mos xa', sa yakaya' mos jwan' nda' lus ub jwan' nak chan' xa'.

³⁵ Per re xa' ta ngeno lus ub kwent rola, mxen xa' re mos ya, ti mos mdin xa', ti mos mbij xa' nde ti mos mbwadke xa'.

³⁶ Bere mtel' xa' nak xwan' lus ub masra mos, nde taga mbli no xa' re mos ya.

³⁷ Lulka mtel' xa' xin' xa' tak mbli xa' xgab: “Txobyeke xa' xin' na”.

³⁸ Per re xa' ta ngeno lus ub kwent rola, sen' mbwi' xa' xin' xa' nak xwan' lus ub, nchab xa' lo ta xa': Xa re' yan'no izyo nzo lus ub, kuj na' xa', sa na' yan'noy.

³⁹ Zyasa mxen xa' xin' xa' nak xwan' lus ub, nde mblote xa' xa' lad le nde tya mbij xa' xa'.

⁴⁰ Mbay lo sen' ye'd xa' nak xwan' lus ub, ¿Cho kwan lino xa' re xa' ta ngeno lus ub kwent ro la?

⁴¹ Le' re xa' ya nchab:

—Na'lyata lazo' xa', kuj xa' re xa' ta nakap naka, nde taya' xa' lus ub kwent rol lo xaga men jwan' liga taya' ub sen' ngol be'y.

⁴² Nde Jesús nchab lo re xa':

—¿Cho tera lab go' lo xki's Dios ten' nchab:
Le' ke jwan' mblo'tal xa' nta' yo,
ke ya ngolal ke ntak toz lo dib yo.
Le' jwan' re' mbli Dios,
nde nzoyen na' ngwi' na'y.

⁴³ Jwan' nasa nin lo go', yi'b yalnyebe' chan' Dios lo ya' go', nde ta' Xa'y lo re men jwan' liga li jwan' nchola's Dios.

⁴⁴ Nde tez cho xa' gab xis ke re' tiptane ga's xa', nde tez cho gab ke re' xis na' thiptane ga'ski' xa'.

⁴⁵ Nde sen' mbin re nglwey' jwan' nyebe' nde re xa' fariseo kwent ya, mbyen xa' ke xis xa' ndo ni Jesús re jwan' na.

⁴⁶ Zyasa re xa' ya' mkwan' mod nen' xa' yoga Jesús, per nzyeb xa' re men yez, tak re men yez ndli lazon', Jesús nak profet chan' Dios.

22

Kwent chan' yaltselya'

¹ Jesús mdohte tedib gob mdej Xa' tedib kwent nde nchab Xa':

² Le' yalnyebe' lo be' nak xaja nak thi rey mbli ti yaltselya' par xin' bi' xa'.

³ Nde mtel' rey re mos rey sa yaches mos re men nakdi'sla ya lo yaltselya', per re xa' ya na'ndeyalta xa', na'ngad lo yalselya'.

⁴ Nde bere mtel' xa' tedib ned mos nde nchab xa' lo mos: "Gus go' lo re xa' nak di's ye'd, mdoxkwaa na jwan' ya yalway. Ngujla re ngon nde re ma' nchal', naksa'la re jwan', de' go' lo yaltselya'."

⁵ Nde re xa' ya na'ndyod xa' nga xa' lo yalselya', tib xa' nda sin' wan nde tedib xa' nda lo xa'ga' rsin' xa'

⁶ nde tedib ned xa' mxen xa' re mos rey nde mke' xa'y cho mos nde mbij xa' re mos.

⁷ Lo sen' mbin rey jwan' na, ngok nayi' toz xa' nde mtel' xa' re sondad kuj re men ta mbij re mos xa', nde mtol' xa' yez men ya.

⁸ Zyara sa nchab rey lo re mos rey: "Naksa'la reta jwan' sa yo yaltselya' per reta xa' nakdi's la ye'd lo yaltselya' na'nsal'ta xa' ye'd xa'.

⁹ Naya wa go' re ned ro nde brez go' a choja re xa' zyal' go' sa ye'd xa' lo yalselya'."

¹⁰ Nde ngwa re mos re ned ro, nde mthop xa' reta men mzyal' xa', men wen nde re men narax, nde mze ten' ngo yalselya' mbre re men.

¹¹ Lo sen' ngote rey plo nzo yalselya', sa wi' xa' re men nzi lo yalselya', nde mbwi' rey thi mbi' nanokxabta xa nchok xab re xa' nda lo yaltselya'ba.

¹² Nde nchab rey lo mbi' ya: “Amig, ¿Xamod ngotea nche'ya nde nanokxabta la xa nokxab re xa' ta nda lo yalselya'? Nde mbi' ya na'nkapta.

¹³ Zyasa nchab rey lo re xa' nsili sin' tya: “Btobo go' ni xa' nde ya' xa' nde blobi go' xa' le lo yal'kow, tya gon xa' nde tyes kele xa'”.

¹⁴ Tak bro toz xa' kwe's, nde lud xa' kwi Dios.

Tmi nchax lo yez Rom

(Mr. 12:13-17; Lc. 20:20-26)

¹⁵ Zyasa ngo re xa' fariseo ned nde ngok di's xa' nen' kwan gab xa' lo Jesús, sa jwan' kab Jesús, ke' xa' yalke yek Jesús.

¹⁶ Nde mtel' xa' pla xin'te'd xa' kon pla men Herodes, nde nchab xa' lo Jesús:

—Maestr, mne ná' ke li tir kwent nda'a nde ndlo'a xki's Dios xata naka, nde nambit la men tak lal ndak reta men loa.

¹⁷ Mbay mne lo ná', xa ngwi'a: ¿Cho gal' naka kix men tmi jwan' nya'b rey César o nagal'tey?

¹⁸ Per Jesús nzolola jwan' narax nzo lazo' re xa' ya, nchab Jesús lo re xa':

—¡Men rop ro! ¿Cho kwan liy nkwan' go' xa ke' go' yalke yek na?

¹⁹ Blo' go' tmi jwan' ngix go' lo Rom. Nde mblo' xa' thi tmi denario lo Jesús.

²⁰ Zyasa nchab Jesús lo re xa': ¿Cho xa' ta nge lo tmi re', nde cho le ta nge lo ney?

²¹ Le' re xa' ya mkab:

—Chan' rey César.

Zyasa nchab Jesús lo re xa' ya:

—Pta' go' lo César jwan' nak chan' César nde pta' go' lo Dios jwan' nak chan' Dios.

²² Sen' lo mbin re xa' jwan' na, nzo yen re xa' nde mbla' xa' Jesús ngo xa' ned nda xa'.

*Nyabdi's xa' lo Jesús kwent chan' ryo'xban men
(Mr. 12:18-27; Lc. 20:27-40)*

²³ Le'ga wiz ya, ngwa pla xa' saduceos lo Jesús. Re xa' ya nandlid lazon' ndryo'xban re men nde mnabdi's xa' lo Jesús:

²⁴ —Maestr, Moisés nchab: Tez thi xa' bi' gaj nde na'ngenta xin' xa', wes xa' ndablo tselya'no ngol xa' sa ko'xban wes xa' bin xa'.

²⁵ Xij ná' re ngo ti liz xa' ten' ngo gaz xa' lo re wes xa'. Xa' ner lo re xa' mselya' nde nguj xa', nde na'ngalta xin' xa', nde wes xa', xa' ndanke xis xa' ya mselya'no ngol.

²⁶ Taga' nguj xa' ya, nde taga' ngote xa' mbyon, axta kebe' re gaz xa' mselya'no ngol nde taga' nguj xa'.

²⁷ Xisa, noga ngol nguj.

²⁸ Sen' ryo'xban re men, ¿Lo ta re gaz xa' mdobno ngol, xanya xa' ak sal' ngol?

²⁹ Zyasa mkab Jesús lo re xa':

—Mbwan go', tak nanchenta go' xki's Dios neka yalne chan' Dios.

³⁰ Tak sen' lo ryo'xban re xa' nguj, na'selya'd xa' nde nata'd xa' xin' got xa' selya', tak re xa' ak xa' nak re anj chan' Dios nzi lo be'.

³¹ Le' lo ta ryo'xban re xa' nguj, ¿cho tera lab go' ten' nchab? jwan' yub Dios mni:

³² “Na nak Dios chan' Abraham, Dios chan' Isaac nde Dios chan' Jakob”. Dios, nanakta Dios chan' re xa' nguj, le' Dios nak Dios re xa' naban.

³³ Lo mbin re men jwan' na, nzoyen xa' re jwan' ndlo' Jesús.

Yalnyebe' ro

(Mr. 12:28-34)

³⁴ Lo sen' mne re xa' fariseo xa mtow' Jesús ro re xa' saduceo, zyasa mdyo'p re fariseo

³⁵ nde thib xa' ya nak maestr lo ley, mnabdi's xa' lo Jesús nyen' kwan kab Jesús, nchab xa':

³⁶ —Maestr, ¿Xa nya yalnyebe' mas ntak nge lo ley chan' Moisés lo re naka?

³⁷ Le' Jesús mkab:

—“Pke' lazo'a Señor nak Dios la dib nzo lazo'a, dib xbin la nde dib xgab la”.

³⁸ Jwan' re' nak yalnyebe' ner nde yalnyebe' mas ntak.

³⁹ Nde le' jwan' brop mer lal naka: "Pke' lazo'a ta men la xa nke' lazo'a lega lu."

⁴⁰ Nde lo rop yalnyebe' re' ngenden reta yalnyebe' nge ni lo ley nde reta jwan' mke' re profet.

¿Cho lo bin nde Crist?

(Mr. 12:35-37; Lc. 20:41-44)

⁴¹ Laja thita nzi re xa' fariseo tya, Jesús mnab di's lo re xa',

⁴² nchab Jesus:

—¿Cho xgab ndli go' ngwi' go' Crist? ¿Cho lo bin nde Xa' ndyak go'?

Le' re xa' fariseo mkab:

—Lo bin chan' David nde Xa'.

⁴³ Zyasa nchab Jesús lo re xa':

—¿Xomodka naka sa nchab David, Xa' Nyebe' lo Xa'? sen' por Mbi Nayon mni David:

⁴⁴ Le' Dios nchab lo Xa' Nyebe' lon:

“Ptob lad ban na,
axta kebe' ton re xa' ngi'noa lo nia”

⁴⁵ ¿Xomod ye'd Crist lo bin David tez lega le' David
ni lo xa', Xa' Nyebe'?

⁴⁶ Nde nekthib xa' na'ndlid gan nkab ne' thiblan
di's lo Jesús, nde axta wiz ya ngetra cho nabdi's lo
Jesús.

23

*Jesús ngoxob xa nak re xa' fariseo nde re maestr
nchak ley*

(Mr. 12:38-40; Lc. 11:37-54; 20:45-47)

¹ Xisa, nchab Jesús lo re men nde lo re xin'te'd
xa':

² —Re maestr lo ley nde re xa' fariseo, nak xa'
nzi sa lo' xa' ley chan' Moisés

³ Jwan' nasa re jwan' nye xa' lo go' li go',
bxobyek go'y nde bli go'y, per na'lid go' xa ndli
xa', tak xa'ga jwan' mbez xa' nde xa'ga jwan' ndli
xa'

⁴ Tak ndlino xa' re men xaja ndli ti men ntob yo'
ne toz nga ngen cho li gan we, nxo'b xa'y yen re
men, nde le' xa' nek lud nanda'ya'd xa' la'sto xa'
men sa we mena.

⁵ Nde reta jwan' ndli xa', ndli xa'y sa yoyen men
jwan' ndli xa'. Ndyen xa' tobo xa' yen ya' xa' nde
ke' xa' cholo xa' yid nol' jwan' nge xki's Dios lon',
nde nakij xa' nchok xa' lar nol'.

⁶ Nde ndyen xa' tyob xa' ten' ndyob re xa' ntak
ten nzo yalwa, nde taga' ndli xa' len' re yo ten'
ndyop xa' Israel.

⁷ Nde ndyen xa' ni men dyux lo xa' lo xbi', nde
gab men lo xa': maestr.

⁸ Per go', na'ta'd go' di's ko'le men go' maestr, tak thita Xa' nak Maestr go', Xa' ya nak Crist*, nde reta go' thita wes go'.

⁹ Nde na'koled go' xud go' nek tib xa' lo izyo re', tak thita Xa' nak Xud go', le' Xa' ndob lo be'.

¹⁰ Ne'ka ryo'le go' maestr, tak thipta xa' nak maestr go', Xa' ya nak Crist.

¹¹ Xa' jwan' mas ntak xij go', xa' ya ndablo li sin' lo re go'.

¹² Tak xa' nchak naro, xa' ya ryo'yantho nde xa' ndla yek na', xa' ya ak naro.

¹³ Per, ¡Nalat nya go', maestr nchak ley nde re go' xa' fariseo, makwin'!, tak ntow' go' lo re men sa na'yoted men lo yalnyebe' lo be'. Tak neka go' yote nde ne'ka ta' go' di's yote re men nchal yote.

¹⁴ ¡Nalat nya go' maestr nchak ley nde go' fariseo, makwin'!, tak nkib go' liz re ngol nguj sal' na', nde sa na'lo'd jwan' ndli go', nol' toz ndodi's go' sen' ndyodi'sno go' Dios. Lo ta ndli go', mas naro yalke nxo'b go' xis go'.

¹⁵ ¡Nalat nya go', maestr nchak ley nde re go' fariseo, makwin'!, izyo nde nitto' ndye go' nkwan' go' men li lazon' jwan' ndli lazo' go', nde lo ndli go' gan ndli lazo' xa'y, mblilal go' xa' ya, thi xa' mas nzal' ya ye'r abil ke go'.

¹⁶ ¡Nalat nya go', ngo'b kow go' ned lo men! Mbez go': "Ngen kwan liy tez cho xa' ntobro yodo' chan' Dios, lo sen' nda' xa' xki's xa' li xa' thi jwan', per tez ntobro xa' jwan' or nzo len' yodo', xa' ya ndablo li jwan' mke' yek xa'."

* **23:8 23:8** En algunos interlineales griego no aparece el Cristo

¹⁷ ¡Ngenta xgab yek go' nde men nglwe go'! Tak ¿Cho kwan' mas ntak, cho re jwan' or nzo len' yodo'y o yodo' jwan' ndli yon re jwan' ora?

¹⁸ Noga mbez go': "Ngen kwan liy tez cho thi xa' nda' xki's na' li thi jwan' nde ntobro xa' plo ntol' xa' re jwan' yon, per tez ntobro xa' jwan' yon ta nzi lo ya, xa' ya ndabloga li jwan' mke' yek xa'."

¹⁹ ¡Ngenta xgab yek go' nde men nglwe go'! ¿Cho kwan mas ntak, cho jwan' yona o ten' ntol' xa' re jwan' yon sa nchak nayon na?

²⁰ Tak xa' ta nda' xki's na' nde ntobro xa' ten' ntol' xa' re jwan' yon, nanaktey ben'ta jwan' na ntobro xa', noga re jwan' nzi'b lo ne'y nge tobro xa'.

²¹ Nde xa' jwan' ntobro yodo', nanaktey ben'ta yodo' nge tobro xa', noga Dios nge tobro xa', tak tya nzo Dios.

²² Nde xa' jwan' ntobro be', noga' nge tobro xa' ten' ndyob Dios nyebe' Dios nde noga' yub Dios ta ndyob tya nge tobro xa'.

²³ ¡Nalat nya go', maestr nchak ley nde re go' fariseo, makwin'! Tak nda' go' dyezmo chan' pthyon, chan' kolantr, chan' re la ncho komid nde ndla' go' re jwan' mas ntak lo ley, xa nak: Re jwan' gal', yalndlat lazo' nde bli lazo' go' Dios. Re jwan' re' ndablo go' li go' nde nalad go' li go' temasa.

²⁴ ¡Ngo'b kow go' ned lo men, tak ndli go' xa ndli xa' ngote mchu's lo nit nchu', per ngab xa' ti kamey!

²⁵ ¡Nalat nya go', maestr nchak ley nde re go' fariseo, makwin'! Go' nak xaja bas nde yen, ntach go' xis ne'y, per yek go' sey nzo re yalwan' nde re yaltablas'.

26 ¡Fariseo xa' nkow lon'! Nerla ptombi go' jwan' nzo len' bas nde jwan' nzo len' yen, sa taga mbi xis ne'y.

27 ¡Nalat nya go', maestr nchak ley, nde re go' fariseo, makwin'! Nak go' xaja ba' nawe nakits nya xis na' nde len' ne'y se nzo re sij xa' nguj nde reta jwan' bew.

28 Taga nak go', ben' xis ndlo' go' nabe'z toz nak go' lo re men, per yek go' sey nzo reta yalkwin' nde reta yalxkap.

29 ¡Nalat nya go', maestr nchak ley, nde re go' fariseo, makwin'! Tak ntoxkwa' go' ban' re profet nde nawe nya re jwan' ndob go' yek ban' re xa' gal' mdo lo Dios,

30 nde mbez go': "Tez na' ngo tyemp ngo re xa' gox lon' pola, na'ngod na' xij re xa' mbij re profet".

31 Le'ga le' go' ndej go' jwan' nak go', ke lo bin re xa' mbij profet nde go'.

32 ¡Noga go', ptolo go' jwan' mtobte re xa' gox lo go'!

33 ¡Xaja nak mzi'b ba nak go'! ¡Go' ba nya lo bin mzib ba nak go'! ¿Xa lya' go' lo yalnathoz chan' ye'r abil?

34 Jwan' nasa, tel' na lo go' re profet, re xa' nchak nde re maestr nchak ley. Per pla xa' kuj go' nde pla xa' ke' go' lo kruz, nde pla xa' kin go' len' re yo ten' ndyop xa' Israel, nde cho'bla go' xa' yez kon yez.

35 Sa yek go' ya reta yalke ta mbij xa' re men gal' mdo lo Dios xis izyo re', xata Abel axta Zacarías xin' Berequías jwan' mbij go' xlaj ten' ntol' xa' jwan' yon nde ten' nayon len' yodo'.

³⁶ Nipa na lo go', le' reta yalke ta nguj re xa' ya, ye'd xis re men nzo na tyemp re'.

Jesús nchon'no yez Jerusalén

(Lc. 13:34-35)

³⁷ ¡Men yez Jerusalén, men yez Jerusalén, go' ta nguj re profet nde ngadke go' re xa' ntel' Dios lo go'! ¡Pla gob ncholas na nthop na re xin' la xa nthop ngidtan re chuy xan' xil' ma' nde na'ndoyalta la!

³⁸ Naya, bwi' go' nea, le' liz go' ba',

³⁹ tak nin lo go', na'wi'tra go' na naya, axta kebe' sin wiz gab go': “¡Nayon nak xa' nde lo le Xa' Nyebe'!

24

Jesús ndej yub yodo'

(Mr. 13:1-2; Lc. 21:5-6)

¹ Sen' mbro'te Jesús len' yodo' nde ndoyo Xa' ned, zya mbike re xin'te'd Xa' lo Xa' sa lo' xin'te'd Xa' xa nawe natoxkwa' yodo'.

² Le' Jesús nchab lo re xa':

—¿Bwi' go' re jwan' re' nea? Nipa na lo go', nek thib ke na'kwekwa'da xis ta ke. Dib tira bil.

Re jwan' ak sen' ndoyolo tyemp

(Mr. 13:3-23; Lc. 21:7-24)

³ Lo sen' ndob Jesús yi' Olib, zyasa xa'ta mbike gax re xin'te'd Jesús, nde mnabdi's xa' lo Jesús nchab xa':

—Ptej lo ná, ¿pol ak reta jwan' re', nde xa nya re jwan' ak be' sen' lo ye'd la, nde sen' ndoyolo tyemp?

⁴ Zyasa mkab Jesús nde nchab Xa':

—Nda wi' go', sa nek tib men nakwin'nod xa' go'.

⁵ Tak bro toz xa' ye'd nde li rsin' xa' len, gab xa': “Na nak Crist”, nde men toz kwin'no xa'.

⁶ Nde gon go' nzo byo, nde gon go' xyo'bdi's yo byo, per na'zyebta go', tak nakin' ak reta jwan' re', per nanakta zya yolo tyemp.

⁷ Tak ti yez ke' byo kon tib yez, nde ti rey ke' byo kon tib rey, yo win, yo yis nde nar ten' win xo toz.

⁸ Nde reta jwan' re' ak xan' reta yalnathoz ye'd.

⁹ Zyasa taya' re men go' sa toti xa' go', kuj xa' go', nde gi'no reta men go' kwent ndli lazo' go' na.

¹⁰ Zya nar toz xa' tya'b, la' xa' xki's Dios, nde taya' xa' ta xa' sa toti men xa' nde gi'no xa' ta xa'.

¹¹ Nde yo na'r toz re profet kwin' nde men toz kwin'no xa'.

¹² Lo jwan' toz ryo re yalnarax, men toz la' xa' yalke' lazo'.

¹³ Per xa' tibra' ne tyo axta lulka, xa' ya lya'.

¹⁴ Nde xki's Dios, yaja lo re men dib nax izyo, sa reta men yolo xki's Dios, axta zyara sa yaloy.

¹⁵ Jwan' nasa, sen' wi' go' ten' nayon nzo jwan' xkap toz tir li bew reta jwan', ta mdej profet Daniel —Xa' ndlab jwan' re' ndablo yen xa'y—,

¹⁶ zyasa re xa' nzo xyon Judea, xyon' xa' ya xa' re yi'.

¹⁷ Nde cho xa' ndo yek yo liz xa', na'lyad xa' yalote xa' nek tib chan' xa' we xa',

¹⁸ nde cho xa' ndo len' wan, na'bered xa' ya xi' xa' lar nxyo'b xis xa'.

¹⁹ ¡Per nalat toz tyak re ngol jwan' ndo yis tan, nde re ngol nka mbed ben' nchu' nis wiz ya!

²⁰ Mna'b go' lo Dios sa na'xyon'ta go' tyemp nxyo'b yop nde wiz jwan' ndryo'xkwen men.

²¹ Tak zyasa jwan' toz tir yo yalnathoz jwan' tera' yo xata mbre ner men xis izyo axta naya, nde na'yotra'y.

²² Nde tez Dios na'todopta tyemp ya, na'ngen cho lya', nde por kwent chan' re men jwan' mblía Dios jwan' nasa todop Dios tyemp ya.

²³ Zyasa tez cho nye lo go': "Wi' go' le' Crist ndo nche' ya", o "Wi' go' le' xa' ndo ba", na'lid lazo' go'y.

²⁴ Tak yoche' re xa' kwin', gab xa' na nak crist nde na nak profet, nde li xa' re jwan' nzoyen re men wi' men, nde re yalnaro toz sa kwin'no xa' re men nde axta no re xa' mblía Dios kwin'no xa' xa'.

²⁵ Ax nia nay lo go'.

²⁶ Jwan' nasa tez nye xa' lo go': "Wi' go', le' xa' ndo lad izyo biz", na'yad go' tya, o tez nye xa' lo go': "Wi' go', le' xa' ndob len' yo ba", na'lid lazo' go'y.

²⁷ Tak ta xa ndlya belti' ned ten' nche'dke wiz nde ndlo'y axta ned ncha'd wiz, taga' mod ak sen' lo ye'd Xin' Mbi'.

²⁸ Tak one ploja nax ma' nguj tya ndyope re ngol.*

Sen bere Xin' Mbi'

(Mr. 13:24-37; Lc. 21:25-36; 17:25-36; 12:41-48)

* **24:28 24:28** Che' ti mod ndryo'xkan di's re': Ta xa tij ndo men ndlo' nax ti ma' guj, lo ta tya nchak ngol, taga' sen' wi' men re jwan' na, zyasa mne men le' Crist nde.

29 Sen' ben'ta ngolo mbri'd re yalti toz tyemp ya, yu' wiz nde na'torxnid mbe' nde gab reta mbel nzi'b lo be', nde dib yalne chan' be' win.

30 Zyasa le' yalnaro chan' Xin' Mbi', lo' lo be' nde reta xa' nzo lo izyo kwesyaj xa' gon xa', nde wi' xa' Xin' Mbi' nde xis xkow lo be' kon yalne nde yalnyebe' toz chan' Xa'.

31 Nde tel' Xa' re anj chan' Xa' kwes ne toz trompet nde thope anj reta xa' jwan' mblía Dios dib nax izyo, axta ten' ndyobte izyo nde axta ten' ndib izyo.

32 Pte'd go' jwan' ndlo' ya hig: Sen' ndryo' bey lo ne'y nde ndryo' xo'b la yen' na, zyasa mne go' le' be' yi nde gaxla.

33 Taga' go' sen' wi' go' re jwan' re', mnega go' le' Xa' ndogaxla ye'd.

34 Nipa na lo go', nared men nzo tyemp re' gaj axta kebe' ak reta jwan' re'.

35 Be' nde izyo tlux loy per xki's na na'luxta, le'y a akay.

36 Per wiz nde hor aka na'ngen cho nyey, ne'kla re anj nzi lo be', ben'ta Xud na Dios mney.

37 Ta xa ngoka tyemp ngo Noé, taga mod aka sen' lo ye'd Xin' Mbi'.

38 Tak len' re wiz sen' tera lya yi xu' toz tira, re xa' nzi ya nde nzi yu' xa' nit, nzi selya' xa' nde nda' xa' xin' xa' selya', axta kebe' ngote Noé len' bark,

39 nde na'gonta xa' di's axta kebe' mbla yi xu' toz tira', nde mblyow re xa', taga aka sen' ye'd Xin' Mbi'.

40 Zyasa chop xa' nge sin' wan, thib xa' yo' nde tib xa' ba'.

⁴¹ Chop ngol nge to' jwan' ro molin, thib ngol yo' nde tib ngol ba'.

⁴² Jwan' nasa, brena go', tak na'nyed go' cho hor yal na.

⁴³ Per byen go' jwan' re', tez xa' nak liz yo nye xa' cho hor lya wan' liz xa', tobna xa' nde na'tad xa' di's lya wan' liz xa'.

⁴⁴ Jwan' nasa, noga go' tibra' brena go', tak le' Xin' Mbi' ye'd hor jwan' nandlid go' xgab.

*Thi mos wen nde thi mos xkap
(Lc. 12:41-48)*

⁴⁵ ¿Cho nak mos tibra' ndo nde nzo xgab yek na'? Lo mos ya tan'no xa' nyebe' re men liz xa', sa ta' mos jwan' wa re men liz xa' sen' nakin' mena.

⁴⁶ Nabe'z toz nda mos ya sen' lo ye'd twi' xa' mos nde yosi'b xa' mos ngeli mos re jwan' mnibe' xa' lo mos.

⁴⁷ Nipa na lo go', lo mos ya tan' xa' reta jwan' ngeno xa', sa kenap mosa.

⁴⁸ Per tez mos ya nakap nak, li mos xgab: "le' xwan' na sow'ra' ye'd",

⁴⁹ nde tolo kin mos re ta mos mos, tolo wa mos nde gu mos nit kon re xa' guy.

⁵⁰ Le' xa' nyebe' bere wiz nde hor jwan' nangembedta mos.

⁵¹ Zyasa jwan' toz kin xa' mos, nde ko xa' mos plo nzo re xa' kwin'. Tya gon mos nde tyez le mos.

25

Kwent chan' tsi' mza'yen'

¹ Le' yalnyebe' lo be' ak xaja nak si' mza' yen' jwan' mxen kandil na', mbro' ndaxi' ned mbyo jwan' selya'.

² Gay' mza' naxaxla's nde ti gay' mza' ne yek na'.

³ Le' re gay' mza' ta na'ngenta xgab yek na' ya, mbe' mza' kandil per na'ngwed mza' aseyt yoy tedib gob.

⁴ Per le' re mza' nzo xgab yek na' ya, mbe' mza' kandil nde xa'ta mbe' mza' masra aseyt len' ye.

⁵ Nde ndolen' mbyo selya' ya, tolo nde mkal' lo re mza' nde mdat re mza'.

⁶ Nde mer rolja yal' mbyen mbrez thi xa': "¡Le' mbyo selya' nde, goche go' waxi' ned go' mbyo!"

⁷ Zyasa ngoche reta mza', nde mdoxkwa' mza' kandil mza'.

⁸ Zyasa re gay' mza' ngenta xgab yek na' ya, nchab lo ti gay' mza' ta nzo xgab yek na' ya: "Ta' go' lud aseyt go' ka ná', tak ndo yu' kandil ná'."

⁹ Per re mza' ta nzo xgab yek na' ya mkab: "par na'akjwadta aseyt lo ná' nde lo go', mas jwin wa ka go' aseyt go' ten' nto xa'y."

¹⁰ Per laja nda ti' re gay' mza' ta na'ngenta xgab yek na' ya aseyt, le' mbyo selya' mzin. Nde re mza' ta nzisa'la ngoteno mza' mbyo selya' ya lo yalselya', nde mtow' xa' yala.

¹¹ Xisa mzin re mza' nangeta xgab yek na' ya nde mbrez re mza', nchab mza': "¡Xa' nyebe', Xa' nyebe', bxa' yala sa yote ná'!"

¹² Per le' mbyo mkab: "Gal' di's, nanzolot na go'".

¹³ Zyasa nchab Jesús:

—Brena go', tak na'nyed go' cho wiz nde cho hor ye'd Xin' Mbi'.

Kwent chan' tmi jwan' mtan' xa' lo mos

¹⁴ Le' yalnyebe' lo be' nak xa nak thi mbi' jwan' ryo' nda tij, nde mbrez xa' re mos xa' sa mtan'no xa' re chan' xa' lo mos.

¹⁵ Lo thib xa' mda' xa' gay' mil tmi or, lo tedib xa' mda' xa' chop mila, nde lo tedib xa' mda' xa' ti mila, ben' xa nke xa' sin' ta mda' xa'y lo tiba xa'; nde mbro' xa' nda xa' tij.

¹⁶ Le' mos ta mkaya' gay' mil tmi ya, mkeno xa'y sin' nde mbli xa' gan ti gay' mil tmi yek jwan' ta mkaya' xa' ya.

¹⁷ Taga xa' ta mkaya' chop mil tmi ya, mbli xa' gan ti chop mil la yek jwan' ta mkaya' xa'.

¹⁸ Per xa' ta mkaya' ti mila ya, ngwathen' xa' thi ye'r nde mka's xa' tmin xa' nyebe' lo xa'.

¹⁹ Mbri'd bro toz tyemp sera' mbere xa' nyebe' lo re mos nde mblo' xa' kwent kon re mos xa'.

²⁰ Nde mzin mos jwan' ta mkaya' gay' mil tmi ya, nde ndeno xa' tedib gay' mil tmi nde nchab xa': "Señor, gay' mil tmi mda'a lon le' chan' la nche'ya' nde mbli gan ti ta gay' mila lo jwan' ta mda'a lon."

²¹ Nde xa' nyebe' lo mos, nchab: "Jwin toz mbli, mos gal' nak la, tibra' mbli rsin' la, jwan' lud mdan loa nde jwin mkenap lay, naya tayan masra' broy loa. Bri'd sa ko nale lazon'."

²² Xisa mzin mos ta mkaya' chop mil tmi, nde nchab: "Señor chop mil tmi ta mda'a lon, le' chan' la nche'ya', mbli gan ti chop mil tmi lo jwan' ta mdaya'a lon."

²³ Le' xa' nyebe' nchab: "Jwin toz mbli, mos gal' nak la, tibra' mbli rsin' la, jwan' lud mdan

loa nde jwin mkenap lay, naya tayan mas broy loa. Bri'd sa ko nale lazon'."

²⁴ Nde sen' lo mzin mos jwan' ta mkaya' thi mil tmi ya, nchab mos lo xa' nyebe': "Señor, mnen le' lu nak thi xa' ne toz nak, nthop la re jwan' ngok plo namblot la bin, nde nthop la jwan' ngok plo nambsit la mbis.

²⁵ Jwan' nasa mzyeb na nde ngwan mka's na tmin la len' izyo. Le' tmin la nche'ya'."

²⁶ Le' xa' nyebe' nchab lo mos ya: "Mos xkap nde mos sa'b, mnea nthop na jwan' plo namblot na bin, nde nthop na jwan' plo nambsit na mbis.

²⁷ Jwan' nasa ndablo nda'a tmina nkeno men sin', sa sen' mberen nkayan tmina kon re jwan' mbliy gan."

²⁸ Zyasa nchab xa': "Pkib go' tmi lo ya' xa', nde pta' go'y lo xa' ta nden si' mila.

²⁹ Tak xa' ngenolay, masra'y kaya' xa' sa keno xa' mas broy nde xa' nangennodey, xa' ya axta jwan' lud ngeno xa' yi'ba ya' xa'.

³⁰ Nde mos ngen cho sin' ndli, blote go' xa' le lo yalkow, tya gon xa' nde tyez le xa'."

Sen' nyab Dios kwent lo re men

³¹ Sen' ye'd Xin' Mbi' xajka Rey kon yalnaro chan' Xa' nde kon reta anj nayon, zyasa tyob Xa' ten' nyebe' Xa' kon yalnaro chan' Xa'.

³² Nde dyope reta men nzi dib xis izyo lo Xa', nde koxa' Xa' men lo ta men, ta xa ngoxa' xa' nkenap mbakxil' re mbakxil' xij re chib.

³³ Nde re mbakxil' kwek Xa' lad ban Xa', le' re chib kwek Xa' lad beg Xa'.

³⁴ Zyasa gab Rey lo re xa' nzi lad ban Xa': "De' reta go' ta mbli ley' Xud na', pkaya' go' ten' nyebe' go' jwan' mtan'la Xa' par go' axta sen' mdoxkwa' izyo.

³⁵ Sen' ndyan' na, mda' go' jwan' mdan, nchek lazo'n nde mda' go' nittyen gun, mkete'n plo nanakta las na, mda' go' plo mbled na.

³⁶ Ngenta xab na nde mda' go' lar ngok na, mxak yis na nde ngwa tna go' na, mke'n lizyi'b nde ngwa twi' go' na."

³⁷ Zyasa re xa' gal' ndo nyabdi's xa': "Señor, ¿poa mbwi' ná' lu ndyan' la nde mda' ná' jwan' mdaa? ¿Poa mbwi' ná' nchek lazo'a nde mda' ná' nitye ngu'a?

³⁸ ¿Poa mbwi' ná' lu ngetea xa'ga' izyo nde mda' ná' plo mbled la o ngenta xab la nde mda' ná' lar ngok la?

³⁹ ¿O pol mbwi' ná' nayiz la, o ngea lizyi'b nde ngwa tna ná' lu?"

⁴⁰ Zyasa kab Rey lo re xa' ya: "Nipa na lo go' sen' mbli go'y lo thi wes na o btan' na, jwan' mas nabil ndyak, lon mbli go'y."

⁴¹ Zyasa noga lo xa' ta nzi lad beg Rey gab Rey: "Baxa bike go', men xkap toz, wa go' lo bel adi' jwan' natoxkwa' la par Maxu' kon re anj chan' Maxu'.

⁴² Tak sen' ndyan' na, na'nda'd go' jwan' ngwan, nchek lazo'n na'nda'd go' nitye gun,

⁴³ mkete'n izyo plo nanakta las na nde na'nda'd go' plo mbed na. Ngenta xab na nde na'nda'd go' lar ngok na, mxak yis na nde mke'n lizyi'b nde na'ngatnad go' na."

⁴⁴ Zyasa no re xa' ya kab lo Rey: "Señor, ¿pol mbwi' ná' ndyan' la, nchek lazo'a, mketea izyo plo nanakta las la, ngenta lar gok la, mxak yis la nde mkea lizyi'b nde na'ndlastod ná' lu?"

⁴⁵ Le' Rey kab lo re xa' ya: "Nipa na lo go', kwent na'ndlid go'y lo thi men jwan' mas nabil ndyak, lon na'ndlid go'y."

⁴⁶ Nde re xa' re' ya, ya lo pen adi', nde le' re xa' mbli jwan' gal', xa' ya ya lo yalnaban adi'.

26

Nkwan' xa' xamod yola Jesús
(Mr. 14:1-2; Lc. 22:1-2; Jn. 11:45-53)

¹ Sen' mne mdej Jesús reta di's ya, nchab Xa' lo re xin'te'd Xa':

² —Mne go' len' ti chop wiz gal ni pask, nde le' Xin' Mbi' taya' men Xa' sa ke Xa' lo krus.

³ Zyasa, re nglwey' jwan' nyebe', re maestr nchak ley, nde re xa' gox nyebe' lo yez, mdyop xa' lo le chan' nglwey' ro ndole Caifás,

⁴ Tya ngok di's re xa' sa kon yalkwin' tyen xa' Jesús nde kuj xa' Jesús.

⁵ Per nchab re xa':

—Na'lid na'y len' ni re', sa na'xyolta re men.

Thi ngol nchub Perfum yek Jesús
(Mr. 14:3-9; Jn. 12:1-8)

⁶ Nde sen' ndo Jesús len' yez Betania, liz Simón xa' mxak yis ye'sya's;

⁷ zyasa msin thi ngol ndeno thi bot ndole alabastro sey nzo nit naxe' nap toz ntak. Nde mblaj ngol bisa yek Jesús sen' ndob ya Jesús.

⁸ Sen' mbwi' re xin'te'd Jesús jwan' na, Mxi lazo' xa' nde nchab xa':

—¿Kwan' liy ta mxo ngol nit naxe'?

⁹ Jwan' re' ndoyal nap toz ndoy nde tmi ya nda' men lo re xa' prob.

¹⁰ Nde mbin Jesús jwan' na, nchab Jesús lo re xin'te'd Xa':

—¿Kwan liy nda' go' xyan yek ngol re'? Thi yalwen mbli ngol re' lon.

¹¹ Tak go' tatka nzono go' xa' prob, nde na na'yot na xij go' dib tyemp.

¹² Lo ta mchub ngol nit naxe' yek na, mbli ngol ndosa'a na lo sen' ga's na.

¹³ Nipana lo go', one plo tej men xki's Dios dib xis izyo, noga yaj jwan' mbli ngol re' lon, sa tamod tela's men ngol.

Judas mbyan' di's taya' Jesús

(Mr. 14:10-11; Lc. 22:3-6)

¹⁴ Zyasa Judas Iscariot, tib xa' no nak re tib zen xin'te'd Jesús, ngwa xa' lo re nglwey' jwan' nyebe',

¹⁵ nde nchab Judas lo re xa' ya:

—¿Plopa ta' go' kan tez tayan Jesús lo go'? Zyasa mda' xa' galpsi' tmi plata lo Judas.

¹⁶ Nde xata zya ndobte Judas tolo mkwan' xa' xamod taya' xa' Jesús.

Lulka rsye' mda Jesús

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Wis ner jwan' ndyobte ni jwan' ncha xa' pan na'ngenta lebadur, mbike re xin'te'd Jesús lo Jesús nde mnabdi's xa':

—¿Plo nchola's la toxkwa' ná' rsye' waa len' yal' pask?

¹⁸ Nde Jesús nchab:

—Wa go' yez, liz thi mbi' nde gus go' lo mbi':
“Le' Maestr ne: Le' hor na ndosin gax, nde liz la wa rsye'n ni pask kon re xin'te'd na”.

¹⁹ Nde re xin'te'd Jesús mbli reta jwan' mnabe' Jesús, nde mdoxkwa' xa' jwan' wa rsye' xa' len' yal' ni pask.

²⁰ Sen' lo mbla yal' ngo Jesús ro mes kon re tib sen xin'te'd Xa'.

²¹ Nde laja nzi ya re xa', nchab Jesús lo re xin'te'd Xa':

—Gal'pa di's nin lo go', le'ga thi go' re' taya' na.

²² Zyasa nabil toz ngo lazo' re xin'te'd Jesús, nde thib thiba xa' tolo mnabdi's lo Jesús nchab xa':

—¿Cho nay Señor?

²³ Zyasa mkab Jesús lo re xa':

—Xa' jwan' thita ngo yan' len' yen kon na, xa' yay.

²⁴ Lipa le' Xin' Mbi', rid nda'b reta jwan' nge ni lo xki's Dios rid Xa', per ¡nalat thos toz yate xa' jwan' taya' Xin' Mbi'! Mas jwin na'ngalta xa'.

²⁵ Zyasa mkab Judas xa' ta taya' Jesús nchab:

—¿Cho nay? Maestr.

Jesús mkab lo Judas:

—Aa', luy.

²⁶ Laja nzi ya re xa', Jesús mxen pan nde mda' Xa' ndyux lo Dios, xisa mblirol Xa'y mda' Xa'y lo re Xin' te'd Xa' nde nchab Xa':

—Bxen go' pan nde bda go'y, jwan' re' nak bel' na.

²⁷ Xisa mxen Jesús kop nzo bin, nde ngolo mda' Xa' dyux lo Dios, mda' Xa'y lo re xin'te'd Xa' nde nchab Xa':

— Gu' reta go' jwan' nzo len' kop re',

²⁸ tak bin re' nak ren na, ren jwan' nak mod kub mtan' Dios xki's Dios, ren jwan' xyo sa dyon' xken bro toz men.

²⁹ Naya, nin lo go', na'guttra' na jwan' nda' lus ub, axta wiz sen' guney tedib gob kon go' ten' nyebe' Xud na.

*Jesús ndej, Pedr gab nanzolod Pedr Jesús
(Mr. 14:26-31; Lc. 22:31-34; Jn. 13:36-38)*

³⁰ Sen' ngolo mbil' re xa' di lo Dios*, mbro' re xa' nda xa' yi' Olib.

³¹ Zyasa nchab Jesús lo re xin'te'd Xa':

—Na yal' re' reta go' la' go' na, tak lo xki's Dios nchab: “Kuj na xa' ngenap mbakxil' nde re mbakxil' rya's”

³² Per sen' mbroxbanla na, ner na nda Galilea, xis yed go'.

³³ Zyasa Pedr nchab lo Jesús:

—Tanye reta xa' la' xa' lu, na na'lat na lu.

³⁴ Nde Jesús mkab lo Pedr:

—Nipa na loa, na yal' re', ben' tera kwes ngid te', son gob nchab la lu nazolodla na.

³⁵ Le' Pedr nchab lo Jesús:

—Tanye non nakin' gaj kon lu, na'gabta na nanzolod na lu. Nde reta xin'te'd Jesús taga nchab.

* **26:30 26:30** Re di jwan' nchol' xa' ngok Sal 113-114 nchol' xa sera tyobte wa xa', nde Sal 115-118 nchol' xa' sen' ngolo mda xa'.

*Jesús ndodi'sno Dios Getsemaní**(Mr. 14:32-42; Lc. 22:39-46)*

³⁶ Zyasa mzin Jesús kon re xin'te'd Xa' ten' ndole Getsemaní, nde nchab Jesús lo re xa':

—Nche'ta btob go' laja le'n nda ba, nda todi'sno Dios.

³⁷ Nde mbe' Jesús Pedr kon rop xa' xin' Zebedeo, nde tolo nabil toz ngo lazo' Jesús nde narax ndyak Xa'.

³⁸ Zyasa nchab Jesús lo xa':

—Nabil toz nzo lazo'n, nden' na gaj na lo yalnabil re'. Ncheta kwed go' nde brenano go' na.

³⁹ Tud mde Jesús tya, mdoxub Jesús axta mdin' lo Xa' izyo, nde mdodi'sno Xa' Dios, nchab Xa':

—Xud na, tez toyal la, ptola'n lo pen re, per na'akte xa ncholas na, aka xa ncholas la.

⁴⁰ Nde mbere Jesús plo nzi xin'te'd Xa', le' re xin' ted Xa' nzi yat, nde nchab Xa' lo Pedr:

—¿Cho nekthib hor na'ndlid go' gan mbenano go' na?

⁴¹ Brena go' nde mna'b go' lo Dios sa na'kwin'nod Maxu' go'. Gal' di's le' xbin go' nchola's li xa ndabloy, per bel' go' naxekta.

⁴² Nde ngwa Jesús mbrop gob nde mna'b Xa' lo Dios nchab Xa':

—Xud na, ri'd na pen re' tez na'nyed lyan' lo ney, aka xa nchola's la.

⁴³ Lo sen' mbere Xa' tedib gob ten' nzi xin'te'd Xa', le' xin'te'd Xa' nzi yat, tak na'xektra xa' ncho mkal' lo xa'.

⁴⁴ Nde mbla' Jesús re xa' tya, nde bere ngwa na'b Jesús lo Dios byon gob, nchab Xa' le'ga le' re di's ya.

⁴⁵ Zyasa mbere Xa' ten' nzi re xin'te'd Xa' nde nchab Xa':

—¿Cho tata nzi yat go' nde nzi nryo'xkwen go'? Se mzin hor le' Xin' Mbi' taya' xa' lo re men nzo'b xken na'.

⁴⁶ Goche go', len' nda, wi' go', le' xa' ta taya'n nde gaxla.

Judas ndaya' Jesús

(Mr. 14:43-50; Lc. 22:47-53; Jn. 18:2-11)

⁴⁷ Tata ben' ndotodi's Jesús, le' Judas mzin, kon bro toz men, Judas re' no ngok kwent lo re tib sen xin'te'd Jesús, nde re men ta ndeno Judas, cho xa' nden ya nde cho xa' nden espad. Re xa' ya, mtel' re nglwey' jwan' nyebe', kon re xa' gox jwan' nyebe' lo yez.

⁴⁸ Nde Judas xa' ta mdaya' Jesús sa, mbyan' di's la xa' kon re xa' ya nchab xa':

—Xa' jwan' ken chut kwat na', Xa' yay, bxen go' Xa'.

⁴⁹ Nde zyaga mbike Judas lo Jesús, nchab Judas:

—¡Chan go' Maestr!

Nde mda' Judas chut kwat Jesús.

⁵⁰ Le' Jesús nchab lo Judas:

—Amig, ¿cho kwan ndelia?

Zyasa mbike gax re xa' ya, mxen xa' Jesús sa we xa' Xa'.

⁵¹ Per thi xa' ndo kon Jesús mblo' xa' espad xa' nde thiptane mcho' xa' thi nza xa' nak mos nglwey' ro.

⁵² Zyasa nchab Jesús lo xa':

—Blotsa' espad la ten' nzo tsa'y. Tak reta xa' ngyo kon espad, taga kon espad gaj xa'.

⁵³ ¿Cho le'a ndyak na na'akta nya'b re anj lo Xud na naya, nde Xa' tel' por mil anj chan' Xa'?

⁵⁴ Per tez ta lin, ¿xamod ak reta jwan' ngeni lo xki's Dios, ta nchab nakin' ak jwan' ta ndoyak naya?

⁵⁵ Zyasa nchab Jesús lo re men:

—¿Kwan liy nde go' kon espad nde kon ya sa we go' na xaja wan'? Reta wiz mdob na len' yodo' kon go' mblo'n xki's Dios lo go' nde na'ndenta go' na.

⁵⁶ Per reta jwan' re' ndoyak, sa gak reta xki's Dios jwan' mke' re profet.

Zyasa mxon' reta xin'te'd Jesús mbla' xa' thib Jesús tya.

Mbe' xa' Jesús lo nglwey' ro

(Mr. 14:53-65; Lc. 22:54-55,63-71; Jn. 18:12-14,19-24)

⁵⁷ Reta xa' ta mxen Jesús, mbe' xa' Jesús lo xa' nak nglwey' ro nale Caifas, ten' mdyop re maestr nchak ley nde re xa' gox nyebe' lo yez.

⁵⁸ Per Pedr, tij tij ndanke xis Jesús, axta mzin lo le liz nglwey' ro, nde ngote Pedr mdob Pedr kon re xa' ngenap liz nglwey' ro, sa wi' Pedr nyen' xamod yolo yatey.

⁵⁹ Nde re nglwey' jwan' nyebe', re xa' gox nyebe' lo yez nde re xa' nak sin', nkwan' xa' nyen' cho yalkwin' ke' xa' yalke yek Jesús, sa toyal taya' xa' Jesús gaj Jesús.

⁶⁰ Per na'nzalta xa' cho yalkwin' ke' xa' yek Jesús, ta'nye na'r re xa' mke' jwas xis Jesús. Lulka mzin chop xa' kwin',

⁶¹ nde nchab xa':

—Mbi' re' nchab: “Tlin gan tzil na yodo' chan' Dios nde len' son wiz toxkwa' nakub ney tedib gob.”

⁶² Zyasa mdoli nglwey' ro nde nchab xa' lo Jesús:

—¿Cho ngen kwan nyea? ¿Kwan liy sa ta ni re xa' re' xis la?

⁶³ Per Jesús nankabta lo xa'. Zyasa le' nglwey' ro nchab lo Jesús:

—Nya'b na loa por le Dios naban, btej lon ná' tez lu nak Crist, Xa' nak Xin' Dios.

⁶⁴ Le' Jesús mkab:

—Nay, ta xa nea ba, nde noga nin lo go', naya tolo wi' go' Xin' mbi' ndob lad ban' Dios ngeno dib yalnaro, nde wi' go' Xa' sen' ye'd Xa' xij xkow lo be'.

⁶⁵ Zyasa le' nglwey' ro mpched xa' xab xa' nde nchab xa':

—¿Mnixin xa' xis Dios! ¿Kwan liy kwan'ra na' masra men ta kwent? Lega le' go' mbin, mnixin xa' xis Dios.

⁶⁶ ¿Xa ngwi' go'y?

Le' re xa' ya mkab:

—Yalke nchap Xa' nde ndablo gaj Xa'.

⁶⁷ Zyasa mzuk xa' lo Jesús, nde mdin xa' Jesús. Nde ti pla xa' mdis bad lo Jesús

⁶⁸ nde nchab xa':

—Tez lu nak Crist, ptej lo ná' ¿cho ta mke'y choa?

Pedr nkas nanzolod Pedr Jesús

(Mr. 14:66-72; Lc. 22:56-62; Jn. 18:15-18,25-27)

⁶⁹ Laja ndob Pedr lo le, thi ngol nge sin' tya mbike gax lo Pedr nde chab ngol:

—Noa ngete kon Jesús Xa' Galilea.

⁷⁰ Le' Pedr mka's lo reta xa' nde nchab Pedr:

—Nyet na cho kwan ta mbez la.

⁷¹ Lo sen' ndarote Pedr ro yala, mbwi'ga tedib ngol Pedr, nde nchab ngol lo re xa' nzi tya:

—No mbi' re' mkete kon Jesús xa' yez Nazaret.

⁷² Le' Pedr mka's tedib gob, nde Dios mtobro Pedr nchab Pedr:

—Nanzolot na mbi' ta ndej go' ba

⁷³ Tud ndate, mbike gax re xa' nzi tya nde nchab xa' lo Pedr:

—Ndlo' tir noa ngete xis Jesús, tak axta xa ndodi's la ndlo'y.

⁷⁴ Zyasa le' Pedr nchab:

—Nia na lo go' nanzolot na mbi' ba. ¡Dios totin tez ndo kwin' na!

Nde hor yaga mbrez ngid te'.

⁷⁵ Zyasa mtela's Pedr jwan' nchab Jesús lo Pedr: “Ben' tera kwes ngid te', son gob nchab la lu nanzolodla na.” Nde mbro'te Pedr le, tya jwan' toz nabil mbin' Pedr.

27

Mdaya' xa' Jesús lo Pilat

(Mr. 15:1; Lc. 23:1-2; Jn. 18:28-32)

¹ Sen' lo mduxni, re nglwey' jwan' nyebe' nde re xa' gox jwan' nyebe' lo yez, ngok di's xa' nyen' xa li xa' sa kuj xa' Jesús.

² Nde ndobo Jesús mbe' xa' Jesús, mdaya' xa' Xa' lo Poncio Pilat, xa' nak gobernador.

Judas ngu

³ Zyasa Judas xa' ta mdaya' Jesús, lo mne xa' le' Jesús gaj, narax mxak xa' nde mzire xa' re gal psi'

tmi plata lo re nglwey' nyebe' nde lo re xa' gox
jwan' nyebe' lo yez,

⁴ Nchab xa':

—Mkwan na yalke lon tak mdayan ti mbi'
ngencho yalke nchap lo yalguj.

Per re xa' ya mkab:

—Ngen cho xyo nzo ná'y, kwent chan' la jwan'
na.

⁵ Nde mblobi Judas re tmi plata ya len' yodo',
mbro' xa' tya nda xa' mblo xa' do' yen xa', mbij
xa' lazo' xa'.

⁶ Le' re nglwey' jwan' nyebe', mtop xa' tmi ya
nde nchab xa':

—Nale'd naka kon' tmi re' len' plo nchotsa' tmi
yon, tak le'y mbiax yalguj chan' thi mbi'.

⁷ Nde sen' ngolo ngok' di's re xa', kon tmi ya mxi'
xa' Wan chan' xa' ndoxkwa' jwan' yomin, sa tya
ga's re xa' nde tib blad.

⁸ Jwan' nasa axta wiz naya wan ya ndole Izyo
Ren.

⁹ Tamod ngok jwan' mni profet Jeremías sen'
nchab xa: "Mxen xa' re gal psi' tmi plata, yapa
mtob re xa' Israel ntak Xa'.

¹⁰ nde kon tmi ya mxi' xa' wan chan' xa'
ndoxkwa' jwan' yomin, xa mnebe' Dios lon."

Pilat nya'b di's lo Jesús

(Mr. 15:2-5; Lc. 23:3-5; Jn. 18:33-38)

¹¹ Lo sen' mbe' xa' Jesús lo Pilat xa' nak gober-
nador, nde mna'b di's xa' lo Jesús, nchab xa':

—¿Cho lu nak rey lo re xa' judío?

Jesús mkab lo xa':

—Nay ta xa nea ba.

¹² Sen' re nglwey' jwan' nyebe' nde re xa' gox jwan' nyebe' lo yez, mke' xa' yalke yek Jesús, nde Jesús neklud nankabta.

¹³ Zyasa nchab Pilat lo Jesús:

—¿Cho nanchonta la plopa yalke ngeke' xa' yek la?

¹⁴ Per Jesús nek thiblan di's na'nkapta, jwan' nasa jwan' toz nzoyen gobernador.

Ngok di's xa' gaj Jesús

(Mr. 15:6-20; Lc. 23:13-25; Jn. 18:38—19:16)

¹⁵ Len' wiz nchal ni, le' gobernador ngeno thi mod, ndla' xa' thi men nge lizyi'b, thi men jwan' nchola's re ma yez lya'.

¹⁶ Zyasa, thi xa' nzo'b toz xki's na' nge lizyi'b ndole Barrabás;

¹⁷ nde sen' mdyope reta ma yez, mnabdi's Pilat lo xa':

—¿Cho nchola's go' lan? ¿Cho Barrabása o Jesús Xa' ni xa' Crist?

¹⁸ Tak mne Pilat kwent ngi'no re men Jesús jwan' na mdaya' xa' Jesús.

¹⁹ Laja ndob Pilat ten' ndyob xa' nya'b xa' kwent, zyasa ngol Pilat mtel' thi di's lo Pilat nchab: “Na'totit la mbi' ta ngen cho yalke nchap, tak narax toz msa' lazo'n Xa' yal' la.”

²⁰ Per re nglwey' jwan' nyebe' nde re xa' gox nyebe' lo yez mblo xa' yek re men toz tir nzi tya, sa nya'b xa' ba' Barrabás nde Jesús gaj.

²¹ Le' Pilat mbere mnabdi's tedib gob:

—¿Lo rop xa', xanya xa' nchola's go' lan?

Le' re xa' mkab:

—Barrabás bla'.

²² Pilat nchab lo re xa':

—Mbay ¿Cho kwan linon Jesús Xa' ni xa' Crist?

Le' reta xa' mkab:

—¡Pke' Xa' lo Kruz!

²³ Nde gobernador nchab lo re xa':

—¿Cho jwan' narax mbli Xa'?

Per reta men masra ne mbrez nde nchab xa':

—¡Pke' Xa' lo kruz!

²⁴ Lo mne Pilat ngen kwan li xa' gan, che'la masra mxyol re men, mxen Pilat nit nde mtach xa' ya' xa' lo re ma yez nde nchab xa':

—Ngen cho yalke nchap na lo ta gaj mbi' nambi re', kwent chan' go' naka.

²⁵ Nde mkab reta ma yez lo Pilat:

—Yek ná' nde yek xin' ná' ya yalke ta gaj mbi' re'.

²⁶ Zyasa mbla' Pilat Barrabás, nde mnibe' xa' mdin men Jesús zyara mdaya' xa' Jesús sa ke Jesús lo kruz.

²⁷ Zyasa re sondad gobernador mbe' xa' Jesús yolow, nde tya mdyope reta sondad cho Jesús.

²⁸ Nde mbloche xa' xab Jesús, nde mxo'b xa' thi lar naren xis Jesús,

²⁹ nde kon yits mdoxkwa' xa' thi koron mtob xa' yek Jesús, nde mblo xa' thi ya ya' ban Jesús. Zyasa mdoxub re xa' lo Jesús nde mxino xa' Jesús nchab xa':

—¡Naro toz nak Rey chan' re xa' Judío!

³⁰ Mzuk xa' lo Jesús, nde le'ga le' ya nden Jesús mxen xa' mke' xa'y yek Jesús.

³¹ Ngolo mxino xa' Jesús, mkib xa' lar nachal Xa' nde mbok xa' xab Xa' tedib gob nde mbe' xa' Xa', sa ke' xa' Xa' lo kruz.

Mke' xa' Jesús lo kruz

(Mr. 15:21-41; Lc. 23:26-49; Jn. 19:17-30)

³² Sen' lo ndorote xa' tya, mzyal' xa' thi mbi' yez Cirene ndole Simón, mbi' ya fwerz mchal xa' mbe' mbi' krus.

³³ Nde sen' mzin xa' ten' ndole Gólgota, (di's re' nak: sij yek men).

³⁴ Tya mda' xa' nit binagr nos kon nit nala, gu Jesús, per ben'ta mbli be' xa'y, na'ngud Xa'y.

³⁵ Sen' ngolo mke' sondad Jesús lo kruz, mblibe' xa' xis xab Jesús nyen' xanya xa' kay. Tamod ngok jwan' nchab profet: "mblibe' xa' xis xab na, nde mblirol xa'y xij xa'"

³⁶ Nde re sondad mdob tya sa kenap xa' Jesús.

³⁷ Nde gap yek krus ten' nge Jesús mke xa' letr ndej yalke mke' xa' Jesús lo kruz, nchab: "XA' RE' NAK "JESÚS, REY LO RE XA' JUDIO"

³⁸ Nde noga chop xa' wan' mke' lo kruz cho Jesús tib xa' mke lad ban, nde tib xa' mke lad beg Jesús.

³⁹ Nde re xa' ndarid tya nkwin xa' yek xa', nde naxin mbez xa' lo Jesús,

⁴⁰ mbez xa':

—Lu ta mbez sil yodo' nde len' son wiz bere ntoxkwa' nakub ley tidib gob, ptola' lazo'a. Tez xin' Dios nak la, bla lo kruz.

⁴¹ Taga' mbli re nglwey' jwan' nyebe', re maestr nchak ley, re xa' fariseo, nde re xa' gox nyebe' lo yez nxino xa' Jesús mbez xa' lo ta xa':

⁴² —Xaga' re men mtala' Xa' nde nalid Xa' gan tola' Xa' le'ga le' Xa'. Tez Xa' nak Rey lo xa' yez Israel, lya Xa' lo kruz naya sa li lazon' Xa'.

⁴³ Dios ndli lazo' Xa', Dios tola' Xa' naya tez nke' lazo' Dios Xa', tak nchab Xa' Xin' Dios nak Xa'.

⁴⁴ Nde axta noga re xa' wan' ta nge lo kruz cho Jesús taga naxin' mbez xa' lo Jesús.

Nguj Jesús

(Mr. 15:33-41; Lc. 23:44-49; Jn. 19:28-30)

⁴⁵ Nde rolja wiz mbala yal'kow dib nax izyo axta a rolka bzye.

⁴⁶ Nde mer las tres bzye ya Jesús mbrez yaj toz nchab:

—Elí, Elí, ¿lama sabaktani? —Di's re' nak: Dios na, Dios na, ¿Kwan liy mbala'a na?

⁴⁷ Pla xa' nzi tya mbin xa' jwan' na nde nchab xa':

—Profet Elías, ngebez Xa'.

⁴⁸ Nde zyaga thi xa' ngwa karel mxen xa' thi xil' nde mbwaz xa'y binagr, nde mtob xa'y lo thi ya nde mda' xa'y ngu' Jesús.

⁴⁹ Le' temas xa' nchab:

—La'a, sa win' nyen' cho tye'd tola' Elías Xa'.

⁵⁰ Nde Jesús ne toz mbrez yaj Xa' tedib gob nde nguj Xa'.

⁵¹ Zyasa le' lar nge len' yodo' arolja mcheda xata gap axta xan' ne'y, mbwin xo nde mblye re ke,

⁵² mxyal' re ba', nde na'r toz re xa' nguj, jwan' gal' mkete lo Dios mbro' xban.

⁵³ Nde mbro'te xa' len' ba', sen' mbro'xbanla Jesús, ngote re xa' len' Jerusalén yez nayon nde nar toz lo re men mbro'to xa'.

⁵⁴ Zyasa le' xa' nyebe' lo sondad kon re sondad xa' ta nzi kenap Jesús, lo mbwi' xa' mbwin xo nde reta jwan' ta ngoka, mzyeb toz xa' nde nchab xa':

—¡Liga Xin'pa Dios nak mbi' re'!

⁵⁵ Nde tya, tij nzi wi' nar toz ngol jwan' ta mdonke xis Jesús, xata mbro' Xa' Galilea nde mbli xa' sin' lo Jesús.

⁵⁶ Nde xij re ngol ya nzo Mari Magdalen, Mari xna' Jakobo kon Jose nde kon ngol xna' xin' Zebedeo.

Mbwa's Jesús

(Mr. 15:42-47; Lc. 23:50-56; Jn. 19:38-42)

⁵⁷ Sen' lo ndala yal', mzin thi mbi' rik xa' yez Arimatea ndole Jose, mbi' ya noga ngok xin'te'd Jesús.

⁵⁸ Mbi' ya ngwa lo Pilat ngwanab thabol Jesús lo Pilat. Nde Pilat mnibe' sa ta' xa' thabol lo xa'.

⁵⁹ Nde mxen Jose thabol, mchal xa' Xa' thi lar nambi

⁶⁰ nde mka's xa' Jesús len' ba'n kub xa', jwan' mden' xa' lad ke. Ngolo mtow' xa' ro ba' kon thi ke ro, ngo xa' ned ndya xa'.

⁶¹ Nde tya nzi Mari Magdalen kon tedib Mari, ndob xa' ngo' lo ba'.

Re Sondad ngenap ro ba'n Jesús

⁶² Lo tedib wiz, wiz jwan' ndryoxkwen men, mdyope re nglwey' jwan' nyebe' kon re xa' fariseo, lo Pilat,

⁶³ nde nchab xa' lo Pilat:

—Wi' go' nea, ndelazo' ná' le' xa' kwin' na, sen' lo ben' naban xa' nchab xa', lo yaxob son wiz ryo' xban xa'.

⁶⁴ Jwan' nasa, mnebe' sa ya kenap men ba' axta kebe' yaxob son wiz, tak ndaga ya re xin'te'd xa' yal', nde li wan' xa' thabol nde gab xa' lo re men:

“Mbroyxban xa' xij re men ngu”. Nde yalkwin' ya ak yalkwin' mas naro lo yalkwin' ner.

⁶⁵ Nde Pilat nchab lo re xa':

—Le' re sondad nzi ba, be' go' xa' nde jwin ptow' go'y, go' ya mnela xamod li go'.

⁶⁶ Zyasa ngwa re xa' ya nde jwin mtow' xa' ba' nde mtob xa' re sondad mkenapa.

28

Mbroyxban Jesús

(Mr. 16:1-8; Lc. 24:1-12; Jn. 20:1-10)

¹ Ngolo mbrid wiz jwan' ndryoxkwen men, sen' ndatuxni doming, ngwa Mari Magdalen kon tedib Mari, ngwa twi' xa' ban' Jesús.

² Nde mbwin thi xo toz. Tak thi anj chan' Dios mbroy' lo be', mbla nde mzike' anj ke ta now' ro ba' nde mdob anj xis ke.

³ Anta ndlya bel nya xa', xa nya bel ti' ba nde le' xab xa' nakis tir nya, xaja nya yike.

⁴ Sen' mbwi' re sondad anj, mzyeb toz xa', anta nxi'd re xa' nde ngob xa' xaja xa' nguja xa'.

⁵ Zyasa nchab anj lo rop ngol:

—Na'zyebta go', mnela na le' go' nkwan' Jesús, Xa' ta mke' men lo kruz.

⁶ Na'ngenta Xa' nche'ya, le' Xa' mbroxbanla xa nchabka xa' ya, de' go' sa wi' go' ten' mdix men Xa'.

⁷ Pken go' wa go' nde gus go' lo re xin'te'd Xa': “Le' Xa' mbroxbanla nde ndatela Xa' Galilea, tya wi' go' Xa'. Jwan' nata nin lo go'.

⁸ Zyasa le' rop ngol mbroy' ten' ndob ba', mzyeb ngol nde nale toz ngo lazo' ngol mke' ngol karel

ndayab ngola lo re xin'te'd Jesús. Nde laja nda rop ngol,

⁹ cho le' Jesús mbro'to mni dyux lo ngol. Zyasa mbike gax rop ngol, mdoxub ngol, mbli naro ngol le Jesús nde mde's ngol ni Jesús.

¹⁰ Nde Jesús nchab lo rop ngol:

—Na'zyebta go'. Wa yab go' lo re xin'te'd na, sa ya xa' Galilea, tya wi' xa' na.

Re jwan' nchab re sondad

¹¹ Laja nda rop ngol, pla sondad ngwa yez Jerusalén nde mda' xa' kwent reta jwan' ta ngotey lo re nglwey' jwan' nyebe'.

¹² Nde re nglwey' ya ngwa todi'sno re xa' gox jwan' nyebe' lo yez nde thita ngok di's re xa', nde tmi toz mda' xa' lo re sondad,

¹³ nde nchab xa' lo re sondad:

—Gus go', yal' sen' nzi yat ná' mbyed re xin'te'd Xa', nde mbli wan' xa' Xa'.

¹⁴ Nde tez le' gobernador nye jwan' re', ná' ko yek xa' sa nangen cho kwan li no xa' go'.

¹⁵ Nde re sondad mxen tmi nde mbli xa' xata nchab re xa' ya lo xa'. Nde yalkwin' re' nchaj xij re xa' Judío axta naya.

Jesús mbloned re xin'te'd Xa'

¹⁶ Nde re si' btib xin'te'd Jesús nda Galilea, lo yi' jwan' ten' mnabe' Jesús.

¹⁷ Nde sen' lo mbwi' re xa' Jesús, mdoxub xa' lo Jesús, per ti pla xa' ngok rop xgab na'.

¹⁸ Nde Jesús mbike lo re xa' nde nchab Jesús lo xa':

—Dios mda'a dib yalnibe lon sa nyebe'n lo be' nde lo izyo.

¹⁹ Jwan' nasa, wa go', nde ptote'd go' men dib nax izyo, sa ak xa' xin'te'd na nde kole go' xa' kon le Xud go' Dios, kon le Xin' Xa', nde kon le Mbi Nayon,

²⁰ nde blo' go' lo men li men reta jwan' mnibe'n lo go'. Nde wi' go' nea, na ndono go' reta wiz, axta kebe' lux izyo. Tamod naka.

**El Nuevo Testamento en el idioma Zapoteco
de Loxicha**
**The New Testament in the Loxicha Zapotec language
of Mexico**

El Nuevo Testamento en el idioma Zapoteco de Loxicha

copyright © 2025 Wycliffe Bible Translators, Inc.

Language: Loxicha Zapotec (Zapotec, Loxicha)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

968619e6-cca2-5898-b8d1-3b961f3e1c32